

TIAIRAA PITI

Tapati 9 no Titema 2001-11-12

Taiòraa : Mataio 3/1-12

Irava tumu: irava 3 v. ropu

« E reo no te hoê i te tiaororaa i te metepera. E haamaitai outou i te E'a o te Fatu. e faatitiaifaro i to'na haerea ».

To te huifaaroo nei, Ia ora na ! teie â tatou i roto i te tau no te tiairaa, no te piti no te tapati, o ta tatou i iriti i te tapati i topa ae nei. Mai te mau matahiti atoà, te faataa nei te mau teretetiano no teie nei ao i teie taima no te tiairaa. Taima no te hi'ohi'o, no te feruri, no te tau'aparau, no te haapii faahou i te tuatapapa te auraa no terâ taima no te tiairaa. No teie poipoi, na te papai Evaneria ra o Mataio e tauturu ia tatou i te tuatapapa i te faufaa rahi no te taima no te tiairaa, na roto i ta'na mau papairaa mo'a. Ua faahiti mai o ia i te parau no te hoê taata tuiroo, o ia te na mua o te Fatu, o ia tei faataa papù i te hoê taima no te tiairaa. Taua taata ra o Ioane ia.

- Te huru o Ioane i te pae tino.

Te faahiti ra o Mataio, i roto i te irava 4, i te tahi mau parau no nià i to'na huru oraraa pae tino oia hoi, « Huruhuru tamera to Ioane ahu, tatuahia to'na tauopu i te iri puua atarite e te meri o te fenua aihere ta'na maa ».

Ia hi'o tatou, mai te mea ra e, e hohoà Ioane mai te hoê taata tei ora i roto i te natura, mai te hoê taata no te ana (*homme des cavernes*) tei ora noa i roto i te uru aihere. Eita e ore te taata i te paraparau i terâ huru to Ioane. E manao paha vêtahi e, e huru reporepo to Ioane, eita e tano ia'na terâ io'a e, Ioane papetito. Te maa ta'na e amu, eita'toà

paha e tano faahou no to'na tau. E tau e amu ai te taata i te maa maitai.

I teie mahana, eita'toà e ore tatou i te vahavaha i terâ huru to Ioane e te maa e amuhia ra e ana, i roto ihoa ra i teie tau no Noera. O vai ia i rotopu ia tatou e amu i terâ huru maa e amuhia ra e Ioane.

Te tiaturi râ tatou e, e maa maitai atoà ta tatou i faaineine no te mau oroà hopeà matahiti. Teie râ, mai te mea e, ua maiti o Ioane i te ora i terâ huru oraraa, e ere anei e, ua maiti o ia ia vai haehaa noa o ia no te amo i te tiàraa ei na mua no te Fatu.

- Te huru o Ioane i te pae faaroo :

Te faaite atoà ra o Mataio i te mau parau no te ohipa ta Ioane i rave i roto i te irava 1 e te 2, « E poro haere i te metepara i te na ô raa e, E tatarahapa, te fatata mai nei hoi te Patireia ».

E tae noa'tu i te irava 11, « O vau nei te papetito nei au ia outou i te pape ... » E hoa here mâ, te ite ra tatou i te vahi e aore ia te tahua ohiparaa a Ioane tei te pae metepara oia hoi, te hoê vahi eita te taata e anaanatae maitai i te haere e aore ia, e ohipa.

Na reira'toa i te pae pape na roto ia i terâ ohipa no te papetito. Ia hi'o tatou, ua maraa ia Ioane i te ohipa i te tahi mau vahi tei ore i au maitai hia e te tahi atu mau taata. I teie mahana, te haapii mai râ teie parau e, i to te huifaaroo ihoa ra, te feia e hopoià ta ratou mai te orometua, te tiàtono, te poro Evaneria, ia haere atoà na te mau vahi tei ore i au hia i te haere (*mai te tere na te oire no Papeete i te pô, na roto i te mau aroa ...*) Eiaha ra e maiti i te mau vahi ohie noa. E haere atoà râ i ô mai atu i te mau otià tei matauhia e tatou. Ia hi'o tatou i teie nei i terâ huru to Ioane e te ohipa ta'na e rave ra, e ô mai te manao e, e taata teie tei haavî maitai ia'na i te pae no to'na oraraa tino. Aita te parau no to'na huru i faataupupu noa iti aè i te ohipa ta'na iho i hinaaro i te rave na roto i te parau no ta tatou nei irava tei

na ô mai e, « E reo no te hoê i te tiaororaa i te metepara, E haamaitai outou i te e'a o te Fatu e faatitiaifaro i to'na haerea ».

I roto i teie parau ta Ioane i rave mai roto mai i te tohuraa a Itaia peropheta, e mai te mea râ, te faariro nei oia i teie parau, ei parau pororaa na'na i te feia'toà tei farii i te parau no te tatarahapa. Eita te tatarahapa e tupu mai te peu e eita te taata e fatitiaifaro ia'n aiho. Ia parau Ioane e, « e haamaitai te e'a o te Fatu ». Te auraa, e imi i te rave'a eiaha te mau mea i nia i taua e'a ra, te mau vahi poopoo, mau vahi ofafai, ia riro ei mau mea tei faataupupu i te haereraa mai o te Fatu. Te auraa ra, e ohipa ia te tano ia ravehia. Te auraa no teie parau ia faaauhia i nia i te taata, te e'a e ohie ai te Fatu i te tomo i roto i to'na oraraa, o to'na ia aau. O te reira tuhaa ta Ioane e poro ra maori râ, eiaha te aau o te taata ia i te mana o iino, haavarevare. Ia na reira te taata te poro râ Ioane e, « E faatitiaifaro ».

E hoa here e, i roto i te pororaa a Ioane, aita o ia i maiti i te huru o te taata. Ua maraa atoà ia'na ia parau i te tahi mau parau teimaha i nià i te mau faatere faaroo. Ua faaite mai atoà teie huru i to Ioane i to'na ineine rahi, na roto i to'na huru na roto i ta'na mau parau, no to'na tiaturi e, ua riro mau o ia ei auvaha parau no te Fatu, ia riro taua Fatu ra ei faufaa rahi i roto i te oraraa o te taata. Na te varua o te Fatu i faariro ia Ioane ei taata tei na mua o taua Fatu ra, ei taata tei faatupu i te mau tohu i tahito ra. Te haapii mai râ teie parau ia tatou, i roto i teie tau no te ohie e no te titau i te maitai no te oraraa, ia riro tatou ei feia tei faatupu i te hinaaro o te Fatu, eiaha râ i to tatou iho.

Tapati 16 no Titema 2001
Tiairaa 3

Mataio 11/2-11

Ir 3: O oe anei te tae mai, e e tiaï anei tatou i te tahi ê.

Ia ora na tatou i roto i te aroha o te Atua i to tatou nei farereiraa.

E hoa here mā,

Te tupu nei tēie parau ta tātou i te taima a tapeāhia ai o Ioane Papetito i roto i te fare tapeāraa. I muri noa aè i to Ietu haapiiraa i ta na mau pipi, e i to na atoà tonoraa i ta na mau pipi na roto i te mau oire rii no te faatupu i te mau òhipa maitaï e au i te hinaaro o te Atua. Ua tae tēie mau parau i roto i te tariā o Ioane. Ua tonono aè ra oia e piti pipi no te haere e fārerei atu ia Ietu e no te ani i te tahi haapāpūraa. E tēie to rāua reo: **O oe anei te tae mai, e e tiaï anei tatou i te tahi ê.**

Ia au i te irava e faarohia nei, aita te manao o o Ioane e topa. Ua ite o Ioane e te vai nei te hoē taata e tae mai ra i te mea e o oia te taata i tonohia mai no te faaineine i te haereraa mai no te tamaiti a te taata. Ua ite o Ioane i to na parau, i te huru no to na mana, ta na ohipa, aita ra i pāpū ia na tona huru, e mai tei hea to na fāito ia haere mai. Ahiri paha aita oia i roto i te fare tapeāraa, e ite òiò noa oia ia Ietu, i te mea e i roto a rāua i te ôpū o to rāua mētua vahine, i ite ai te tahi i te tahi. A haamanaò atoà na tatou i te taima a haere mai ai Ietu i Ioritana ia pāpetitohia oia. I te atea ā Ietu i parau ai oia: **A hio na i te ārenio a te Atua tei hopoi ê i te hara a to te ao.** Te ite ra ia tātou e e i niā noa i te iteraa atu oia i tēie taata, ua papu to na manaò.

E ui na te manaò : E aha o Ioane i ui ai mai tēie te huru i te mea ua pāpū ia na te taata ta na e tiaï ra.

E parau rahi to tēie parau **e tiaï**. Te parau nei tatou i teie mahana e e mahana tiaïraa, e aore ra te tiaïraa toru. E aha ia te auraa ia parau tatou mai teie te huru.

E rave mai na tatou i te tahi hioraa: Ia parau tatou e e haere ra vau e tiaï i te pereoo mataeinaa e aore ra te pahī. Te faaite ra ia vau e e faaineine vau ia ù na mua no te tahi mea o te tae mai ra, e ara vau i to na haereraa mai, e hiòhiò vau, eita ia vau e parahi noa, eita atoà vau e tiaï noa i te pae poromu e aore ra i niā i te uahu. Te auraa ra, ia tiaï au, e taima òhipa raa te reira na ù, ia tae mai te pereoo e aore ra te pahī, ua ineine te mau mea atoà. E paiuma noa atu ia i niā i teie fauraò. E ara vau ia ore vau ia maïri mai i niā i te vāhi tiaïraa.

Ia hoï mai tātou i niā i ta tātou taiòraa, mai teie atoà te auraa e horoāhia ra e Ioane. Eita e ore e te haapeapea ra oia no te āpee ia Ietu i te mea e tei roto oia i te fare tēpeāraa. Ua ite oia e e te vāhi o ta na e noho ra i tēie taima, aita e òhipa e tano ia rave maoti ra te tiāturi noa raa i te Fatu, te tiāturiiraa i te mau òhipa atoà o ta na i rave mai. I roto i te fare tēpeāraa, e ara oia, e faaineine oia, e tiaï oia, eita ra e noaa ia na ia haere faahou e faaohipa i te parau no te here e te aroha. Ua mau ta na òhipa, areà ra te òhipa a te Atua, eita ia e mau.

Te tiaï noa ra o Ioane i te hoē Metia o tei haere mai e faaora ia na, ia iriti ia na i rapae i te fare tapeāraa, a taa noa atu ai te ohipa faaoraraa mai o

ta Ietu i faatupu i roto i te mau oire rii. Te tia i ra oia ia haere mai o Ietu e hiò ia na, inaha na na i faaineine i to na haereraa mai, ua oti ta na ohipa, eita ia Ietu e rave i ta na tuhaa i nià ia Ioane.

E mai te peu, e ere o Ietu te haere mai, tãpaò ia e aita a ta na ohipa i oti, e imi a oia i te raveà e faaineine ā i te eà o te Fatu. E mea maitai ia ia Ietu ia haere atu e faaite ia Ioane e aita a i tae i te taime , e tia i ā i te hoē o te tae mai.

No tatou, te tiairaa, e taime ia no te araraa, faanahoraa, faaineineraa, e no te faaohiparaa i te here e te aroha o te Atua, faatupu i te parau tià. Teie te mau mea e mito no te taeraa mai no te tamaiti a te Atua io tatou nei. A faaitoito anaè i roto i te tiairaa.

Herehia Orometua

TIAIRAA MAHA

Tāpati 23 no Titema 2001

Taiòraa: Mātaio 1/ 18-25

Irava 20 (v.h): “No te Varua Maitai i hapū ai o ia”

E te mau taeaè e te mau tuahine,

Ia ora nā i te here e te aroha o te Atua i to tātou fārereiraa i teie tāpati. Ia haamaitaihia te Atua tei aratai ia tātou i roto i teie tau no te tiairaa no te haereraa mai o ta na tamaiti here. Ia haamaitaihia te Atua no ta na parau tei faaite ia tātou i to na hinaaro.

No te faatupu i ta na ôpuaraa faaora, ua hinaaro te Atua i te tauturu a te taafa. Te ite ra tātou, te tiāturi atoà mai ra te Atua i te taata no te faatupu i to na hinaaro. Te taata tei ite e ôpuaraa o na na te Atua, e òhie te reira taata i te fārii i te hinaaro o te Atua mai te peu o na terā ta te Atua e hinaaro ra.

I roto i te parau ta tātou e hiò nei, ua maiti te Atua i te tahi tau taata no te fārii i ta na ôpuaraa faaora. Teie tau taata ta te Atua i maiti, te ôpuara rāua e haamau i te tahi ùtuafare āpī. E ia parau anaè hia e ùtuafare āpī, te auraa tei te haamataraa noa ra rāua. Tei roto noa ā rāua i te tuhaa no te momoàraa, o Māria te vahine e o Iotefa te tāne. Tei roto noa rāua i te faanahoraa no te faataaraa te tahi no te tahi.

No te mea hoi te hinaaro o te Atua o te tonoraa mai i ta na tamaiti io te taata rā, ua maiti te Atua ia Māria e ia Iotefa e na rāua e amo i teie ôpuaraa ta na. Aita te Atua i vahavaha i te faanahoraa a te taata: ei tāne e ei vahine e roaa ai te tamarii. Aita te Atua i haapae i teie faanahoraa no ta na tamaiti. Eere roa atu no te faaiti e no te haafaufaaòre i ta na tamaiti no te faaite ra i te taata i te rahi o to na aroha i tono mai ai o ia i ta na tamaiti io te taata ra mai te taata ra te huru i roto i to na maitai e to na paruparu. Parau mau, e faanahoraa ê ta te Atua i rave no te haereraa mai o ta na tamaiti.

I faaara ai te veà a te Atua ia Iotefa: “No te Varua Maitai i hapū ai o Māria”. Teie parau a te Atua, e parau tei tauturu ia Iotefa i te māmaramaramaraa i te òhipa i tupu i nià ia Māria ia òre o ia ia manaò ino i ta na vahine. No te mea e ôpuaraa faaora teie na te Atua, aita te Atua i hinaaro ia fifi teie na taata. Te auraa, ua imi te Atua i te mau rāveà atoà ia tupu teie ôpuaraa ta na ma te òre e faatupu i te fifi i roto i na taata e amo i ta na tamaiti.

“No te Varua Maitai i hapū ai o ia”.

Te haapāpū ra teie parau i te faanahoraa ta te Atua i rave no te faahaereraa mai i ta na tamaiti i te fenua nei. I roto i teie faaararaa a te Atua, te tiāturi atoà ra te Atua e fārii Iotefa i teie ôpuaraa ta na ta te parau e faaara ra. Te mea fifi no Iotefa eere te fāriiraa i teie parau a te Atua, te hiòraa rā i te òhipa i tupu i nià ia Māria mai te tahi ôpuaraa na

te taata. Ia tiàturi anaè o ia e hinaaro teie no te Atua, te mea noa e titauhia ra ia na te fāriira a te ôpuaraa a te Atua e te òaòaraa i te mea ua maiti te Atua ia rāua no ta na ôpuaraa.

Aita atu e mea e titauhia ra ia rāua, te haamauruuruuura a te Atua, o na i maiti ia rāua no ta na ôpuaraa faaora. Te taata tei fārii i te ôpuaraa a te Atua, e taata haamaitaihia te reira. Te taata tei tauturu te Atua i roto i ta na ôpuaraa, e taata haamaitai-atoà-hia te reira.

Te auraa, i roto i teie ôpuaraa a te Atua aita o lotefa e o Māria i faaèrehia i te hoè aè maitai. Te mea ta rāua e fanaò, te reira te mea e manaònaò noa hia ra e te taata tei tiàturi e tei tāvini i te Atua oia hoì te haamaitairaa a te Atua, to na maitiraa i te taata no ta na ôpuaraa. I te reira vāhi, e tiāmāraa te reira no te Atua i te maitiraa i te taata o ta na i hinaaro.

Ia haamaitaihia ra te Atua no to na maitiraa i teie ùtuafare no te amo i ta na ôpuaraa faaora. Eita e òre te Atua i te mauruuru no te mea ua fārii teie na taata i teie ôpuaraa ta na. Mai ia rāua i fārii i te ôpuaraa faaora a te Atua, te reira afoà ta te Atua e titau ra ia tātou. Te taata e fārii i te ôpuaraa faaora a te Atua, te haamau ra te reira taata to na oraraa i niā i te papa.

Ia ora nā.

Tehaapapa TEURURAI òrometua

Mahana Piti 25 no Titema 2001

Pureraa Noera

“E ìte òutou i taua tamaiti ra i te vai-noa-raa i roto i te vairaa māa a te puaa” Ruta èv. 2/12v.h

Te faaìteraa e ua fānauhia te Metia, oia hoì, te Fatu, o te tumu parau faufaa atoà ia i roto i te taiòraa, tei horoà i te hoê hiòraa âpī i teie tiàraa “Metia aore ia Fatu” “e ìte òutou ia na i te vairaa i roto i te vairaa māa a te puaa”. Ua faaìtehia teie parau òaòà e te âfaì parau a te Atua “te merahi a te Fatu”. I “te rui” teie faaìteraa i te tupuraa. E parau atoà rā tei haafānau i te tiàturiraa e te tiaì-turu-raa i te mau ìte matamua “èiaha e mataù”. Ua himene âruehia teie parau òaòà e to te fenua nā reira atoà to te rai.

I mua i te mana haavī a te Hau fenua arataìhia e Taitara Àututo to te Atua tuuraa i te hoê faaora âpī.

Ua incine te rahu a te Atua i te fārii i te Metia ra o te Fatu.

Peterehema te òire o Tāvīta. Te hoì nei ia te ùtuafare o Maria e Iotefa i te fenua âià i tano ai te parau a te perofeta Mita 5/2v.h “*e iti ā òe, e Peterehema Eferata..., e tae mai ra te hoê ia ù mai roto mai ia òe ra o te riro ei tāvana i Ìteraera nei*”. Ua riro te rāveà no te tāpaòraa iòà ei moihaa tei tūrai i teie ùtuafare e hoì i te fenua âià, te fenua tupuna, te vāhi i tāpūhia ai te pito o te tamaiti.

Te Fātene, tei fārii matamua mai ia na, vāhi poiherehia e te mau tiaì māmoe, i te mea ia e, i ò nei te mau ânimara e tāmāa ai. Ua âpiti-atoà-hia-mai-teie-moihaa i roto i te mau rāveà faaora a te Atua.

Te fetià, e tiàrama tūrama i te èà haereraa o te mau ìte matamua.

Ua incine te feiā riirii i te fārii i te Metia ra o te Fatu

To te merahi te tiàraa faufaa roa aè i roto i te taiòraa.

Ua haamanaò ia Maria i te rahi o te here o te Atua ia na, tei arataì i te ôpuaraa e tae atu i to na hopeà. I mua i te haèhaa o te vāhi fānauaa, aita roa o ia i peàpeà.

Ua faaineine te mērahi i te mau tiaì māmoe. Eiaha ia àramoinahia ia tātou e, e pupu taata haapaehia e haafaufaa-òre-hia teie i roto i te tōtaiete. O rātou tā te merahi i faaineine ei ìte matamua roa no teie faaora âpī.

Ua faaara i te ôpuaraa faaora a te ATUA, “ua fānauhia te Ora oia hoì te Metia ra o te Fatu”, i hea “i te òire o Tāvīta”, o vai te fānaò i teie ora “te taata atoà” te òhipa ta na e faatupu “e òaò te taata atoà”, te tãpaò faaìte “e tamaiti, vai-iho-hia i roto i te vaira mā a te puua e ua vehihia i te àhu”.

Te ìtera tātou e, nā te merahi iho e faahoì mai nei teie tiàraa “Metia e Faaora” i nià i te tamaiti e vai ra i roto i te fātene. Teie tiàraa faaora no to te ao tei mauhia na e te Atua, ua pupu hopehia i teie mahana i roto ia Ietu, te hoê tama oraraa haìhaì e te veve. Emanuera, te Atua io tātou nei.

Te taime a fānauhia mai ai teie tama “i nàùanei” aore ia i teie mahana, e haapāpūraa te reira no te hoperaa o te hoê tau, te morohi atu ra te uì o Taitara Àututo o ia tei amo mai na i teie tiàraa “metia e faaora” mā te pūai e te mana no te haavī i te nūnaa.

I teie mahana, ua veteà te mahana âpī, âpitihia mai e ta na faufaa faaâpīraa e te mau mea tei òre roa i ìtehia i mūtaa iho ra.

O vai tē fārii e, e faaìte te Atua ia na iho i roto i te hoê tamaiti veve, vai-iho-hia i roto i te fātene, teie Atua tei rahu i te mau mea faahiahia o teie nei ao.

Te tū ra ānei te fānauraa ia au i tã Ruta faaìteraa e te huru Noera e orahia nei i teie mahana.

Ia hiòhia i teie mahana, ua haamoèhia te hiroà fānauraa o te tamaiti a te Atua i roto i te mau ùnaùna tei haamoèmoè i to te ao nei. Ua tãpoìhia te faaìteraa a te Evaneria tei haapāpū e, ua fānau-veve-hia o Ietu e ua ora, mai roto mai i te haavīraa a Herota. Eere te âmaa àito te tià ia faaùnaùnahia, o te tãtauro rā. I te mahana a fānauhia mai ai te faaora o to te ao, ua faataa-atoà-hia to na pohe tãtauro i tano ai te piiraa “te Metia te Fatu”.

No reira e hoa here mā,

I roto ia Noera, ôroà haamanaòraa nā tātou i te fānauraa o te Metia, eiaha ia moèhia e fētii teie ôroà no te pohe e te tià-faahou-raa o te Metia.

Eere tã tātou tuhaa no te faahanahana noa i te hoê ôroà, no te fārii faahou rā i te Atua i roto i to na haèhaa, o ia i haere mai e haamanaò ia tātou i te feiā riirii, te feiā òto, tute-ê-hia, aita e nohoraa, te feiā atoà e ora nei i roto i te mau haavīraa rau a te mau mana o teie nei ao.

Mai te peu te vai nei-tē òto i te fenua nei te faahiroà mai nei Noera e te vai atoà ra te faaora.

Mai te peu te vai nei te pohe, te vai atoà ra te ùputa o te ora âpī.

Mai te peu te tiàturi nei tātou e ua māmū te Atua, te faaara mai nei Noera ia tātou e, ua horoà mai te Atua i ta na tamaiti fānau tahi no te faaora i teie ao ta na i here.

Ia maitaì i teie Ôroà Noera.

Taoàhere Vahine

Monire 31 no Titema 2001

Pureraa Pō Matahiti

Te mau taiòraa: Taramo 103 ; Itaia 40/1-11

TUHAA MATAMUA: Taramo 103/1

**‘E haamaità i te Atua Tumu Nui, e ta ù varua,
e to roto ia ù nei, e haamaità i to na ra iòà moà.’**

I te utu o teie matahiti e hemo nei ia tātou, te titau nei te pāpai Taramo ia fariu tātou i to tātou aro e to tātou manava i te Atua Tumu Nui. I teie taimē e taaē ai ta tātou taiòraa i to tātou puè tau i te ao nei, te horoà mai ra te pāpai Taramo i te tahi raveà iti tauturu ia tātou, tātou ihoā rā e uiui ra i roto i to tātou feruriraa e, e aha rā ta ù e rave, e aha rā ta ù e faanaho i teie pō ei tapaòraa na ù i teie tauraa taiò matahiti.

Te na ô ra te tahi papaì Taramo i te ui e: ‘ e aha rā ta ù e hopoi i te Atua Tumu Nui, no te mau hamani maità rahi na na ia tātou nei.’

Te pāhono òiò ra ta tātou taiòraa, i te irava matamua: ‘E haamaità i te Atua Tumu Nui, e ta ù varua, e to roto ia ù nei, e haamaità i to na ra iòà moà.’

E reo teie no te arii ra o Tavita. Peneiaè tei nià o ia i to na parahiraa e te feruri ra i te huru no to te Atua aratairaa mai ia na e to na nūnaa, i roto i te mau taimē fifi e te àti rahi, e tae noa atu hoì i te mau taimē òaòà e te hau. Ua tae roa i teie taimē e parau ai o ia i roto ia na iho e: ‘E ta ù varua, e haamaità i te Atua Tumu Nui, e to roto ia ù nei, e haamaità i to na ra iòà moà.’ Eita e òre ua î to na âau i te òaòà e te manaò mehara, i tahe noa ai ta na parau haamaità i te Atua. Oia mau, i te roaraa o teie Taramo, aita to na manaò i faaea i te haamaità, te haamauruuru i te tumu o to na ora, te tumu o to na maità. I parau ai o ia i te irava 2:

'e haamaitaì i te Atua Tumu Nui e ta ù varua, e eiaha te hoê maitaì a na i horoà mai ra e haamoèhia.'

Aita o Tavita i hinaaro ia moèhia ia na te maitaì o te Atua, no te mea, to na manaò tumu, ia ìte e ia faì to na nūnaa taatoà na mua roa e te mau nūnaa atoà hoì i raro aè i teie raì e, **'E Atua aroha e e hamani maitaì mau to te Tumu Nui, e Atua tei òre e riri vave, no te rahi o to na aroha'** (irava 8). E Atua atoà hoì tei hiò aroha noa i te taata, tei faaòre i te hapa a te taata, tei faaora i te taata i to na mau maì atoà e tei mau i te parau no te ora e te pohe o te taata (irava 3).

Ei haapāpūraa i te huru o te aroha o to na Atua, ua rave o Tavita i te parau o te rahu iho a te Atua. Te na ô ra to na reo i te irava 11: **'mai te teiteiraa o te mau raì ra i nià i te fenua nei, mai te reira te rahi o te aroha o te Atua i te feia i tiàturi ia na.'** Te auraa, te faito rahi roa aè tei roaa ia Tavita i te rave e tei roaa atoà hoì i te ìte taata o to na tau, o te rahu iho a te Atua, te rahu i roto i to na taatoàraa. Ia parauhia te raì e te fenua, te ìte atu ra ia tātou i te mau mea atoà e vai ra i nià aè, i nià iho, i roto e i raro aè i te raì e te fenua. Te auraa ra, aita hoê aè taoà, aita hoê noa aè animara, e aita hoì e taata i raro aè i te raì nei i òre i tae-aè-hia e te aroha hamani maitaì o te Atua.

No te taata i manaò e, aita te Atua i aroha mai ia na, aita te Atua e tauà ra ia na, rave noa ai o ia i te tahi òhipa ino, haere noa ai o ia i to na eà mā te manaònaò òre i to pihai iho ia na, te haapāpū ra te papaì Taramo, oia hoì te arii ra o Tavita e, ua ineine noa te Atua i te farii i te taata i hinaaro i te hoì ia na ra. Ua ineine o ia i te âupuru e te àtuàtu i te taata e paremo ra e e moè ê atu ra i raro aè i te teimaha o ta na mau hara. Oia mau, te na ô ra o Tavita i te irava 12, **'mai te hitiâ o te rā e taaê i te tooâ o te rā, ua ineine noa te Atua i te faataaê i ta tātou hara ia tātou nei.'** E aha ia e òre ai e roaa te manaò haamaitaì i terā huru Atua, tei rave i te huru o te metua tei here i ta na mau tamarii no te faaite i to na aroha faito òre i te taata nei.

Ua ìte pāpū o Tavita e, e paruparu mau â to te taata. Ua ìte

atoà o ia e, e taime poto mau â tei horoàhia e te Atua no te taata no te huti i te aho ora, e taime tei faitohia i te huru o te tiare tei ôteu i te poìpoì e tei maheahea i te ahiahi ra. E taime atoà hoì tei faataipehia i te aihere e tupu maitaì i te poìpoì. Ia hitihia rā e te rā e ia taataahihia, ia tae anaè i te taharaa mahana, ua marô e moè ê atu ai i te tuiraa o te pô.

No reira, ia faaau Tavita i te parau o te taata i te aroha mutu òre o te Atua, e matara maitaì te taaêraa e vai ra i rotopū i te raveà a te taata e te raveà a te Atua. I tano ai te parau a te Taramo 8 i te irava 4 i te na ô raa e, **'e aha hoì te taata nei, i manaò mai ai te Atua ia na, e te tamaiti hoì a te taata i haapaò mai ai te Atua ia na.'**

I teie taime tātou e mata ai i te hiò i te mau òhipa, te mau parau, to tātou hoì huru i te roaraa o te matahiti i raterehia mai e tātou, aita atu e parau e tià ia tātou ia faahiti, o teie ia parau ta Tavita : **'E haamaitaì i te Atua Tumu Nui, e ta ù varua, e to roto ia ù nei, e haamaitaì i to na ra iòà moà.'**

Oia mau, e haamaitaì tātou i te Tumu o to tātou nei oraraa, no ta na faaherehere ia tātou, no te mau òhipa maitaì ta tātou i rave, no te aho ora ta tātou e huti tāmāu nei e tae roa mai i teie mahana. E tāmāu atoà tātou i te haamaitaì ia na i teie tau āpī ta tātou e fatata nei i te tomo. Ia riro â o ia ei Atua mau no tātou e ia riro noa â tātou ei mau tamarii tei arataìhia e ana, e mau taata tei hinaaro i te faatupu i to na hinaaro i te fenua nei. Na to tātou mau reo, ta tātou mau parau haamaitaì ia na e haapāpū i te feia tei òre i ìte e, e Atua aroha mau to tātou, e Atua hamani maitaì to tātou e ua ineine noa o ia i te faaite i taua aroha e taua hamani maitaì no na i te feia atoà tei tuu i to rātou tiaturiraa i roto ia na e ia na anaè.

'E haamaitaì i te Atua Tumu Nui, e ta ù varua, e to roto ia ù nei, e haamaitaì i to na ra iòà moà.' Ia ora na.

TUHAA PITI: Itaia 40/3

**‘Te pii mai ra te hoê reo i te metepara:
a faanehenehe na i te eà o te Atua Tumu Nui,
e faatitiàifaro na i te fenua marō
i te haereà o to tātou Atua.’**

E mea pinepine tātou i te faaroo e te tuatāpapa i teie taiðraa i te ârea no te tau Tiaïraa, te tau faaineineraa i te ôroà haamanaðraa i te Fanauraa o Ietu, te Imanuera a te Atua. Inaha, e reo teie no te perofeta ra o Itaia, tei tohu i te parau no te haereà mai o te Metia. I teie tau minuti hopeà e toe ra e ô atu ai tātou i roto i te tau âpī, te tuuhia mai ra teie parau a Itaia ei haaferuriraa ia tātou i te huru oraraa ta tātou i ratere mai i te matahiti e mahemo roa atu ra e no te faatoro atoà hoì i to tātou manað i te matahiti e iritihia ra i mua ia tātou.

I tano ai teie taiðraa no tātou i teie pō hopeà, no te mea ia, i te taime a faahiti ai te perofeta Itaia i teie parau, tei roto atoà te nūnaa a te Atua i taua huru faanahoraa taime. Oia mau. Ua hoì faahou te pae rahi o te mau ati Iuta i te fenua o te tapu, i muri aè i to rātou parahi-maoro-raa i te fenua Papuronia. Tei nià rātou i te fenua âià e ua mātaitai rātou i te mau tauiraa rahi i tupu e aore ra i faatupuhia e te mau hau i haru i te fenua Paretetina e te tauiraa atoà i tupu i nià i te huru o te feia i parahi noa na i te fenua âià. Te tahi atoà hoì òhipa i tupu, ua pārāri te mau âua e ua nīnāhia te hiero o Ierutarema tei riro na ei pū haamoriraa e ei teðteðraa rahi na rātou. Ua riro na hoì te hiero o Ierutarema ei tapað ìte-mata-hia e ei haapāpūraa na rātou i to te Atua parahiraa i rotopū i to na nūnaa, mai te arii hoì i riro ei tapað ìte-mata-hia no te aratai i te nūnaa. I to rātou rā hoïraa mai na Papuronia, aita faahou taua tapað e aita atoà hoì e faanahoraa huiarii faahou. Ua vai rātou mai te ôvere ra te huru, ua topa te manað. eita e òre, ua uiui noa na rātou i taua area taime, e ua na ô noa ra rātou i roto ia rātou e, e aha rā mātou, e na hea rā mātou.

I faauè ai te Atua i ta na perofeta ia poroì i to na nūnaa e: ‘E tāmahanahana i to ù ra mau taata, te na reira mai ra to òutou Atua. E faaitoito atu òutou ia Ierutarema, e parau hua atu òutou ia na, ua hope to na tau tamàiraa ; ua farihia te tarae hara i ta na hara; ua noaa hoì ia na te pohe au rahi roa i ta na ra mau hara i te rima o te Atua Tumu Nui.’

Mai te peu ua tāmāhia te hara a teie nūnaa, i mua i te mau mea atoà e haaati ra ia na, i mua i te mau vāhi parari o te oraraa, i mua i te mau ôfaì ta te âau teòteò i haaputu, te horoà ra te perofeta Itaia i te tahi tapura òhipa pāpū maitaì :

**‘a faanehenehe na i te eà o te Atua Tumu Nui,
e faatitāifaro na i te fenua marō
i te haereà o to tātou Atua.’**

E au ra e, i mua i te nūnaa, e metepara rahi teie e vai nei e te titauphia nei o ia ia faariro i taua metepara ra mai te hoê ô heeuri maitaì, te hoê âua tei î i te mau tiare e te mau māa hotu huru rau.

I teie mahana, no te feia tanu māa e faaapu tiare, e faaueraa ôhie roa teie: e faanehenehe i te eà, e tanu te tiare na te hiti poromu, e haamau te tahi mau taheraa pāpe i te tahi vāhi aita â i ìtehia atu ra te pape i te pīhaaraa. Ua riro teie huru faauèraa ei tāpaparaa na te taata. O ia atoà te parau no te hamaniraa poromu. I teie mahana, aita e vāhi e òre i tae-aè-hia e te mau mātini no te tūrai i te repo, te heruraa ôfaì, te tapuraa mouà, te faaāraa i te mau roto. Maoro noa te parau faatià i te roaa mai, e aore ra, aita e tiairaa i te parau faatià. Ua hinaaro anaè, ua rave. O te reira anei rā hoì te auraa o te tītauraa ta te Atua i horoà i ta na perofeta ra ia Itaia....

I teie matahiti, ia au te tumu parau i mātihia no ta tātou mau rururaa (òrometua, tiàtono, etārētia, ui àpī, tuahine, ...), ‘Te eà o te Parau Tià o teie nei Ao’, te tuatāpapa ra tātou i teie parau ta Itaia (40/3-5) mā te tāpiri atoà i te parau a Ruta Evaneria (3/4-6). I roto i te tatararaa a te Tōmite Rautī, te riro nei teie parau a Itaia eiaha noa ei tapura òhipa i horoàhia na e te Atua na te nūnaa Iteraèra, ua riro atoà rā ei ‘tāpura òhipa atoà ta na i faataa na te

taata i nià i te fenua i reira to te Atua haaparahiraa ia na...' [Te Eà o te Parau Tià o teie Ao, (Arue-Tāmahana:EEPF, 2001), àpi 9.].

E aha taua tapura òhipa. E piti tuhaa pāpū maitaì ta te irava e horoà ra: te parau ra o Itaia e:

- 1) 'a **faanehenehe** na i te eà o te Atua Tumu Nui',
- 2) 'e **faatitiàifaro** na i te fenua marō i te haereà o to tātou Atua.'

A taa noa atu te mau manaò ta te mau rautī e horoà ra i nià i nā parau e piti (Te Eà o te Parau Tià o teie Ao, àpi 9-27), te mea faufaa no tātou i teie tau minuti hopeà e toe ra, o te faāraa ia i mua i te aro o te Atua i to tātou paruparu e ta tātou raveà òre no te pāhono i te mau titauroa atoà i tuuhia mai ei tapura òhipa na tātou i roto i to tātou oraraa faaroo e i roto i te roaraa o te matahiti e hope nei. E haamaitaì atoà rā tātou i te Atua Tumu Nui no te mau òhipa rii i maraa ia tātou i te rave, ei tautururaa i to tātou mau taata tupu, to tātou mau utuafare, ta tātou pāroita, ta tātou âmuiraa, ta tātou Etārētia....

I te utu o te matahiti âpi e hohorahia mai ra ei haereà âpī no tātou, te titau mai ra te Atua ia vaiiho tātou e na na aè e arataì ia tātou, e ia riro tātou ei hoa rave òhipa no na i roto i te faatupuraa i to na hinaaro i te fenua nei, ia hanahanaha noa â o ia e ia maitaì noa â o ia i te roaraa o teie matahiti e i te mau tau atoà.

Ia ora na i te matahiti âpī.

Emma Faua-Tufariua

Pureraa matahiti âpī

(01 no tenuare 2002)

Itaia 43/ 1-7

“eiaha e mataù, ua faaorahia òe e au, na ù i mairi i to iòà na, no ù òe”

E hoa ino mā e, i te òmuaraa o teie nei matahiti, ia haamaitahia te Atua no ta na tiaì e no ta na hamani-maitai ia tātou inaha ua faatomo mai o ia ia tātou i teie matahiti âpī 2002.

To tātou tiātuiraa i te Atua, ia riro ia teie matahiti ei matahiti òaòà e te hau no te mau nūnaa o teie nei ao. I mua i te mau tamai i tupu iho nei tei tuu hoì i te tahi pae rahi o te mau fenua i roto i te ahoaho, e te mau ùtuafare i roto i te peàpeà no tei faaruè mai, te ani nei tātou i te Atua ia òre roa te reira.

No tātou nei te nūnaa faaroo e tano ia tātou ia hiò e, e nahea i te faatereraa i to tātou nei oraraa ia òre roa teie mau òhipa riàrià ia ia tupu atoà mai i nià i to tātou fenua. No te mea, i tupu ai te ino, no te hinaaro ia o te taata. E ère roa atu rā te reira i te hinaaro o te Atua. No reira, tei ia tātou te faaitoitoraa i roto i to tātou mau ùtuafare, i roto i to tātou mau motu, mau òire, mau aroā te mau vāhi o ta tātou e noho ra ia arai-roa-hia te tupuraa o te ino ia upootiā rā te maitai e te ora no te mea o te tuhaa ia ta te Atua i ani i te taata ia rave. Ua hinaaro te Atua i te taata no te faatupu i te ora e no te faarahi i te maitai.

Nā roto i te vaha o te perofeta, te hinaaro nei te Atua i te faaite ā ia Iteraèra i to na here mutu-òre. Te riro nei teie reo e faaroohia nei i teie poipoì mai te tahi parau fafau o ta hoè Metua e horoà nei i ta na mau tamarii o ta na i here mai to rātou pūraa mai i teie nei ao.

E teie to na reo, tei maitihia mai ei parau feruriraa na tātou no teie mahana :

“eiaha e mataù, ua faaorahia òe e au, na ù i mairi i to iòà na, no ù òe”

Mai te mea e parau teie tei horoàhia i te nūnaa Iteraèra i te tau o te perofeta Itaia, e tano atoà ia tātou e i te mau nūnaa o teie ao i fārii i te Atua ei Atua atoà no rātou ia faaroo i teie reo i te òmuaraa no teie matahiti 2002.

“eiaha e mataù, ua faaorahia òe e au, na ù i mairi i to iòa na, no ù òe”

E ère ānei o te Atua iho teie e mataùhia nei e Iteraèra, no te mea, o te huru Atua ia i matauhia e ana, o ta na atoà hoì i mataro i te faaau i te hoè atua naeà-òre-hia e ana ia hiò e ia parau atu e aore ia, ia haafatata atu. E inaha, teie Atua ua hinaaro ia i te haafātata mai i te taata.

E ère atoà ānei no te rahi o ta na hara i noaa ai ia na te mataù i te riri tāhoo o to na Atua. Ua ite hoì Iteraèra e aita atu e rāveà e matara ai te reira, maoti, te aroha hoo-òre o to na Atua.

No reira, te riro nei teie reo mai te tahi piiraa i tei parahi noa i roto i te mataù ia tauì e ia faaāpī i ta na hiòraa i to na Atua. Inaha, te faaāpī nei te Atua i te tuātiraa i roto ia na e to na nūnaa. E ère faahou atu ra i te Atua naeà-òre-hia, e Atua rā tei haafātata mai e tei noho mai i rotopū i te taata.

Nā roto i teie huru tairaa reo, “eiaha e mataù” te ite nei tātou e, te hinaaro nei te Atua i te haapāpū ā i mua i te aro o te taata i to na huru mau, eiaha rā i terā i ta te taata i mataro noa i te faaite.

E tano ai ia tātou ia ui e, e aha rā te huru atua ta tātou e tiāturi nei e e tāvini nei? E riro paha tātou i te parau e, e aha huru uiraa. Eita e tano e tano i te taata faaroo no te mea ua pāpū to na tiātuiraa te tiāturi nei o ia i te Atua. Te Atua ta te Pīpīria e faaite ra, te Atua o Iteraèra, te Atua o Aperahama, O Itaata o Iatopa. Oia mau, o te reira atoà rā te huru o Iteraèra i mua i te mau faaararaa a te mau perofeta e i mua atoà i te mau parau a te Fatu. E aha atu ra tei noaa ia rātou, maoti rā, aore roa rātou i ite i te Atua no te mea, aita i fārii i te huru mau o te Metua i faaitehia mai e te Tamaiti.

Eita e òre e te fifi i teie mahana, e ère no te mea ua iti te faaroo e te tiātuiraa, no te mea rā, ua rahi te huru atua i hamanihia e te taata faaroo. Oia hoì, ua hinaaro te taata o teie tau, mai tei tupu atoà na i te mau tau aotà, i te hamani i te atua e faaroo noa i ta na parau. E rave noa i ta na faaueraa. Oia hoì, e Atua tei auraro i te hinaaro o te taata.

Ia hiò anaè tātou i te mau tamaì e tupu nei i roto i teie nei ao. E aha te tiāraa o te Atua i roto i taua mau tamaì ra. Òre noa atu ai te Atua i riro ei tumu no teie mau àti, ua hinaaro te taata i te òmo i te Atua i roto roa e ia riro o ia ei tumu faatiā e paèpaè i te raveraa a terā e terā hau (patireia).

Te riro nei te tiātuiraa atua ei mauhaa tamaì rahi riāriā tei hau e te pūai i te mau mauhaa àravahi o teie nei ao.

Te faaòhipa nei te mau hau (patireia) i te tiàturiraa atua o to rātou mau nūnaa no te paèpaè i ta rātou poritita. Aita tātou i ère i te reira atoà huru raveraa.

E tano roa atoà ia uihia te nūnaa faaroo no teie mahana, eiaha i nià i to na tiàturiraa, i nià rā i te Atua o ta na e tiàturi nei.

Te haapāpū nei teie reo e, o te Atua te tumu o te ora e tei ia na anaè te tupuraa o te ora. Aita o ia i hiò i te fāito o te ino na mua roa, a rave i te faaotiraa e, e tano ānei ia faaorahia Iteraèra ? Ua faaora rā ia na no te mea, o te mea faufaa ia i ta na hiòraa. E Atua hoì o ia no te ora. E ère rā i te Atua no te pohe.

Te haapāpū atoà nei teie reo e, aita ta te taata e tuhaa i roto i teie faaoraraa ia Iteraèra. Rave noa atu ai te taata i te òhipa, e imi noa atu ai o ia i te rāveà ia ora o ia, na te Atua ihoā rā e faaora. Te auraa, no teie haapāpūraa ia ite ia te taata e, eita e tiā ia na ia faaoti i te parau no te ora o te taata. Oia hoì, te ora o te taata i mua i te aro o te Atua, to tātou tiāmāraa i mua i to na aro, to tātou tiāraa ei mau tamarii faatavai nā na, fānauhia i roto i to na here Metua. Teie rā, eiaha atoà tātou e manaò e, aita te Atua e hinaaro nei i te taata no te faatupu i te ora i roto i teie nei ao. E hopoiā te reira ta te Atua i horoà matamua roa i te taata i te matahurahura o teie nei ao. Te òhiparaa ia tupu noa te ora ei haamaitairaa nā na i to na Atua.

Mai te Metua i haapāpū i to na tiāraa metua i mua i ta na mau tamarii, ua hinaaro atoà o ia ia haapāpūhia te tiāraa o ta na mau tamarii i mua ia na. Te mairiraa i te iòa o te faufaa matamua roa ia ta te hoè metua e horoà i ta na tamarii. E i roto i taua iòa ra to na haapāpūraa i te taāmuraa o teie tamarii i te hui metua no reira mai o ia. Te iteraa i te faufaa e te auraa o te iòa i horoàhia .

Te vāhi fifi, i te mea ia e, te faaau-òre nei te tamarii i te tahi taima i te iòa i horoàhia no na. E aita te reira peu i faaea noa i nià i te tamarii, ua tae roa atoà rā i nià i te mau nūnaa tei faahinaaro i te iòa o te tahi. Mai te mea te riro nei te iòa ei faufaa ta te metua i horoà, te faaite noa mai ra ia teie huru i te au òre e te tiàturi òre i te metua. E ère hoì te reira huru i ta tei òaòa i to na tiāraa tamarii e aore ia i ta tei fārii i te hinaaro o te metua.

Aita atoà hoì e tamarii e horoà noa i te iòa no na iho. E tuhaa rā te reira nā te metua no te faaite i ta na hopoiā metua i mua i to te ao.

Te piiraa i te hoê mā to na iòà, te faaite noa ra ia i to tātou faatura i te reira taata. Te piiraa i te tamarii mā to na iòà, o te fārii-atoà-raa ia i te tiāraa taata o te tamarii.


E ère ānei o te reira te tahi fifi rahi i roto i to tātou oraraa vaamateinaa i teie tau, to te mau tamarii èreraa i te faatura a te feiā metua. E ère tei roto noa i te raveinoraahia, ua haamata rā i roto i ta tātou huru iteraa ia rātou ei taata hinaarohia e te Atua no te faaite atoà i to na hinaaro i roto i teie nei ao. E mea pinepine rā te reira i te moèhia i te feiā metua. Te uiui noa nei te totaiete i teie mahana e no te aha rā teie huru tupuraa o te ino i nià i te fenua ? E ère ānei no te mea, ua moè atoà-hia i te mau metua e no hea mai rātou.

Te ite atoà ra tātou e aita te Atua i faaea noa i nià i te toparaa iòà, ua hinaaro atoà rā i te haamanaò ia Iteraèra e, e nūnaa o ia no teie Atua. Te auraa, o te Atua na mua roa tei tītau ia Iteraèra. E ère rā o Iteraèra te tumu i riro ai o ia ei nūnaa tei mātīhia e teie Atua. E ère hoì no te mau òhipa maitatai i ravehia e ana i riro ai o ia ei nūnaa hinaarohia e te Atua. Eiaha hoì ia moèhia e, no te fenua è mai o ia i te iritiraahia mai. Te auraa no tātou i teie mahana, mai te mea te tiāturi nei tātou e, e nūnaa atoà tātou tei hinaarohia e te Atua, e ère ia no to tātou huru e aore ia no to tātou maitai, no te mea rā e hinaaro te reira no te Atua. E ère atoà hoì teie i te parau no te hoê noa nūnaa, e parau rā no te mau nūnaa i roto i teie nei ao.

I te òmuaraa no teie tau āpī, e mea tiā ia faaroo atoà tātou i teie nei reo, *“eiaha e mataù, ua faaorahia òe e au, na ù i mairi i to iòà na, no ù òe”* ei haamanaòraa na tātou i te maitai fāito òre o te Atua i te taata nei.

Ia haamaitai mai te Atua ia òutou atoà na i teie matahiti āpī ia horoà mai i te itoito no te faatupuraa i to na hinaaro e i to na hau i te vāhi tei reira òutou i te oraraa.

Taarii òrometua.



Ētārētia Ēvaneria ĭ Porinetia Farāni
VEÀ ÒROMETUA

Ēpitolore pāpaihia ci faaitoitoraa
 e ci lāamuraa i te mau lāvini o te Atua
 tonohia e te Ētārētia

N°1 / 2002

Papeete, i te 6 no mati 2002.

RECU LE
 19 MARS 2002

RATA HAAATI

I te mau òrometua e vai i roto i na Tuhaa e
 8 o te Ētaretia evaneria i Porinetia farani.

Te aroha ia rahi i teie matahati 2002.

Terā mai ta tatou mau hohoà poroi no ta tatou mau Oroà pureraa i muri nei (i faaineinehia mai e te tahi mau taeaè, o ta tatou e haamauruuru maitai nei) :

1) Hepetoma moà :

- Tapati no te mau Amaa (Oroà Euhari – Tapati 24 no mati)
- Monire 25 no mati
- Mahana piti 26 no mati
- Mahana toru 27 no mati
- Mahana maa 30 no mati
- Tapati no te Tià-faahou-raa (Oroà Euhari – tapati 31 no mati)

2) Revaraa (Oroà Euhari – mahana maha 9 no mē)

3) Penetetote (Oroà Euhari – Tapati 19 no mē)

Te haamanadhia atu nei outou e, i pihai iho i te mau pureraa ahiahi atoà no te Hepetoma-moà, e pureraa Faraita Poheraa e te Haapaeraa ta tatou, o te haamata mai te hora 8 i te poipoi e tae atu i te hora 2 i te avatea. No reira, iā faaineine-maite-hia taua Oroà pureraa ra no to tatou tiāturi i te faufaa o ta tatou aroraa no te tupuraa o te hau, e te parautiā, e te aroha i ô tatou nei e i roto i teie nei ao.

Ia itoito e ia oaoa noa i roto i te parau no te taviniraa.



Terai a IĒORAI Òrometua

TOMORAA HANAHANA NO
IETU I IERUTAREMA

Taio raa : Evaneria a Mataio 21/ 1-11.

Irava tumu : Irava 2 Vahi Matamua – Irava 9 Vahi Ropu.

« ... E haere orua i terâ ae'ra oire iti, e ite orua i te
hoê atini... Hotana te Tamaiti a Tavita, ia ora oia i tei haere
mai mâ te io'a o te Fatu... »

To te huifaaroo, Te Aroha ia rahi !

Teie mai nei tatou i teie tapati, e iriti ai tatou i te parau no te hepetoma mo'a na roto i to letu tomoraa i lerutarema. Eere teie parau na tatou i faanaho. Na te Atua râ, no to'na hinaaro e faatupu i ta'na opua raa faaora no tatou te taata nei. E mai te mea ra, mai te tau tahito mai â, mai te tau no te mau patereareha, haere mai ai i te tau no te mau haava, puoi mai ai te tau no te mau arii e tae roaa mai ai i te tau no te mau perofeta, aita taua opua raa ra na te Atua i tupu. Na te tau no te Faufaa Api, te tau no te Fatu, te tau no to'na tonoroa raa mai ta'na iho Tamaiti, i tupu ai taua opua raa. Ia hi'o hia, mai te mea râ, na te Atua iho i opua, e na'na atoa râ i faatupu. E te tupu raa no taua opua raa ra, e haamata ia na roto i te parau no to letu tomo hanahana raa i lerutarema o ta tatou e hi'o e e ora amui nei i teie tapati. Ia faahiti hoi tatou i teie parau, oia hoi, no to letu tomo raa i lerutarema, e ere ia no te mea e, a tahi roa râ ia taime a haere ai letu i roto i teie oire. Aita roa'itu ia ! No te mea râ, no te huru faanaho raa no to'na tomo raa i lerutarema, mea taaê roa ia. Taaê i nia i te auraa e , te rave'a ta'na i faaohipa, eere faahou ia, mea na avae i te haere, mai ta'na i na reira noa na. Mea na nia râ i te tua o te hoê animara oia hoi, te atini. Taaê atoa i nia i te huru tomo raa. Ua vauvau hia te mau amaa raau i n'ia i te e'a .

Ohipa hoi tei ore roa i ravehia i te mau taime a tomo ai oia i lerutarema. Taaê â i niâ ia i te huru o te taata. Mai te mea râ, ua faaite ratou i to ratou oaoa rahi na roto i te tuô raa e, « Hotana i te ra'i teitei... » Aita te taata i faaea mo'emo'e faahou. Aita i mamu faahou. Ua faaite râ i to ratou huru farii raa i te Fatu.

Ia hoi tatou teie nei i nia i te parau no te rave'a ta letu i faaohipa no to'na tomoraa i lerutarema, mea na nia ia i te tua o te hoê atini. E ite tatou i te huru maere rahi no to letu hinaaro e rave i te atini ei faurao ae no'na. E mai te mea ra, ua faanaho atea hia teie parau. Ua ite ae na oia e, te vai ra i te hoê vahi, te tahi atini, ta'na e hinaaro râ, na roto i te faaue raa ta'na i horo'a i roto i na pipi ia au i te irava 2 i te vahi matamua tei na ô mai e «... e haere orua i terâ ae'ra oire iti, e ite orua i te hoê atini... » Aita teie faaue raa na letu i hape. Ua tupu mau râ mai ta'na i parau. Eaha hoi e ore ai ! mai te peu e, o te Atua atoa iho i roto i teie parau no te faaineineraa i teie rave'a iti, eiaha ia tatou maere. E tupu ihoa te mea ta'na e hinaaro. Ua putô hia mai ia letu râ.

Aita hoê ae manao pato'i i faaroo hia no roto mai i te Fatu o te atini. Hau roa'tu te reira, eita tatoue ite e, ua faaho'i hia râ anei te atini i to'na Fatu ra. Te auraa, te horo'a a te Fatu atini, aita oia i titau ia faaho'i faahou hia mai tana atini. Aita roa'tu ! E horo'a papu râ. Ua ite oia e, ia au i te parau a na pipi tei haere e tii i te atini, te Fatu iho terâ opua raa a te Atua. Auê ia Fatu atini i te maitai e ! E inaha hoi, e animara noutou hia hoi teie e te mau Ati-luta i te tau no te Fatu, no te tietie raa i ta ratou mau toihaa, mau maa etv... Aita teie fatu atini i uiui iti noa'e no te fifi o ta'na e farerei ia horo'a oia i ta'na atini. Eita e ore e, ua maururu noa â oia no te mea, te vai râ te fanau'a atini. Mai te peu e, ua nahonaho te atini no te afai ia letu i roto i te oire no lerutarema, ua ite hia te huru o te taata na roto i te irava 9 vahj ropu « Hotana te Tamaiti a Tavita, ia ora oia i tei haere mai mâ te io'a o te Fatu... » Aita â te nunaa i te tuô ae nei mai teie te huru maori râ, no letu anae. Te mea e uiui i ô nei maori râ, to ratou ia parau raa ia letu, ei Tamaiti a Tavita e aore ia, ei Fatu. Eita e ore no te pae rahi o te nunaa, ua papu ia ratou i teie nei e, teie i mua ia ratou te taata no ô mai i te Atua ra, no roto roa mai i te opu huiarii no Tavita o tei amo i teie nei i te tia raa Fatu ta ratou i faaroo na roto i te mau ohipa ta'na i rave, te mau tapao e rave rahi ta'na i faatupu. Ia hi'o hia , mai te mea ra, ua hinaaro ratou i te faateitei roa ia letu, ia tapao hia to'na parau i roto i te aai o to ratou ora raa, mai tei na reira hia i te tau no Tavita. Ia hi'o hia te huru tupu raa no to letu tomo raa i lerutarema, eita tatou e manao e, e tupu mai te hoê ohipa huru ê i muri mai. E hape hia e, e ohipa papu tei rave hia e te nunaa na roto i to ratou huru, na roto i ta ratou parau, na roto i te mau tapao ta ratou i rave, na roto i te rave raa i te mau amaa raau ei faaite raa i to ratou oaoa e te mauruuru rahi i teie Tamaiti na te Atua tei tomo i roto i to ratou oire. Eita e ore e , e manao tatou e, ua tomo papu aota te varua o taua Fatu ra i roto i to ratou aau, mai ia letu i tomo papu atoa i lerutarema. E ere te parau no to letu tomo raa i lerutarema i te hoê parau haavarevare. E parau papu râ. E haamata te ohipa faaora raa i to teie nei ao na roto i teie oire no lerutarema, te oire e haaputuputu ai te mau tamarii tei tiaturi hia e, na te Atua ratou. E ite tatou i te mau tauraa rahi e tupu i roto i te roa raa no te hepetoma o ta tatou e haere atu nei. Te poro'i raa e tapea mai mai roto mai i ta tatou na irava tumu teie ia : « Te lerutarema i teie tau, o to tatou ia aau, to tatou manao, ia tomo atoa hia ia e te varua o te Fatu, i to tatou na reira raa, e tura'i te reira ia tatou i te fâraa ia letu, ei Fatu. »

Ia maitai outou i teie tapati no te mau amaa.

Tauira Marama Or.

Monire 25 no Mati 2002.

Ioane 18/1-11

Irava 5 Vr : « O vau nei hoi ia ».

E taimē hopea teie no te oraraa o Ietu i roto i to na huru taata. Tei roto o Ietu e ta na mau pipi i te hoē vahi o ta ratou i matau i te haere. Ua matau maitai atoà o Iuta i teie vahi. Ua haere maira oia i taua vahi ma te apeehea mai e te mau faehau tei tonohia mai e te mau tahuà rarahi e te mau Faritea. I te mea hoi e e po i taua taimē ra, ua haere mai ra ratou e te rama e ma te moihāa atoà i to ratou rima. O Iuta, e pipi atoà teie na Ietu, oia te hoē no na tino hoē ahuru ma piti.

Ua ite maitai atoà o Ietu i te ohipa e ôpuahia nei e Iuta. Mai te taimē mai a a haamata ai o Ietu i te horoi i te avae o te mau pipi, ua parau atura Ietu ia ratou e : « eita outou e hope i te mā. ». Te auraa, te vai ra te mau pipi i tāmā maitaihia e te Fatu, e te vai aita, no te mea ahiri o Ietu i tāmā hope roa ia ratou, eita te ôpuaraa a te Atua e tupu. Te faaherehere nei te Fatu i te hoē o te mau pipi no te faatupu i te hinaaro o te Atua. Te riro nei te hoē taata hara e te manao ino ei moihāa i roto i te ôpuaraa a te Atua.

E ere paha teie parau i te parau maitai i roto i te oraraa faaroo, i te mea e e ôpuaraa fifi roa teie e itehia nei i roto i te hoē ô. Na Iuta i hacre e tii i te mau faehau no te haere mai e haru i te Fatu. Na na i hoo i te Fatu i te mau tahuà rarahi.

(E parau rahi to teie taata o Iuta, teie ra aita e taata e hinaaro e topa faahou i ta ratou tamarii fanau o Iuta. Ua ore roa atoà paha teie iōa i teie tau no te huru o teie Iuta i roto i ta tatou nei taioraa.)

Aita atoà te mau pipi iho i tuati i nia i teie haereraa mai no te mau faehau. Ua patoi ratou, ua haru atoà i te òè no te tapū i te tarià o te tahi faehau. Aita ratou i maramarama i te ohipa e tupu nei. Ta ratou noa i ite, te haerehia mai ra e haru to ratou Fātu, to ratou orometua.

Te faahapa nei Ietu ia Petero, i te ohipa o ta na i rave iho nei i te mea e ere na roto i te moihāa e tupu ai te hinaaro o te Metua i te ao ra, e mea na roto ra i te hau, te auraro e te faarii i te parau a te Atua.

I mua i teie huru faanahoraa, te pahono nei te Fatu i te mau faehau : « O vau nei hoi ia ». Aita oia i ape i te pahono, te tia nei oia i nia i to na tiaraa faaora puai. I mua i te puai o te nuu faehau, te faaite nei Ietu i to na puai i mua i te feia puai.

Teie huru pahonoraa, ua tupu aè na hia ia i te tau o Mote, i te tau a faaite mai ai te Atua i to na ioa ia Mote i te na ô raa e : « O vau i vai na, e vai nei, e vai a ». I ô nei te faaite nei te Atua i te tahi mea moe i te taata, aita te taata i ite e o vai te Atua. Maoti aè o Mote i uiui atu ia na.

Mai te reira atoa te ohipa e tupu nei i roto i te taioraa. Aita te mau faehau i ite e o vai o Ietu. Aita atoà o Iuta i faaite atu ia ratou. I mua i ta te mau faehau uiraa, te pahono nei o Ietu e : « o vau nei ia ». E pahonoraa teie na te hoē taata o tei hinaaro i te faaora i te nunaa. Mai a te Atua i pahono na, e faaora oia i te tamarii Iteraera i te rima o Farao, te na reira atoà nei ta na iho tamaiti no te faaora i to teie nei ao i te rima o te hara. Ua horaà oia i to na ora no te amo i te hara a to teie nei ao.

E tere tii taata to na i te ao nei no te hopoi i roto i te patireia o te Atua, ua rave ino hia ra e te taata, ua faatataurohia oia no te hara a te taata nei.

I roto i to tatou nei oraraa, e mea pinepine tatou i te parau i teie huru parau : « vau, e aore ra na ù » mai te peu e e ohipa maitai teie e tupu nei. Area ra ia tupu te fifi, eita tatou e parau faahou mai teie te huru, e haamoe na tatou ma te faatoro i to tatou rima tohu i nià i te

tahi. E mea pinepine atoà i te moehia ia tatou to tatou oraraa amuiraa, oraraa Etaretia e aore ra oraraa nunaa. Aita tatou e faaitoito faahou nei i te amo i te ohipa a te Atua, aita tatou e faaora faahou nei i te nunaa, te faaora nei ra tatou ia tatou iho.

Mai te mea e te faahapahia nei te Etaretia e te tahi pae, eiaha tatou e haaparuparu, ia riro ra teie mau parau ei faaitoitoraa ia tatou i te reni faahou i ta tatou paroita, ia riro ei paturaa i ta tatou Etaretia ia au i te hinaaro o te Atua. No te tupohe i teie mau manao e faaherehia ra, ia tia ia tatou ia pahono : o vau nei ia, no te amo i te Etaretia, ia maitai te ohipa a te Fatu o tei pupuhia mai i roto i to tatou rima.

Herehia Òrometua.

Mahana piti 26 no mati 2002

Taioraa : Ioane 18, 12 - 27.

Poroi : Ioane 18, 12 - 27

Te aroha ia rahi !

Ua faaoti anaè te hoè taata i roto i to na aau ia oe i te taata ino, e pau ta oe parau ia na no te paruru ia oe, eita ihoa ona e tiàturi i ta oe parau. E mea maitai aè ia te turi no te mea e hiò mai â ia o na i to oe utu ia parau oe.

O te ohipa mau ia e tupu ra i nià ia letu, i ô nei, i mua i te aro o te orometua rahi ra o Ana, te hoè o te mau orometua ati-luta e turu ra i te faatereraa poritita a te Hau Roma i te nunaa ati-luta i taua anotau ra.

Te tatara noa atu nei letu ia Ana orometua i te afaroraa no te parau i parihia ai o ia, aita ihoa te taria o Ana orometua e faaroo maira i te parau.

Teie te parau a letu ia na : *« Te haapiiraa e te ohipa o tau i rave, aita vau i rave na muri i to oe tua, a ui na oe i te taata. Ua ravehia râ e au i te vahi e ruru ai te taata, i roto anei i te fare amuiraa e aore ia i te fare pure. »* Hoè â huru e, te na ô atura letu ia Ana : *« Te maere nei au, e orometua, i to oe ite-ore i te mea o ta te ao nei i ite ! »*

Motohia atura letu. Ei haapapûraa e, te hape noa ra ihoa te mau pariraa i parihia ai letu.

Mai te reira ihoa râ hoi te parau ia tano, e ririhia oe e te taata, e faainohia, e motohia e, ia hapehape aè, mai teie e ite-noa-hia nei â i roto i teie nei ao, i teie mahana, e taparahi-pohe-roa-hia !

Te taata i parau e, no letu o na, eita o na e itehia i roto i te fare amuiraa e aore ia i te fare pure, i nià râ i te purumu oia hoi i te vahi e orahia ra e te nunaa.

O te tumu paha ia o Timona Petero, eiaha ei faahaparaa atu ia na, i ore ai i faaite e, no letu o na, mai ta na i parau na ia letu : *« E te Fatu, eaha i ore i tià ai ia i peè atu ia oe i teie nei. E horaâ hoi au i toi ora no oe. »* (Ioane 13,37).

Ua aaoa anaè te moa, mai te mahana i aaoa ai o ia i te oreraa o Timona Petero i faaite ia letu i te Fatu no na, e tapaò ia e, te parau noa ra tatou i te

parau e aita to na e hopeàraa. E ia ore anaè te moa e aaoa faahou, eita ia e ore e, ua taīmaha roa te taime e aore ia ua riro roa te ohipa parau noa, i roto i ta tatou taviniraa, ei ohipa tumu na tatou.

Eiaha hoi ia moèhia ia tatou e, tei roto i to tatou faaohiparaa i te parau i parauhia e tatou, to te Atua, i roto ia letu, tiairaa mai ia tatou.

No te Fatu tatou ra, ia au i ta tatou parauraa, ia faaite ia tatou i te tapaò !

Te aroha ia rahi !

Terai a IHORAI orometua.

Mahana toru 27 no Mäti 2002

Ioane 18/28-40

Irava faaitoitoraa 37(v.h): No te parau mau o ia ra, e faaroo ia i taù reo.

E te mau taeaè e te mau tuahine

la ora nä i te here e te aroha o te Atua i to tätou färereiraa i teie mahana. la haamaitaihia te Atua, te Fatu o te rai e te fenua, e te mau mea atoà ta na i faatupu tei horoà i te ora o te taata.

la haamaitaihia te Atua no ta na Parau tei faaite ia tätou i to na hinaaro. la haamaitaihia te Atua no te faaiteraa a to na mau tävini i roto i to tätou fenua. la haamaitaihia te Atua no te mau taata e àro ra no te tupuraa o te parau tià i roto i to tätou fenua. la haamaitaihia te Atua no te tupuraa o te here e te aroha tei orahia i terä vähi e terä vähi o to tätou fenua.

Ta tätou parau no teie mahana, te faaite ra i to te Fatu aratairaahia mai te fare haaväraa a te äti luta e tae atu i te fare o te tià o te hau röma Pirato. Te mau taata tei haru i te Fatu aita rätou i hinaaro e rave i te faaotiraa no ta rätou ôpuaraa ìno. No reira rätou i manaò ai e âfai ia Pirato ra. Mea maitai aè na te tahi taata ê e rave i te faaotiraa no ta rätou ôpuaraa e haapohe i te Fatu.

la hiòhia te Fatu i mua i te raveraa a teie mau taata. Te mätaitài noa ra o ia i to rätou huru e ta rätou mau peu tei haapäpü i to rätou ìno i te ìmiraa i te mau räveà atoà e haapohe ia na. I mua i te matai puaahiohia tei faatupuhia e teie mau aratai faaroo, te faaea hau noa ra te Fatu. E au rä tei roto o ia i te ôriò mata o teie matai rahi i te faeearaa, eìt o ia e ühia e te matai. Tei roto noa o ia i te hau te pärahiraa noa atu teie matai rahi e àuahaaàti ra ia na. E terä ta na parau i parau atu ia Pirato: “No te parau mau o ia ra, e faaroo ia i taù reo”. Na teie parau a te Fatu i haapäpü ia tätou, aita te matai puaahiohia i faatupuhia e teie mau faatere faaroo i haafifi noa aè te faaiteraa a te Fatu. I mua ia Pirato, aita ta na faaiteraa i mau. Ua roaa ia na i te parau ia Pirato i te tahi parau faufaa roa. Te haapäpü ra o ia ia Pirato, i haere mai o ia e faaite i te parau mau. E te taata tei tiäturi e parau mau ta na, e faaroo ia i to na reo. Te auraa, te titau atoà ra te Fatu ia Pirato e haapäpü i to na tiäturiraa. Ua tiäturi anaè o ia e parau mau ta te Fatu, e faaroo ia o na i te parau a te Fatu. Aita e faaiteraa mai teie te püai i roto i te tahi taime fifi mai teie te huru no te mea te ìmi ra te tahi pae e haafifi ia na. Aita te Fatu i ìmi i te räveà e ia ora o ia i te ôpuaraa ìno a te mau aratai äti luta. la ìtehia ra te parau mau no reira o ia i tonohia mai ai i te ao nei. Ua tonohia mai o ia e haere e faaite i te parau mau noa atu te huru o te taafa e te fifi o ta na e färerei atu. la ìtehia ra te tupuraa o te hinaaro o te

Atua e tià ai.

“No te parau mau o ia ra, e faaroo ia i taù reo”. I roto i te tahi taime fifi o to na oraraa, te pii mai ra te Fatu ia tätou e faaroo i to na reo e e fãrii i te marau mau. No letu, te Atua te fatu o te parau mau. Te Fatu o te parau mau i riro mai ei taata no reira o ia i tonohia mai ai e faaite i te parau mau a te Atua. Ua na reira te Fatu i roto i to na oraraa e tae roa i teie taime. Te parau mau, te tahi parau eita o na e huruê, e parau päpü e tià i te vairaa e a tau a hiti noa atu. Te faaiteeraa i te parau mau, e òhipa tumu na te Fatu. Te titau ra te Fatu i te taata, e haapäpü ia na i mua i te parau mau no reira o ia i tonohia mai ai. I mua i teie faaiteeraa a te Fatu, te taata terä e anihia ra e faaite tei hea roa o na i mua i teie parau. Te taata e Atua to na, eita o na e fifi i te fãriiraa i teie parau e te faaiteeraa i te Fatu i to na tüätiraa. Te taata tei fãrii i te parau mau, e òhie atoà o ia i te faaroo i te reo o te Fatu. Tei faaroo i te reo o te Fatu, e òhie atoà o ia i te fãrii i te parau mau no roto mai i te Fatu.

No reira, ìmi noa ai te taata i te mau räveà atoà e haafifi i te Fatu aita ta na faaiteeraa i huruê noa aè. Te faaite noa ra teie mau taata i roto i ta rätou ôpuaraa ìno i to rätou haìriiri. Te faaite noa atoà ra te Fatu i to na täamuraa i to na Metua te fatu o te parau mau. E te roaa ra ia na i roto i te taime fifi o to na oraraa e titau i te tiäturiraa o Pirato na roto i te parau ra: “No te parau mau o ia ra, e faaroo ia i taù reo”. Mai ia na i titau ia Pirato, te titau atoà ra o ia ia tätou e faaite i to tätou tüätiraa aore rä to tätou tüätiòreraa i teie parau ta na. Tei hinaarò i te maitai e te ora, e fãrii o ia i ta na parau. Te parau mau a te Atua, e parau tei faatupu i te ora. Te faaite ra te fenua i te reira, te parau mau i riro mai ei fenua. Ua haere atoà mai te Fatu e faaite i taua parau mau, te parau mau i riro ùai ei taata. Ia haamaitahia te Atua no tana Parau.

Ia ora nã

Mahana Maa 30 no Mati 2002

Taiòraa Pipiria : Ioane 19/31-42

E hoa here ma e, Ia ora na i te aroha o te Atua i te fārereiraa i teie ahiahi àpī. I nanāhi ra, ua âpee tātou ia Ietu i nià i terā èà mauui mau, oia hoi i te èà o te tatauro, e ua pohe o ia. Aita ā te taata i mähā atura, ua patia faahou te hoê o te mau faahau i te aòàò o Ietu, e inaha hoi, ua pohe mau o Ietu.

Te mea àpī rā, ua ani te ati-Iuta i te tino no Ietu ia Pirato, eiaha to na tino ia vai-noa i nià i te tatauro, i te mea hoī te fātata maira te tapati. I reira, ia au i te ture, eita roa ia te taata e òhipa i reira. Ua pohe te àrenio a te Atua, mai ta Ioane Papetito i parau i te na ô raa e : "A hiò na i te àrenio a te Atua o tei hopōi ê i te hara a to te ao." Ua pohe te àrenio, ua manii to na toto no te faa-tià-mā i te taata.

Oia mau, e mea teimāha mau te hara a to te ao, e no te iriti i te taata i rapaè i ta na hara, aita e raveà, maoti rā te tatauro. I muri aè i te aniraa a te mau ati-Iuta, teie mai nei te hoê o te mau pipi a Ietu no te ani ia tuuhia to nā tino i roto i te menema ; o Iotefa Arimataio to na iòà. Te mea ta tātou e ite nei, te vaira ihoa te taata e hinaaro i te rave i te tahi òhipa hopeà no te tino pohe o Ietu. Penei aè, te vai rā terā manaò e "ua rave a ia" i te tahi òhipa no to na Fatu.

Taaê noa atu ai te reira, te vai atoà ra tei fāi i to nā faaroo i te na ô raa e : "Ua ite hua te mata, e parau mau ta na." Eita e òre te haamanaò atoà rā tatou i te tahi parau ta Ietu i faahiti i te na ô raa e : "Ia tuuhia te hoê huero titona i roto i te repo, ia òre o ia ia pohe, è vai hoê noa ia, ia pohe rā e rahi atu ia te hotu."

No reira, ua pohe taua huero, e te ite ra tātou e te haamata ra te hotu, èere anei, te faaite noa mai ra te reira e e tupu te tahi òhipa maere, o te parau ia no te Pata, te parau ia no ānānahi, oia hoi te parau no te tià-faahou-raa hanahana no Ietu.

Na roto i te poheraa e te tià-faahou-raa no Ietu, o tei riro no tātou, no te mau marū-metia, ei niu no to tātou tiaturiraa e to tātou tiaitururaa.

Terā te òhipa rahi ta te Atua i rave no te hoo i te hara a te taata e no te faaora i to te ao. Ua fārii te Atua i te pohe no ta na Tamaiti, ia ora to te ao. Oia mau, i mua i te pohe o Ietu, eaha te haapiiraa ta tātou e tano i te tapeà mai. E faufaa anei to te pohe o te Fatu no tātou, i teie mahana. Aita anei i riro noa teie hepetoma ei peu mataro-noa-hia.

I mua i te pohe o Ietu, ua faaineine te Atua i te tahi òhipa o tei faatupu, na mua roa, no te taata o to na tau i te maere. Te reira manaò, ua ò atoà ia i roto i ta na mau pipi. I mua i te rahiraa no te mau haapiiraa ta Ietu i horoà no te faaite e aore ia no te faaineineine ia rātou no taua mahana ra, oia hoi, no to na pohe e no to na tià-faahou-raa, aita ia i faufaahia.

Aita anei i riro te poheraa no Ietu ei raveà no te tūrai ia tātou i roto i ta na òhipa. O tātou, te mau maru-metia tei âpee atoà i te roaraa o teie hepetoma, i te èà riàrià, mauui o to tātou Fatu. E ara rā ia tātou, ia òre tātou ia topa i roto i terā manaò e, te hepetoma moà, e hepetoma ia no te haa-manaò-noa-raa i te pohe o te Fatu, atirā atu ai.

Te tiàturi nei au e, teie hepetoma, ia riro mau o ia, mai te tahi faaāpiraa i to tātou mau manaò, mau feruriraa, e ta tātou mau hiòraa, ia òre tātou ia taòto noa i nià i te mau òhipa i mataro-noa-hia. Na roto atoà i teie hepetoma, te tiàturi atoà nei au e, e taime atoà teie no te faaètaèta faahou i to tātou mau tuàtiàtiraa te tahi i te tahi o tei pitaataa (motumotu) i teie mahana. Te auraa , te haapaò noa raa te taata tataitahi ia na iho.

Ia pāpū tātou e, te pohe o Ietu, ua riro mau ia ei ora àpi no to te ao. E aho àpi terā e haapuàihia maira, ia tià ia tātou ia faaite i to te ao i te auraa mau no te pohe e te tià-faahou-raa no Ietu. **Ia ora na.**

Natupuai òr.

Pureraa no te tāpati o te Tiàfaahouraa

31 no māti 2002.

Ioane 20/1-10

« aore mātou i ite i te vāhi i vaiihohiaai o ia e rātou ra »

E hoa ino mā e, ia ora na roa i te aroha o te Atua i to tātou nei fāreireira i teie nei mahana no te Tiàfaahouraa o to tātou Fatu. Oia mau, e mahana teie tei horoà faahou i te itoito i te tiatururaa o te mau marumetia i te mea e, te haamanaò mai ra teie parau i te faufaā rahi ia tuu tātou i to tātou faaroo i nià i te Metia, te Tamaitia te Atua.

I teie tau hepohepo ta tātou e ora nei, eiaha i roto noa i te mau fenua tei reira te mau tamai te tupuraa, e aore ia te tahi atu huruāti riariā mai te āti pohe poia, e rau noa atu te mau āti e tupu nei i terā e terā vāhi. Inaha hoi, i te fenua nei, te vai atoà ra te tahi mau huru āti e ò mai nei i roto i to tātou oraraa i te mau mahana atoà e aita e haere atu ra i te itiraa, te rahi noa atu ra rā e te faatupu nei i te mau uiuiraa i roto i te mau ùtuafare, te mau Ètārētia, te mau pāroita, te mau òire, e tae roa atu i roto i te mau motu...

I mua i te reira mau hiòraa, e tano ai ia tātou ia ui, e aha atu ra ia te auraa o te Tiàfaahouraa o te Fatu i teie mahana no tātou e te mau marumetia, e e nahea hoi tātou te faaiteraa i te reira ia riro ei parau e tupu faahou ai te faaroo i roto i te àau o te taata ?

Aita ānei rā tātou i fāriiatoà i te tiaturiraa, te ûanaraa o te ino, tei roto ia i te nuuraa o te tau. Te auraa, aita te nuuraa o te tau e aratai ra ia tātou i roto i te maitai, te aratai ra rā ia tātou i roto i te ino. Ia nā reira hoi tātou i te hiò ra, te haapāpū noa ra ia tātou e, te mau mea i tupu na i mua ra, tei reira te maitai, areà tē tupu a murinei, e ino anaè ia.

No reira, e tano ai atoà ia tātou ia ui e, e aha atu ra te tuhaa a te taata faaroo marumetia i reira, inahahoi, te tiai nei o ia i te Tiàfaahouraa mā te hiò i roto i te nuuraa o te tau, mai te tahi òhipa e tiai tātou i to na tupuraa.

Te auraa, no te taata faaroo, tei mua te tiàfaahouraa, aita ā i tae mai, o te tahi rā mea tē tae mai, òre noa atu o ia e ite taimē. E ia nā reira hoi tātou i te hiò, aita ānei tātou e haapāpū noa ra i te tiaturiraa, te tiàfaahouraa, e tupuraa ia no te no te hinaaro o te Atua i muri aè i te pohe.

Tei hea atu ra ia te parau o te Tiàfaahouraa o te Metia tei riro ei papa no to tātou faaroo e ei àveià aratai ia tātou i to tātou tere i nià i te fenua nei, mai te peu e tiai roa i muri mai i te pohe. E aha to na faufaaraa i roto i ta tātou faaiteraa i teie mahana, mai te peu e faaea noa tātou mai teie mau pipi i tapapa mai no te hiò i te pohe. E ère ānei, e nā roto i te faaroo, ua

faatià faahou te Atua ia tätou i teie ä mahana, ia tià ia tätou ia faatupu i to na hinaaro e i to na hau i nià i te fenua nei.

Ta tätou taiòraa no teie nei poipoi, te faatià ra ia i te huru o teie tuahine o Maria i Matatara e tae noa i te huru o te mau pipi i muriaè te poheraa e te hunaraahiato rätou Fatu.

Te hinaaro o teie tuahine o Maria i Matatara, e haere i te poipoi roa e hiò i te huru o te òhipa i ravehia i nià i te tino o to na Fatu. Eita atoà e òre e, te vai atoà ra te peàpeà i roto i to na àau i te mea, ua faaruè mai teie hoa i to rätou o tei faaf hoi i to rätou àau i te òàòà e i to rätou tiàturiraa i te Atua.

Eita e òre, te reira atoà te manaò o te mau pipi, ua parahi noa atu rä i te fare no te mea, te vai mau ra te mataù i te àti luta, a haruhiahoi rätou e a pohe atoà atu ai mai to rätou hoa i nià i te tātauro.

Teie rä, te ite nei tätou e, aita te Atua i hinaaro e ia parahi noa rätou i roto i teie tiàturiraa i to rätou : oia hoi, te tiàturiraa e, ua pohe mau ä te Fatu. I parau ai Maria i te mau pipi : « aore mätou i ite i te vähi i vaiihohiaai o ia e rätou ra ». No te mea, ta rätou e hinaaro nei, te tino pohe ia o te Fatu i to na vairaa. Te moèraa o te tino, te riro nei ia ei uiraa tei turai ia rätou i rapae i te vähi o ta rätou e parahi ra, no te tāpapa i te menema. Eiaha rä no te imi i te Fatu tei tiàfaahou, no te imirä i te tino pohe.

E mai te mea, ua moè te tino o te Fatu, eita e òre e, te hinaaro nei te Atua ia hiò rätou, eiaha i te pohe, i te ora rä ta te Tamaitii haere mai e faaite ia rätou.

No reira, te tiàfaahouraa, eita o ia e haafäriu ia tätou i te pohe, eita atoà faahiò noa i te ora e fä mai, no te mea, i teie ä mahana, nä roto i te Parau a te Atua, e mä te faaroo i taua parau ra, te riro nei te taata tei faaroo i te Metia ei taata tei FAATIAFAAHOUHIA. E tano roa ai, ia tätou ia òhipa mä te faaroo i roto i teie nei ao noa atu te mau fifie tupu noa nei. Ia riro te Tiàfaahouraa ei parau tei turai ia tätou i rapae i te mau mea i mataro-noa-hia e tätou e tei tapeàpeà hoi ia lätou, tei faaapiapi i ta tätou tütonuraa i te ora mure òre.

Taarii òrometua.

Mahana maha 9 no Mē 2002

REVARAA

Taiòraa: Ohipa 1/1-11; Efetia 1/17-23; Mataio 28/16-20; Taramo 47

Irava faaitoitōraa: Ohipa 1/9

“E te parau noa ra o ia i taua mau parau nei, e te hiò noa mai ra rātou ia na, ravehia atu ra o ia i nià, e vehīhia mai ra o ia e te ata, moè atu ra o ia i to rātou mata.”

E hoa here mā, tei mua ā tātou i teie parau taaē ta te taote Ruta i pāpai na i roto i te piti o ta na ôtarō parau e o ta na i faatae na i to na hoa ra ia Teofiro. I roto i ta na ôtarō parau matamua, o ta tātou e pii nei te ēvaneria ia au te faatiāraa a Ruta, ua faahope na o ia i taua pāpai matamua na roto i te faaiteraa i teie òhipa taaē i tupu i te farereiraa hopeà roa no Ietu e ta na mau pipi. Te na ô ra ta na parau i roto i te Ruta i te pene 24 i te irava 50 e tae atu i te irava hopeà, te irava 53: “Ua aratai atura o ia ia rātou i rapae au i Petania, ua hopoi aè ra o ia i ta na rima i nià, faaora mai ra ia rātou. E te faaora mai ra o ia ia rātou ra, i ravehia mai ai o ia, e hopoihia atu ra i nià i te raī. Ua haamori atu ra rātou ia na, e hoī mai ra i Ierutarema mā te òàòà rahi. E e tià rātou i roto i te hiero ra, i te ārueraa e te haamaitāraa i te Atua. Amene.” I roto i te piti o ta na faatiāraa, i roto i teie taiòraa tumu ta tātou e tuatāpapa ra, ua faaravaī atu ā o Ruta i ta na āamu, mā te haamanaò poto mai i te mau parau atoà e te mau òhipa ta Ietu i rave na mai te òmuaraa o to na oraraa e tae roa mai i teie taime taaē, e taime taaē i te mea e moè ē roa Ietu i te mata o ta na mau pipi, e moè ē i mua i te tūtonu onoono a te taata.

I teie mahana e faahanahana ai tātou i te parau no to Ietu revaraa, noa atu e ua riro ei peu tumu, ei peu tāmāu i roto i te oraraa faaroo maru-metia, te titauihia nei tātou ia tūtonu ā, ia tuatāpapa ā, e ia imi ā i te auraa ta te parau no te revaraa e hinaaro ra e faaite ia tātou e te faufaa no taua parau i roto i te òpuaraa faaora a te Atua no tātou. No reira, i roto i teie taiòraa i mataro-roa-hia e tātou i te farerei i te mau matahiti atoà, e tamata tātou i te tūtonu i te manaò i nià i te parau ta te irava 9 e faaite ra:

“E te parau noa ra o ia i taua mau parau nei, e te hiò noa mai ra rātou ia na, ravehia atu ra o ia i nià, e vehīhia mai ra o ia e te ata, moè atu ra o ia i to rātou mata.”

Ietu teie i mua i ta na mau pipi. Eere teie tiāraa no na i mua ia rātou mai te tahi tiāraa i matarohia na e rātou, i roto i to rātou oraraa, i roto i te mau taime rātou e haaputuputu ai i te vāhi hoē no te faaroo i ta na mau haapiiraa, e aore ra i te mau taime e rave ai o ia i te tahi mau faaoraraa, faaamuraa i te taata. Teie òrometua to rātou, e huru taaē to na i ta rātou hiòraa, e hohoà taaē mau to na e e tiaturiraa taaē ta na e faatupu ra i roto ia rātou. Oia mau, i taua taime, te iho mai ra te òhipa taaē i tupu i nià i to rātou òrometua, i te mea, i pohe na o ia e ua tià faahou mai i muri aè i nā mahana e nā pō e toru. Ua ite na rātou ia na i te taravaraa i nià i te rāau, e te tauperaa to na ūpoo, pohe atu ai o ia. I taua mau taime ra, ua topa roa to rātou itoito e to rātou tiaturiraa. Ua nevaneva roa to rātou feruriraa e ua òpanipani roa to rātou manaò. I te taime a fā faahou mai o ia mā te ora i mua ia rātou, ua matau ihoā rātou, e aha hoī e òre te matau i te roaa i mua i teie huru tupuraa òhipa. E tano rā e parau atoà e, i muri aè i te matau, ua iho faahou mai te òàòà, ua hoī faahou mai te tiaturiraa, ua itoito

faahou te varua no te hiò i te tahi, ia farerei te mata e te mata, ia hoì te tahi i te tahi. Eita ia tātou e maere i terā hiò tūtonu a te mau pipi i to rātou Fatu, e te fatafata maitai o to rātou tarià no te faaroo i ta na mau parau. I roto i to rātou tiaturiraa, e vai mai ā o ia i pihai iho ia rātou, e noho roa mai o ia i rotopū ia rātou, e tāmāu noa rātou i te pee na muri ia na, no te faaroo noa i ta na mau parau, no te hiò noa i ta na mau òhipa e rave.

Aita teie huru to rātou i teie taimē i taaē roa i terā huru o nā pipi e toru i haere i niā i te mouà o te Faahuru-ê-raa, parau atu ai rātou i te Fatu, “e te Fatu, e mea maitai ia parahi tātou i ô nei; e ia tiā ia òe ra, e faatiā mātou i te fare autā e toru a'e: no oe e tahi, no Mōte e tahi, no Eria hoì e tahi.”(Mat. 17/4). I teie taimē rā, te na ô ra te tahi o rātou e (e tiāturi tātou e, e manaò ihoā teie no te mau pipi taatoà), te na ô ra ta na parauraa: “E te Fatu, i teie nei anei òe e faahoì mai ai i te hau ia Iteraera” (irava 6). Na te reira parau e haapāpū i te vairaa o to rātou manaò e to rātou tiaturiraa. I niā i te mouà o te Faahuru-ê-raa, na te reo o te Atua Metua i pāhono mai: “O ta ù Tamaiti here teie, a faaroo ia na.” e na te ānaāna o te rai i tāpoi i te Tamaiti i faaite i te hinaaro mau o te Atua ia rātou. I roto i ta tātou taiōraa, te pāhono ra te reo o Ietu: “Aore i haapaòhia e ia ite òutou i te taimē e te anotau, tei te Metua anaè te reira parau.” E tano atoà rā e parau e, na te ata i tāpoi i te Tamaiti e moē atu ai o ia i pāhono atoà i te uiraa a te mau pipi.

Eita e roaa i te ite taata e te feruriraa taata ia tuatāpapa i te mau òhipa maere a te Atua. Te parau ra Ruta Ev. i te pene 1/37: “Aore roa hoì e mea e òre e tiā i te Atua.” Te tamata nei te feia tahutahu i ta mau rātou raveà no te haamoè i te tahi anei taoà, te tahi anei taata, eita rā e maoro e ite-faahou-hia mai taua taoà e aore ra taua taata. Areà teie haamoèraa na te Fatu ia na i te ite mata a ta na mau pipi, e haamoèraa e titau ia rātou ia faahohoà e ia faatupu roa i te parau e te òhipa ta rātou i ite na e tei horoàhia mai e to rātou Fatu: “ei ite òutou no ù i Ierutarema nei e Iutea atoà hoì e àti noa aè, i Tamaria, e tae noa atu i te hopeà o te fenua ra.”(irava 8). Aita teie titauraa i taaē i te parau ta Mataio e horoà ra i te hopeà o ta na pāpai: “E teie nei, e haere òutou e faariro i te mau fenua atoà ei pipi, a papetito ai ia rātou i roto i te iōa o te Metua, e no te Tamaiti, e no te Varua Maitai; mā te haapii atu ia rātou i te haapaò i te mau mea atoà ta ù i parau atu ia òutou na...”(Mat. 28/19-20vm)

Teie haamoèraa no Ietu, ta tātou e parau nei te revaraa, e titauraa ia i te taata i farii ia na, te taata i faariro ia na iho ei tavini no te Atua, ia tuu i te rima i niā i te arote mā te òre e nevaneva faahou i muri. E titauraa eiaha e tūtonu noa te mata i niā, eiaha e haamauà i te taimē i te imiraa e aha to muri mai i te ata, e mea na hea to Ietu revaraa e aore ra raveraahia i niā i te rai. O te poroi ia a nā taata toopiti i horoà mai i te mau pipi: “e te mau taata no Tarirea e, e aha òutou i tiā noa ai e i tiātonu mārō ai i niā i te rai...”

E tano e parau e, ua riro te revaraa o te Fatu ei taimē e titauhia ai te taata ia hiò i te huru, te faito no ta na faatupuraa i te hinaaro o te Atua ta te Tamaiti i haapii e i ora ra. E titauraa ia tūtava no te tūrai ā i te òhipa a te Atua i mua, ia tae roa i te hopeà, ia itehia te hanahana o te Atua i te mau vāhi atoà, e tae noa atu te taimē e ite atoà ai tātou i te mea e vai ra i ô mai i te ata, e ite ai tātou te hopeà o te eà ta te Fatu i na mua i te haere e tae atu ai i te hau o te Atua. I taua taimē ra tātou e pāpū ai e aha mau na te mea e vai ra i ô mai i te ata. Te tiaturiraa o Pauro no taua vāhi ra, ia au ta na e faaite ra i to Efetia i te pene matamua, i te irava 22, e vāhi ia e tuuhia ai te mau mea atoà nei i raro aè i te mana o te Atua, e roaa ai te ite i te mau mea atoà i te mau taata atoà. O te titauraa ia ta te Revaraa o te Fatu e haamanaò mai ra. Ia ora na.

Pureraa Penetetote Veà Òrometua, Tapati 19/05/02...

Taiòraa: loane 20/19-23

irava 22vh: *Ua haapuai mai ra i te aho i nià ia ratou ra, e ua parau mai ra, A farii i te VArua Maitai*

Ia ora na e to te hui faaroo i teie nei Penetetote 2002. Te tiàturiraa e te poroìraa tumu maori ra, ia uru-atoà-hia atu tatou i te manaò tumu o te Penetetote Teretetiano matamua. O tei hiòhia hoì e te Taata tiàturi Atua o te Metia ei tau no te Varua Maitai e no ta Na mau haamaitairaa.

Oia mau, te Varua te ìte haavare òre i te huru tumu o te Atua e te Metia, a riro atoà atu ai ei faaite tauui òre i te reira i te Taata nei, tae noa atu i te Rahu e te Ao nei. O ia te Varua e faa-àrepurepu i te Moana e te Rahu taatoà (Tenete 1), tae noa atu i te mau Taata e te mau Tavini atoà (Ohipa 2).

No reira, i teie matahiti 2002 e vaiho tatou i te Hiroà Faaroo o te Etaretia matamua ia tauturu mai a ia tatou i mua i te parau àro no te haamaitairaa a te Varua. E tutonu ihoa ra tatou i te aratairaa a te tahi taeae i te faaroo o loane te hoè o te mau papaì Evaneria no te Metia o letu no Natareta (loane 20).

irava 22vh: *...Ua haapuai mai ra i te aho i nià ia ratou ra, e ua parau mai ra, A farii i te Varua Maitai...* O te reo ia o te Fatu ra o letu-Metia i nià i ta na mau Pipi o tei riro ei hoa àpee ia Na i roto i ta Na taviniraa. I te mea ia e, ua faì na o ia i to Na Faaroo i reira i niuhia ai, e i patuhia ai to Na oraraa e ta Na faaoraraa.

Taua mau Pipi hoì na Na ra, o tei titauhia ia faaineine e ia uruhia i taua huru taviniraa na Na ra. Tera ra, te ineine roa ra ratou i te faa-upootià faahou i te mau haa-mataù-raa a te Ati-luta hamani ìno taata e i to ratou Fatu. I tae roa ai ratou i te ìmiraa i te tahi raveà parururaa ia ratou i taua àti e tiaì mai ra.

Mai te mea ra taua raveà, o te tiaìraa atu ia i te rumaruma o te ahiahi e ôtarora i te parau o ta ratou mahana haamaitairaa i te Fatu i upootià na i nià i te mau mana haapouri e te haapohe. E te ruraa ratou i te horo e tapuni i roto i te tahi piha pouri e ua tamaumau-maitai-hia te mau ùputa atoà.

Ei tapaò haapapuraa atoà teie e, i te tahi mahana e riro to tatou hiroà faaroo taata teretetiano i te hemo atu mai roto i te mana faaitoito e tae atu i roto i te mana haaparuparu. E, e aha e òre atoà atu ai e, mai ta letu i manaònaò na ia hoì mai o ia i te tau mau ra, 'te vai faahou ra anei hoì te faaroo i te fenua nei'.

Areà ra, eita te Fatu e poihere noa i te reira huru, no te mea e manaò rahi to Na ia tatou e ta tatou tiàauraa i te ora na Na. E no te reira, e rahi noa atoà atu to tatou haamanaò-raa-hia e, inaha tei ia Na te upootiàraa e te faaâpiraa hopeà i nià i te mau mea hiòhia e te mau mea hiò-òre-hia e te mata.

I tupu mai ai te parau no ta tatou irava 22vh: *...Ua haapuai mai ra i te aho i nià*

ia ratou ra, e ua parau mai ra, A farii i te Varua Maitai... Te mea e ite-matamua-hia nei e te mau Pipi a letu-Metia, maori ra o to Na ia tiàmaraa i mua i te mau mana rave i to Na tatauro poheraa e to Na menema hunaraa.

No taua tiàmaraa papu noa a no Na ra, e tae roa o la e farerei e e àparau i te mau Pipi i roto i to ratou piha haapuniraa e to ratou âau mataù-ha-noa. Ua tià roa mai i ropu ia ratou ma te ora e te haamanaò ia ratou e: 1- eiaha ia pohe i te haamataùraa a te Enemi, 2- e ia ora i te faaitoitoraa e te puai o te Fatu.

Oia mau, te ìtehia ra te tapaò no to te Metia onoonoraa i nià ia ratou i te parau no to ratou faaoraraa e to ratou tonoraa, i te ìrava 21o tei na ô e: 'Ua parau faahou mai ra letu ia ratou, la ora na òutou, mai ta ù Metua i tonono mai ia ù nei ra, e tonono atoà hoì au ia òutou na.'

E no te tupu-maite-raa o te reira ra, eere i te mea feruri àta no te Fatu ia faaoti i teie nei farereiraa no Na e te mau Pipi, na roto i na peu e piti na Na : 1- To Na faatae-roa-raa atu i to na aho i nià ia ratou; 2- To Na tuu-roa-raa i te parau àro no te fariiraa i te Varua Maitai i mua i to ratou aro.

la hiòhia te tupuraa o te òhipa i roto i te aratairaa a te Fatu, inaha e hamani-faahou-raa teie na Na i te taata e ta na taviniraa, i to Na hohoà Metia. E tià hoì ia Na no te mea 'I te Atua ra hoì o la... Na Na i hamani te mau mea atoà nei', ia au i te faìraa a loane i te òmuaraa o ta na papairaa i te pene 1/2-3.

Aita atoà atu e tumu rahi no te reira maori ra, ia maitai te rautiraa i te tuàtiraa i rotopu i te mau taata i mua i te hara, i roto i te Etaretia iho e i roto i te Ao nei. E parau rahi mau hoì te reira o te au ia turamahia i te hiroà faaroo o te Fatu iho o tei haapaò maite i te reira i roto i to Na mau tere e to Na mau pohe.

Oia hoì mai ta letu i haamanaò na i te mau Pipi, to na mau hoa i te faaroo i piihia na e ana mai roto mai i te oraraa o te Ao nei, i te na ôraa o la i te loane pene 15/18 : 'Ia riri mai to te Ao ia òutou ra, a haamanaò e o vau ta ratou i riri mai na, hou i riri mai ai ia òutou'.

O ta letu i hinaaro na i te parau ia ratou e ia tatou e, eiaha ia horuhoru noa atu a te âau, no te mea o la iho te hiòraa no te hoê Fatu o tei faaruru na mua roa aè ia ratou i te mau àti. E o la atoà te tahi Fatu o tei faaara i to ratou faaroo na roto i ta Na parau mana o te faatià faahou ia ratou no te tavini i to te Ao.

E tano ai ia manaò, inaha te tahi tumu no te mataù e te tapuni a te mau Pipi i te Ati-luta, o te ineine òre ia no te hoì maite i roto i te Ao o te Nunaa, ma te faa-òromaì i te mau huru rau atoà. No te mea, te fa tumu, ia hoì ia te taata i te Ao o te Atua, e te vai ra a te tuhāa pororaa Evaneria a te taata o te Fatu i reira.

No tatou te hui faaroo o teie tau, e tià ia tatou ia ani roa i te Atua mai ta Tu a Pomre II Arii i na ô na e : 'Ho mai i to Varua maitai ei haamaitai ia matou'. No te Fatu, hoê to Na huru i nanahi, teie mahana e ânanahi, inaha : 'Ua haapuai mai ra i te aho, ua parau mai ra, a farii i te Varua maitai '. Ia ora. Taoàhere t.

VEA OROMETUA

Episetole papaihia ei faaitoitoraa
e ei taamura a i te mau tavini o te Atua
tonohia e te Ekalesia

N° 02 / 2002

ÉGLISE ÉVANGÉLIQUE EN
POLYNÉSIE FRANÇAISE

ÉCOLE

PASTORALE
HERMON

BP: 667 PAPEETE 98713

TÉL : (689) 50 25 30

FAX : (689) 50 25 31

Email : hermon@mall.pf

Papeete, i te 15 no novema 2002

REÇU LE

02 DEC. 2002

Na te mau orometua
i roto i na Tuhaa e 8,

Te aroha ia rahi !

E hoa ino mâ e, tena atu â ta tatou Veà Orometua hopeà no teie
matahiti 2002, ô atu ai tatou i roto i te Matahiti 2003.

Aita, ei haamanaoraa, te mau hohoà poroi i faaineinehia mai e
to tatou tuahine e e mau taeà e tapeà ra ia outou ia turai atu â i ta
outou iho maimiraa i nià i taua mau hohoà poroiraa ra :

Reforomatio	:	Tapati 27 no atopa 2002
Tiairaa 1	:	Tapati 01 no titema 2002
Tiairaa 2	:	Tapati 08 no titema 2002
Tiairaa 3	:	Tapati 15 no titema 2002
Tiairaa 4	:	Tapati 22 no titema 2002
Noera	:	Mahana toru 25 no titema 2002
Pô matahiti	:	Mahana piti 31 no titema 2002
Matahiti Apî	:	Mahana toru 01 no tenuare 2003

Mauruuru â i teie mau hoa no ta ratou tauturu 2002.


- Eiaha e haamoè e, i te pô mahana piti 24 no titema 2002, e pureraa pô Noera iho â to tatou.
- Eiaha atoà e moèhia ia outou e, e opani ta tatou pureraa pô matahiti na roto i te oroà Euhari.

- Areà ta tatou pureraa Hepetoma, e iriti ia i te mahana māa 18 no tenuare 2003 (na roto i te Oroà Euhari) e e opani i te mahana māa 25 no tenuare 2003 (na roto i te Oroà Euhari).
- Te tumu parau : « *Te fārii nei rā mātou i taua taoà nei i te fārii repo nei..* » (2 Torinetia 4, 7).

I roto i te matahiti 2003, ia faaî mai â te Fatu o te Etaretia ia tatou i te here e i te oaoa o te taviniraa. Ei tiaî-mata-ara atoà tatou no te nunaa e no te maitai o te nunaa i herehia e te Atua, ta te pohe e te tiafaahouraa o te Metua e haamanaò noa ra ia tatou.

Ia outou, e i ta outou mau Apooraa Tiàtono e e paroita, e tae noa atu i to outou mau utuafare, tenà atu â te poroi faatau-aroha o te Apooraa Faatere o ta tatou Etaretia, no teie oroà Noera e te Matahiti Apî.

Te aroha ia rahi !

Te pēretitēni,

 Jacques THORAI òrometua

Ei haamanaòraa i te parau no te « Reforomatio » i te 27 no atopa 2002.

Ruta 11 : 27,28

« Ua parau atura râ letu i taua vahine ra, o tei faaroo â e ua haapaò i te parau a te Atua, o ratou tei maitai. » (irava 28).

Te aroha ia rahi !

Ia tac anaè ta tatou tamarii i nià i te hoê tiàraa teitei e faahanahanahia ai o ïa e te taata i roto i to tatou oraraa vaamataèinaa, e hinaaro roa ïa tatou ia itchia taua tamarii ra i te tamarii na tatou. E mai te peu e, eita taua tamarii ra e itchia i te tamarii na tatou, e itoito roa tatou i reira i te amo i to tatou rima i nià no te faaite i te taata e, o tatou te metua tane e aore ïa te metua vahine o taua tamarii ra.

O vai te faateitei

O te hoê ïa faaauraa no te ohipa e tupu ra i roto i ta tatou taiòraa no teie mahana. No te maramarama o te pahonora a letu i te mau uiraa tofovâ a te mau aratai poritita e e faaroo o to na nunaa i te mau tumu o ta na mau ohipa faaoraraa mai, aita i tià i te hoê vahine i reira i te faaea noa ma te ore e haamaitai i te vahine i fanau mai ia letu oia hoi ia Maria, te metua vahine o letu. Teie te reo umere o taua vahine ra :

« Ua maitai te opu i hopoi ia oe, e te û ta oe i ote ra. »

Eita paha tatou e hape ia parau e, te na ô atoà ra taua vahine ra i roto ia na e, ahiri taua tamaiti ra o letu i te tamarii atoà na na, auê ïa parau i te faahiahia e !

Te auraa no teie parau, ia maitai anaè te tamarii i roto i to na oraraa e aore ïa ia manuia anaè i roto i to na oraraa vaamataèinaa, cere ïa no te haapaò noa o te tamarii i te aòraa a te metua, no te huru atoà râ o te mapecraa a te metua i ta na tamarii i roto i to na oraraa. E tano te reira parau e eita atoà e tano. E tano, no te mea te ohipa o ta te metua e rave e aore ïa e ore e rave, o ta te tamarii atoà ïa e na reira i roto i to na oraraa. Eita e tano, no te mea i mua i te parau no te aòraa a te metua i ta na tamarii, tei te tamarii iho â te faaotiraa hopeà i te mea o ta na i hinaaro no to na oraraa. Te auraa, te vaha, no te metua ïa, te tarià râ, no te tamarii iho â ïa. No reira, e oaoaraa te tamarii haapaò maitai i te aòraa a te metua no te metua e, e mauuiraa hoi te tamarii haapaò-ore i te aòraa a te metua no te metua.

E ia na anaè ra ta tatou arueraa

No reira, ahiri e, o tatou atoà aè taua vahine ra, cita mau tatou e ore i te pii atoà e, « **Ua maitai te opu i hopoi ia oe, e te û ta oe i ote ra.** » oia hoi, « **E faanaòraa to te metua vahine i fanau mai ia oe i te ao nei e tei faaamu ia oe i te maa !** » Te pahono nei râ letu i taua vahine ra e no te nahoà rahi taata e tià ra i reira : « **O tei faaroo â e ua haapaò i te parau a te Atua, o ratou tei maitai.** »

Aita, i muri ai i teie parau na Ietu, e manaò faahapa e aore ïa faatura-ore no na i to na metua vahine inaha hoi e titauraa na te Atua i te taata ia faatura i to na metua tane e i to na metua vahine i roto i ta na Ture. Teie râ, mai te peu e, aita e manaò faahapa e aore ïa faatura-ore no Ietu i to na metua vahine i muri mai i teie pahonoraana na, eaha mau na ïa ta Ietu e hinaaro ra i te haamanaò i te taata i taua mahana ra, mai taua vahine ra i faateniteni ia Maria, na reira atoà i teie mahana.

Teie paha :

A tahi : aita o ïa i haere mai i te ao nei no te haamauruuru i te hinaaro o te taata, mai te hinaaro o to na metua vahine, i te hinaaro râ o te Auta oia hoi o to na Metua i te ao ra, o tei tonono mai ia na i te ao nei no te haamanaò i te taata i to te Atua parahi-fatata-roa-raa mai i pihai iho i te taata no te ora i te oraraa e orahia ra e te taata.

No reira, i te mahana te haapii ra o ïa i te taata e i faarahia mai ai o ïa e, te hinaaro maira to na metua vahine ia na e to na mau taeà, oia hoi te mau tamarii a Maria raua o Iotefa, i pahono atu ai Ietua i te taata e, « *O vai to ù metua vahine, e o vai hoi to ù taeà e to ù tuahine, maori râ o tei haapaò i te hinaaro o ta ù Metua i te ao ra.* » (Mataio 12, 48-50).

Aita Ietu, te auraa, i haere mai i te ao nei no te faatupu i te ohipa e mauuruu ai te taata e aore ïa e faahanahanahia ai o ïa e te taata. Aita. I haere mai râ o ïa i te ao nei no te haamauruuru i te hinaaro o to na Metua i te ao ra ia na. Oia atoà tei faï i to na faaroo i te Atua, ia Ietu e i te Varua Moà, cere o ïa no te huna i to na faaroo i te taime e au ai ia na ia faaite, no te faaite râ.

Eita atoà râ e tià ia ore ia parauhia e, no te faatupuraa i te ohipa e haamaitahia ai o ïa e te taata, mai tei itehia i te 16 no te tenetere i te taime no te Reforomatio, e ohipa atoà te reira o te titau i te taata faaroo ia mauui no te Atua. Eere te taata faaroo no te titau i te mea mauui ai o ïa, mai te peu râ e, o te hoê te reira raveà e itehia ai te ohipa faaoraraa a te Atua i te taata, mai ia Ietu, cita o ïa e otoharaa i mua i te mau ohipa e mauui ai o ïa.

No reira, cere te fariiraa i te mauui no te Atua, i te tapao no te paruparu o te taata faaroo, no te puai râ o te here o te taata faaroo i te taata i herehia e Ietu i te here-tatauro.

I teie matahiti, taiò noa 500 matahiti i muri aè i te tupuraa no te Reforomatio i Europa e e tae roa mai nei i ô tatou nei, e tamata na tatou i te uiui faahou i roto ia tatou, i te taata porotetani, te riro noa ra anei te Atua, tei rahu i te rai e i te fenua, e tei haamani i te taata, ei tumu no ta tatou mau arueraa e no ta tatou mau faateiteiraa.

I te Atua ra tatou e horoà ai i ta tatou mau pahonora, eiaha ia tatou, no te mea na na te faaapîraa e aore ïa te faatitiaifarora e titauhia ra ia tatou ia rave ma te faaea-ore i roto i ta tatou Etaretia.

Aore roa e mea i toe

A piti : i muri mai i teie pahonora a Ietu, eita e ore e, te haamanaò atoà maira Ietua ia tatou e, aita e mea e toe ra ia na i te rave e tupu hope roa ai te parau o to tatou faatiàmâraahia i te mana no te hara e no te pohe. I roto râ i te pohe e i te tiàfaahouraa no na, no Ietu, ua hope roa i reira i te ravchia e te Atua ta na opuaraa faaora i te taata.

I te XVI o te tenetere, te tiàturiraa i roto i te Etaretia (tatorita), e ere ïa o te reira te tiàturiraa oia hoi e Atua aroha to tatou e o tei titau ia tatou ia faaite, na roto i te ohipa, i te mau tapaò o to tatou mauruuru i te here aroha noa no na ia tatou, e Atua râ tei titau ia tatou ia faatupu i te ohipa ia arohahia mai tatou e ana. Riro atura te Atua i te faarirora a te taata, eiaha mai te hoê Metua i rotopu i ta na ra mau tamarii, mai te hoê râ Haava i mua i te hoê pupu taata rave hara.

O te huru ïa o te tiàturiraa o te Etaretia (tatorita) i te XVI o te tenetere . I tià mai ai te hoê mau vahine e te hoê mau tane i roto i te Etaretia no te faatupu i te Reforomatio oia hoi no te faatitiaifaro i te hiòraa a te Etaretia i te Atua o ta te Tamaiti i haere mai e faaite i te ao nei, eiaha mai te hoê Haava, mai te hoê râ Metua tei hinaaro i te ora e i te maitai o ta na ra mau tamarii.

No reira, te uiraa, i teie mahana, i te taata porotetani, o teie ïa : « *Ua ore mau nei anei ïa huru tiàturiraa i roto ia tatou e aore ïa aita* ». Ia hiò-hia ta tatou mau faanahoraa i roto i ta tatou Etaretia, i ta tatou paroita, ia ta tatou amuiraa, e tià mau nei anei ia parauhia e, e mau faanahoraa ta tatou no te faaite i te taata i te huru o te taata i herehia e te Atua, eiaha no ta na hara, noa atu râ ta na hara o tei haamauiui i te Atua e i to na tauaro. Te auraa, aita anei tatou i rave i te parahiraa o te Atua, o ïa anaè ra hoi tei ite i te faataa i te mea maitai i te mea ino.

Ia ore anaè te hoê Etaretia ia riro ei vahi e fariihia ai te taata ia au i to na huru e i to na tiàraa, eita tatou e hape ia parau e, e eere faahou â taua Etaretia ra i te Etaretia, e taatiraa râ o tei arataihia i te hinaaro taata e hanahana ai te taatiraa.

I te Atua ra tatou e faaite ai i ta tatou mau pahonora, eiaha râ ia tatou iho, no te mea o ïa tei titau i ta na Etaretia ia faaapî e aore ïa faatitiaifaro noa i ta na mau faanahoraa e i ta na mau hiòraa ia na, i te mau tau atoà, ei Atua tei hinaaro, eiaha i te pohe o te taata, i te ora râ o te taata.

Te porotetani, e taata faatiàmâhia

A toru : cita e ore e, i muri mai i teie parau na letu, te haamanaò atoà maira o ïa ia tatou e, e Atua tiàmâ o ïa oia hoi e Atua tei here i te taata e tei hinaaro i te ora o te taata. No reira, eere na na e faaroo i te parau a te Atua e e faaohipa. Eere. Na tatou iho râ. Te auraa, cita e tano terâ parau e faahitihia ra e tatou, i te tahi taime, ia haere te hoê i to tatou pure e : « *A pure atoà atu no ù !* » E maitai au ia faaroo e ia faaohipa i te parau a te Atua i roto i to ù oraraa, ciala râ oc i to ù faaroo e i to ù haapao i te parau a te Atua. No reira, eaha te auraa ia faahiti noa tatou i te parau no te aroha i roto i to tatou oraraa e ia ore ia ora i taua parau ra. Eiaha hoi ia aramoina-hia ia tatou e, tei to tatou faaohiparaa i te parau a te Atua e itchia ai tatou ei mau tamarii no te ao apî e tiaihia ra e tatou (Mataio 25, 31- 46)

I te XVI o te tenetere, aita te Etaretia (tatorita) i riro faahou, i roto i te hiòraa a te taata, ei pupu taata tei faatiàmâhia e te aroha e te here o te Atua, ei Etaretia râ o tei mehamechahia.

No reira, te uiraa e au i te porotetani ia ui, i teie mahana, maori râ ïa : « *Ua riro mau anei o ïa ei taata tiàmâ no te faaite i te ohipa faatiàmâraa a te Metia.* » E aore ïa aita anei te Etaretia e himene noa ra i te parau no te aroha o te Atua i te taata ma te vaiiho noa i te taata e aore ïa i to na nunaa i roto i te hoê huru oraraa e moè ai to na hiroà e to na turaraa taata.

Ia ore anaè te hoê Etaretia ia àro no te tiàmâraa o to na nunaa, e Etaretia ïa o ïa o tei haapae i to na nunaa i roto i te ati e i roto i te pohe.

No te tiàmâraa o ïa ra, mai te Atua, ia àro ïa o ïa i te mau ohipa atoà e faatîfî ra i to na nunaa.

I teie matahiti e haamanaò faahou ai tatou, te taata porotetani, i te parau no te Reforomatio, e au anei ia tatou ia parau e, no te faatitiaifaroraa iho â tatou oia hio no te hoê àroraa e faahanahanahia ai te Atua e e faaturahia ai te taata e te turaraa o te taata.

I te Atua ra tatou e faaite atu ai i ta tatou pahonora no te mea o ïa tei titau ia tatou, i te mau tau atoà, ia rave i te faaapîraa e te faatitiaifaroraa i roto i ta na Etaretia oia hoi te Reforomatio.

Te aroha ia rahi !

Terai a IHORAI orometua

POROÌ NO TE TIAÌRAA MATAMUA
(Tāpati 1 no Titema 2002)

Taiòraa : Māreto 13, ìrava 32 – 37

Ìrava faaitoitoraa : Mātaio 1, ìrava 34vh-35vm : « Poroì iho ra hoì i te tiaì ôpani ra e faaitoito. E tena na, e faaitoito atoà òutou. »

Ia ora na i teie tāpati matamua no te tau tiaìraa 2002.

Ta tātou ìrava poroìraa e faaitoitoraa no teie mahana, no roto mai ia i te parapore ta letu i faatià i te mau Pipi. E faaauraa na Na i te huru araraa o te taata faaroo nā roto ia Na. E au te Tamaiti i te fatu fare tei faaara e haere ê o Ia, e e hoì mai ā o Ia. Aita o Ia i haere noa e aita o Ia i faanaho i te mau tāvini e te mau taata, tae noa atu i te taata tiaì ùputa. Eì hiòraa aè te reira na te mau Pipi e na Tātou.

I tupu ai ta tātou parau i te na ôraa e, « *poroì ihora hoì i te tiaì ôpani ra e faaitoito. E tena na, e faaitoito atoà òutou.* » Mai te mea ra ia, te faatūtonu ra letu i te mau Pipi e ia Tātou atoà i nià i te hopoià mau a te hoê tiaì ùputa. O te ara-tamau-raa ia i nià ia na iho e maitaì ai te òhipa i faauehia ia na. Oia hoì, te mata-ara-raa i nià i te mau mea atoà e te mau taata atoà e hinaaro i te tomo i te fare.

Mai te mau tiaì ùputa atoà, ta na òhipa tumu, o te hiòpoà ia e te faatià aore ra te pātoì i tei fā atu i te ôpani ra. E tītauhia ia na ia mātau maitaì i te mau tāvini e te mau taata òhipa atoà no taua ùtuafare ra, tae noa atu i to na fatu òhipa, o ia te fatu fare iho. Mea huru ê ia taupupū to na ìte e to na paari no te fārii i te taata, a riro o ia i te tiàvaru hape atu i te fatu fare e to na mau taata tauturu.

E òre ai e tià ia na ia haaparuparu, e mai te huru e, e topa ā to na taòto i te vāhi mau e i te tau mau e tītauhia ai ia na ia vai ara noa. Ua ravaì te òhipa taòto, i teie nei e faatae te faauerāa i nià i te vairaa. Ia na reira anaè o ia ra, tāpaò ia no to na incine, to na haapaò, e to na itoito. Hau atu ra i te reira, tāpaò ia no to na faatura, to na tiàturi e to na tūati i te fatu i tiàturi ia na na mua roa.

Te reira huru to te tiaì ôpani, ua araa i mua i te fatu o tei òre i tuu-ha-noa atoà i te mau huru atoà i nià i taua tuhāa ra. Ua ìte atoà ra o ia e, te haere āpipiti noa ra te haapaò e te itoito, tae noa atu i te taupupū e te paruparu o to na hoa tauturu. O ta na ia i poroì e i faaitoito onoono noa atu ā i roto i te parapore, « *Poroì ihora hoì i te tiaì ôpani ra e faaitoito. E tena na, e faaitoito atoà òutou.* »

No reira, e haamanaò i te haa-marū e te haa-ca māite, ia noaa te faaroo e te hinaaro āpī, e tae noa atu i te ora e te itoito āpī. No te mea, e ihotaata to te taata i te rahu-raa-hia, ia paìmi ihoā o ia i te taòto e maitaì ai to na fānau-raa-hia mai i roto i

teie oraraa. E taata-tiàturi-atua atoà ra o ia, i haapiihia ai ia na e, ia ara anaè mai roto mai i te taòto, ia haroàroà hau atu ia i te hiroà e te haereà tià.

E tiàororaa tuutuu òre na Ietu i te mau taata ia mau pāpū tei peepee i te pee, te tīpee e te āpee i to na taàraa faaroo e tāviniraa, eiaha ia pāhee. Ua nā reira atoà te Apotetoro o Pauro i te faaara i te mau taata o te Etārētia... I te tiaì-maite-raa ānei i te rātou iho āau, e te àraàra-māite-raa ānei i to rātou iho mata i mua i te mau faahemaraa e te mau totoāraa a te mau faaìno o te oraraa.

Ia riro teie parau ei hiòraa o te tauturu atu ā i te feruriraa e te tiàturiraa o te mau Pipi e to Tātou iho i roto i te Tāviniraa. Eita hoì e tiàturi, « vareà taòto-noa-hia », i te Atua te Metua o Ietu. E eita ā hoì e haa, « pohe taòto-noa-hia », to na hinaaro e ta na faa-ora-raa. E tano ai e uiui tāmāu noa ia tātou iho i teie tau, i teie matahiti, e i teie mahana e, e aha te huru maitàraa to tātou « faaroo tiaì ùputa. »

Parau mau, mea rahi te tiàraa e te òhipa ta tātou e mau ra i terā vāhi e terā vāhi i roto i te tāviniraa i te nūnaa faaroo e te nūnaa vaamataàinaa. Parau mau atoà ra e, te faaòidò ra i te faarohirohi ia tatou, e te faaòidò ra i te haataere i te tupu-mau-raa o te ôpuaraa. Auà ra, aita tātou e mau ra i te fatu fare, te fatu òhipa e te fatu o te ora e te maità rahi manii noa mai e te horoà noa na na ra.

Te tiāmā ra rā o ia, cita e noaa i te faahapa e te pipiri e te haatitī. Mai reira mai ra, e haere mai ā o ia e e tac mai ā o ia i te tau manaò-òre-hia e tātou. Inaha, i roto i to tātou tiāmāraa taata e te tāvini faa-hapa-hia, e faa-tiāmā-faahou o ia ia tātou. Ia tupu maità roa i roto i te oraraa e te tāviniraa te fāiraa e, ia Toru tahi te Toru tahi, e ia Atua te Atua, ia Taata te Taata, ia Fenua te Fenua.

Joël HOIORE Or.



Pureraa no te Piti o te Tapati no te Tiairaa (08 no titema 2002)

Taioraa Pipiria: Mareto 1/ 1-8

Poroiraa: “ *E haamaitai outou i te e’a o te Atua, e faatitiaifaro i to na haerea* ” (ir.3)

E hoa here ma, i tomo iho nei tatou i roto i te tau no te oraraa o te Etaretia o tei parauhia te tau no te tiairaa, e teie tapati o te piti o te tapati, ia haamaitaihia, ia aruchia te Atua, te Fatu no te mea atoà.

Te tahi mau tatuhaaraa no teie taioraa:

Irava 1: Evaneria, te parau maitai a Ietu-Metia, o te fā no teie puta.

Irava 2 - 8: Te ohipa (tiaraa) no Ioane-Papetito, o tei faaite poto-roa-hia e Mareto, te auraa e cere i te mea faufaa roa i te mea hoi e, o te vea noa o ia. Ecre i te parau no Ioane Papetito tera hinaaro hia ra i te faaite, ta na ra ohipa.

Te ohipa rahi ta Ioane i rave o te faaiteraa, te pororaa i te parau no tera taata e haere maira oia hoi o Ietu.

Te haapapu maitai ra o Ioane e, e “*reo*” noa o ia te auraa te reo o te maniania ia no roto mai i te vaha. E tīa atoà ia tatou ia parau e, e vaha noa o ia, no ô mai ra i te Atua ra (irava 3).

I ô nei tatou e ite ai e, e mea hinaaro na te Atua i te taata no te rave i te ohipa e aore ra no te faatupu i to te Atua mau hinaaro, te auraa e moihaa tatou i roto i te rima o te Atua

I roto i tera piiraa a Ioane ia au i ta tatou parau “*E haamaitai i te e’a o te Atua, e faatitiaifaro i to na haerea*”. Te ite papu na tatou e ohipa tera e tiai maira ia Ioane, e titaaraa te parau faufaa. Ia parau anaè ratou i teie taō “haamaitai” e piti ohipa ta tatou e ite atura:

- **Λ tahi:** Te vaira te tahi parau e tei roto te hoê ohipa i te fifi anci/paruparu te auraa e imi ia maitai mai tera ohipa . Aita tera ohipa e taè ra i to na vaira mau.

- **Λ piti:** A faanhenche ia anaanataè te taata i taua ohipa ra.

Ia hio anaè tatou i ta tatou parau “ *E haamaitai i te e’a o te Atua*” e titau raa to roto i te taata ia rave i te ohipa, te auraa ia faaincine, e faanhenche i te e’a o te Fatu, ia tīa i te taata i te tauā atu ia na. Te ô o te ohipa rahi e titauihia ra ia tatou.

I teie mahana, e mea nahea ta tatou faaineineraa i te e'a no te tamaiti a te Atua. Nahea tatou i te fariiraa i tera Fatu e haere maira.

I roto i to tatou feruriraa, e ohipa rū tera, na vai mā e rave. Te ohipa rahi e titauhia maira ia tatou, te imiraa ia i te mau ravea afoà ia tia i te taata ia haere na nia i tera e'a. Te maitairaa tera ohipa tei ia tatou. I teie mahana, ia hio atu vau ia outou, e mea rahi ta Ioane Papetito e vairà, teie ra, te vai ra te tia i nia e haere e faaite teie roa mai nei te Fatu.

Ia hio atu tatou i te poroi a Ioane, aita e fatupu i te fifi. Te na ô roa maira o ia e, *“A tauī ia outou, a faaapi ta outou hio raa, ta outou feruriraa”* te auraa e tauī to outou api, te auraa a tauī ia outou.


E parau maitai teie, e parau oàòà i te mea e te haere mai nei te Fatu io tatou nei, e farii anei tatou. Mai te mea e, a tauī ia, a faaapi ia, eaha ia e taoto noa i te mau mea i matarohia.

Te haere mai na te Fatu i roto i to tatou aau, te toē noa anei te tahi vahi no te Fatu, aita anei hoi i apiapi roa. Te mea papu ra, te farii tatou e te farii ore, e haere mai ihoa o ia, no te mea ua taè i te taimē, e taimē no te faatupu i te opuaraa ora a te Atua i te taata.

Tera e taè maira, o letua ia, te tamaiti here a te Atua, o ia iho o tei parau e, o vau te e'a, te parau mau, e te ora.

Ua taè mai letu, e i te taimē tei roto te oraraa o te nunaa i te fifi. Tei raro aè te nunaa i te faatereraa tīti a te hau Roma, te auraa na te hoê nunaa ē, e faatere nei te fenua . Aita to na e tiāmàraa ua riro te maera i te hau Roma. Nahea i te faatiāmà i te nunaa, na roto anei te mana poritita, na roto anei i te mana haapao maitai i te ture a te Ati-luta. Te ohipa maere tei tupu, na roto ia te hoê taata o Ioane Papetito te ioà. Ta na titauraa ia ù i ta tatou parau, ia tatarahapa te nunaa, te auraa ia hoi faahou na te haamataraa te vahi i hahi o ia te auraa ia tera taō *“faatitiaifaro”*. A faaapi i te e'a, a tauī te haerca. Ia ite faahou te nunaa i to na hape, i ta na hara, e hau atu ia ite ratou i te aroha o te Atua ia au i ta te Taramo 103/8: *“Na teie tiaororaa e tatara mai, e iriti mai i te taata mai roto mai i te fifi, te auraa e reo faahepo, ia noaa faahou i te taata i te ora, te ora i roto i te tamaiti, o ia tera e haere mai ra. Ua ineine tatou i te farii i te reo o Ioane Papetito.”*

Ia ora na.



Natupuaì or.

Tapati 15 no Titema 2002 Tiaàraa 3

Taiioraa : Ioane 1/6-8 ;19-28.

Te tupu nei tēie parau ta tatou i Petania i pihaiho ia Ioritana

I te ômuaraa no tēie nei taiòraa ta tātou, te faaite papuhia ra e e mea tonohia mai te hoê taata no ô mai ite Atua ra ei ite e no te faaite i taua maramaramara. O te tahi teie taata o tei tohuhia to na parau i roto i te Faufaa Tahito ia au i te Itaiia 40/3 no te haere e faaineine i te eà o te Fatu, no te tarai i te vāhi puupuū e no te faaî i te mau vāhi apoopoo.

Eita e ore e e te tuî nei te roo o Ioane, o ia e pāpetito nei i te taata, cita e ore e e te rahi nei te taata i te fāpapa ia na i Ioritana? No reira ua tonono mai ra te mau faatere Ati-Iuta no Ierutarema i te mau tahuà e te mau Ati-Revi no te titorotoro i te parau o Ioane.

E ere no te teiaha o ta ratou mau hara i tonohia ai teie mau taata ia Ioane ra e ia papetito-atoà-hia, e tere hiopoà ra e no te maramaramaraa i te ohipa e tupu nei i te mau mahana tatai tahi. Eita e ore e te vai atoà ra te mataù i roto i teie mau faatere, a ore teie mau taata e faaroo faahou i ta ratou mau haapiiraa.

Ua riro ta ratou titorotororaa ei taime pāpū no Ioane no te faaite i te ohipa o ta na e rave nei. Te faaite pāpū ra oia e : e ere oia i te Metia, e ere atoà oia i te perofeta. Teie ra, aita oia e faaite nei i to na iho parau, e parau ê teie o ta na e faaite nei (ir 23). Ua riro noa oia ei ite e aore ra ei reo faaite no taua maramarama ra(ir 6-8). E mea pāpū maitai e, o te Fatu teie maramarama o ta na e faaite nei, no na te eà o ta na e haere mai ra e faatitiaifaro. E te tiai ra o i to na haereraa mai.

E tano maitai tēie taiòraa i te maitiraa-hia mai no tātou i tēie mahana i te mea e e tapati no te fāàraa toru tēie. E tau atoà tēie ta te Etaretia i faataa nei, e tau no te haereraa mai te Fatu, te maramarama o tēie nei ao, te uputa e tac ai te taata i te Atua ra.

A 2002 matahiti i teie nei i te taeraa mai te maramarama i roto i teie nei ao e ua iriti i te mau taata atoà mai roto mai i te pouri, ua parari te tahi mau patu tei faataa ê na i te tahi nunaa e te tahi, te tahi fenua i te tahi, ua imi to te ao nei ia hoê aè to te ao nei i mua i te Atua. Ua tauàhia te feia mai, te feia riirii, te feia faaruchia. Ua imi to te ao nei ia tupu te hau i roto i te ao nei. E titauraa rahi teie na te Fatu i to te ao nei ia tupu te hau, te maitai e te oaoa no te mau taata atoà o teie nei ao.

Eiaha ia moehia ia tātou e e te piihia nei i te mau taata atoà o tei na roto mai i te pouri ia haere ia au i te haerea o te mau tamarii o te maramarama (Efetia8/5). Te auraa te riro nei te mau taata atoà ei moihaa i roto i te rima o te Atua no te faaite Hau o te Atua.

Ua faaite aè na te Atua i to na tavini ia Ioane e e mea na hea oia e jte ai i tei tonohia mai e ana no te iriti i te hara a to teie nei ao. Ua ohipa te Varua o te Atua i roto ia na, i tae ai oia i te parau e: “ A hio na i te Arenio a te Atua” i te taima a haere mai ai Ietu. Ua maiti te Atua i te tahi taraihara moà no te tama i te hara a to te ao nei. E teie taraihara, ua tīai-maoro-hia mai te haamataraa mai ihoa to te ao nei toparaa i roto i te hara, ua tohuhia e te mau perofeta e teie atoà ia o ta Ioane i hare mai e faaite e e faaineine to na haereraa mai.

No reira no tātou i teie mahana, e tau tīairaa tēie, e ere i te tia noa raa a tīai noa ai, e taima ohiparaa ra, e taima araraa eiaha ia roohia mai e te taoto ra to tātou faroo, e taima faaàmuraa ra i to tātou faaroo i ta na parau. E taima e haapae ai tātou i te mau fifi rau o to tātou oraraa no te faafatata i te Fatu. E taima e haapae ai tātou i te mau mea no te pouri no te tomo i roto i te maramarama o te Fatu. E haamata te parau no tīairaa i roto i te utuafare, ia faaineine i te hoa, i te mau tamarii e tae noa atu i te mau taata atoà e vai ra i roto i te utuafare. Te auraa, eita tātou e haapao noa ia tātou iho, e moihaa ra tātou i roto i te rima o te Auta no te faaite i te haereraa mai o te Fatu. Mai ia Ioane Papetito, aita oia i haere mai e faaite i to na iho parau, ua riro ra oia ei ite no te Fatu, e ua riro ei reo no te faaineine i te aau o te taata noà te farii i te aiu no Noera e tae mai ra. E faaitoito i te parau i te mau taata atoà e tau mai i mua i to tātou aro, ia ò paatoà atu tātou i roto i to na hinuhinu e to na atoà oaoaraa. (A faaravai atu).

Herehia Orometua.



Tāpati 22 no Titema 2002

Taiòraa: Ruta 1,26-38

Irava faaitoitōraa 38: “Ua parau mai ra Māria: Inaha ei tāvini au no te Fatu, ia nā-reira-hia mai au ta òe i parau na”.

Ia ora na i te Aroha e te Here o te Atua i to tātou fāreireira i teie Tāpati no te maha o te tiaàraa no te haereraa mai o te Faaora o te mau nūnaa atoà.

Ia haamaitaìhia te Atua no ta na faaherehere e ta na tauturu ia tātou i te mau mahana atoà o to tātou oraraa.

Ia haamaitaìhia te Atua no te mau maitaì ta te fenua, te tai e te reva e faaite noa ra ia tātou.

Ia haamaitaìhia te Atua no ta na Parau tei faaite i to na hinaaro e tei tītau ia tātou e fārii e e faaòhipa.

I roto i te parau ta tātou e hiò nei, te hinaaro o te Atua o te faaiteraa i te taata i ta na ôpuaraa no te haereraa mai o ta na Tamaiti here nā roto i te taata. I mua i te tiāmāraa ta te Atua i horoà i te taata no te faatupuraa i te ora nā roto i te fānau, i parau ai te Atua i te taata: **“Ia fānau òrua e ia rahi roa, a faaì iho i te fenua...”**; ua maiti atoà o ia i teie rāveà ta na i horoà i te taata no te haereraa mai o ta na Tamaiti. Te auraa, aita o ia i vahavaha i te fānau a te taata ta na i horoà. Te Atua rā tei ia na te mana o te Parau e te parau o te Mana, aita o ia i rave i te tahi èà ê atu no ta na Tamaiti. Te mana ta na i horoà i te taata no te faatupuraa i te ora nā roto i te fānau, ua rave atoà te Atua no ta na Tamaiti i maiti ai o ia i te tahi ùtuafare no oti noa mai i te momoàhia.

E ôpuaraa faaora ta te Atua no te taata, e te hinaaro ra o na e ia âpiti mai te taata i roto i teie ôpuaraa ta na. Eita teie ôpuaraa e tupu mai te peu cita te taata e fārii atoà. E hinaaro rahi to te Atua i te taata. Te hinaaro rā ānei te taata i te Atua. Ua tac roa te Atua i te tonoraa i ta na veà no te haere e parauparau ia Māria i teie ôpuaraa ta na. Ua rave te veà i ta na òhipa i te faaiteraa i te ôpuaraa a te Atua ia Māria. Ua ìte atoà tātou i te fifi o Māria i mua i teie aniraa a te Atua. Ua māmarama Māria ei tāne e ei vahine e roaa ai te tamarii. Mea nāhea teie ôpuaraa a te Atua e tupu ai, aita o na i tac atu ra i nià i te reira faanahoraa.

Ta te veà o te Atua rāveà no te tatara i teie fifi to Māria o te parau: **“E pou mai te Vārua Maitaì i nià iho ia òe e na te mana o te Teitei e tāmārū i nià iho ia òe, e parauhia te na na tamaiti moà o te tamaiti a te Atua”.**

Ua faaòhipa te Atua i te reo o te taata no te faaite i to na hinaaro e no te tatara i te fifi o Māria tei hepohepo i mua i teie aniraa ta na. Nā roto i teie parau a te veà, te ìte ra tātou i te haapāpūraa e na te Atua i ôpua i te taata. E oti ta te Atua taata noa atu e vahine noa e aita e tāne. Te reira te fifi o Māria i mua i te aniraa a te Atua oia hoì ei tāne e ei vahine e roaa ai te tamarii.

Ia hiò anaè ra tātou i te parau a Māria tei nā ô e: **“Inaha ei tāvini au no te Fatu, ia nā reira hia mai au ta òe i parau na”**. Te ìte rā tātou, ua matara te fifi o Māria nā roto i te tauturu a te veà tei faaite i te rāveà a te Atua. Te haapāpū ra Māria e ua fārii o na i te ôpuaraa a te Atua. Te fārii ra o na i te hinaaro o te Atua, o o na aè te rāveà e matara ai ta na ôpuaraa. Te fārii ra o na e nā roto ia na e haere mai ai te tamaiti a te Atua i te ao nei.

Te haapāpū ra Māria e tāvini noa o na. I fārii ai o na i teie aniraa a te Atua no te mea e tāvini noa o na. Te Atua i roto i to na tiāmāraa, ua māiti ia Māria. Aita Māria i hiò i te reira mai te tahi faateiteiraa na te Atua ia na. Aita atoà o ia i hiò i teie mātiraa a te Atua ia na mai te tahi faatuaraa ia na.

I mua i te hinaaro o te Atua ia na , te hiò noa ra Māria ia na mai te tahi tāvini. E hape huru hape to tātou i te manaòraa e, e ò Māria i roto i te ânairaa o te mau atua na roto i to na fāriiraa e amo i te tamaiti a te Atua.

Ia haamaitaìhia te Atua, ua fārii teie Māma i te ôpuaraa a te Atua.

Te taata e fārii i te ôpuaraa a te Atua, e taata haamaitaìhia no te mea te faatupu ra o ia i te parau a te Atua i to na ôpuaraa i te taata: **“E hāmani tātou i te taata ma to tātou huru e to tātou hohoà”**. Ia fārii e ia faatupu tātou i te hinaaro o te Atua, te matara mai ra terā huru e terā hohoà ta te Atua i tuu mai i nià ia tātou.

Te parau ra te Fatu ia au i te **Mātaio 7, 21**: **“E òre te feiā e parau mai ia ù ra e, E te Fatu, e te Fatu, e hope pāatoà i te pātireia o te ao, te taata rā i haapaò i te hinaaro o taù Metua i te ao ra”**.

Ia maitaì e ia òaàa i roto i te tāviniraa.

Ia ora na

Jean TEURURAI Òr.



**POROÌ NO TE PURERAA NOERA
(Mahana toru 25 no titema 2002)**

Taiòraa : Mātaio 1, ìrava 18 – 25

Ìrava faaitoitoraa : Mātaio 1, ìrava 23 : « Emanuera, Te Atua i ò tātou nei »

Ia ora na i te aroha o te Atua.

Te Atua i ò tātou nei, e ùputa âpī no to te Atua faaiteraa mai ia na i te taata. Māria te pāretenia vahine tei fānau mai te tama a te Atua. E fānau o Māria i te hoê tama o ia te Atua, te haere roa mai e ora e te taata, te Atua i ò tātou nei.

I roto i te mau pāpāraa Evaneria, te faatiāraa o teie temeio no te fānauraa o Ietu.

No **Ruta**, ua haafaufaa oia ia Māria e to na huru pāretenia.

No **Mātaio**, ua haafaufaa ia Iotefa e to na tiāraa metua tāne. E fānau o ia i te hoê tama o te riro ei huaai na Tāvita.

Te tama e fānauhia i te Noera e vai i roto ia na e 2 ao :

- Te ao o te Atua e te ao o te taata e to na parau, to na tuatua e ta na mau tiāraa.
- Ietu, tamaiti na Tāvita e tamaiti na te Atua. E oho no roto mai i te ānaīraa o te mau taata tiāturi Atua e haapaò i te hinaaro o te Atua.

I roto i te taiòraa a Mātaio, ua haafauaahia te parau o Iotefa.

- « *E taata parau-tià o Iotefa* » ìr. 19. E tiāraa teie no te hoê taata tei faataa i to na oraraa no te Atua e tei haapaò i to na anaè hinaaro. Te auraa, te parau no te « *hapū o ta na vahine mā te òre rāua e âpiti* » e tumu parau o tei haaferuri ia na. Tei mua o ia i nā rāveà toopiti « *aore i hinaaro i te faaitē hua ia na e manaò aèra e e haapae huna noa ia na* » ìr. 19. Tei roto te reira i te huru tupuraa no te faanahoraa a te Faufaa Tahito i ta Teuteronomi faaiteraa 24,1 « *Ia rave te taata i te vahine, e faaiipoipo atu ra ia na, aore aèra taua vahine ra i hinaarohia e taua taata ra, no te mea ua ìte iho ra e ana te hoê ìno i nià ia na ra : e pāpā o ia i te tahi parau haapae a tuu atu ai i ta na rima, a tuu noa atu ai o ia ia na i rāpae i to na fare* ».

- I mua i teie parau, e tano roa ia ia Iotefa ia haapaò i teie huru ture i nià ia Māria.
- I roto i ta na taimē feruriraa, ua fā mai ra te merahi a te Fatu, no te haapāpū e « *i hapū o ia i te Vārua Maitai* ». Te tama no roto mai i te òhiparaa a te Vārua-Maitai. I teie mahana, e piiraa te reira e horoàhia nei i nià i te mau tamahine hapū, aita e tane e tei huna i te metua tāne. Eiaha teie aamu ia riro ei faatiāraa no te tupuraa o te mau fifi i nià i te mau tamahine i teie mahana.

-I te ômuaraa o teie taiòraa, o Māria e te Vārua Maitai nā taata faufaa roa. Ua tuuhia Iotefa i mua i te tahi òhipa ua oti aè na i te faanahohia.

Aita o Mātaio i haapae noa aè i te tiāraa o Iotefa.

- Na te tiàturiraa Atua e te here e aratai nei te oraraa o teie ùtuafare to Māria e Iotefa. No te mea e tuhaa na te metua tāne te toparaa te iōa o te tama fānau āpī, te rāveà noa e toe ra, e tii i teie vahine e aratai mai i te ùtuafare metua. Te haapāpū faahou mai ra i te riroraa mai te Atua ei taata, aore ia, to te Atua haereraa mai e āpiti i roto i te oraraa o te taata, e ta na mau faanahoraa. E tuhaa ta te metua tane e vahine.

E tuhaa faufaa tei horoāhia ia Iotefa, i te mea ia e, i roto i teie iōa Ietu, e ôpuaraa ta te Atua i faanaho no to na oraraa. E tuhaa rahi ta Iotefa i roto i te fāriiraa i te taeraa mai o te Arii fānau āpī.

« Te Atua i ō tātou nei »

I roto i teie ôroà haamanaòraa i te fānauraa mai o te Metia, aita e moèhia ra ia tātou e, e rave rahi te mau fifi e tupu atoà nei.

I te tau no te fānauraa o Ietu, te vai ra te fifi no te faaheporaa e ia faaruè i te âià tumu, te itehia atu ra te hepohepo o te feiā rāveà haīhaī, te fānauraa i roto i te vairaa maa a te puua, tuu-atoà-hia mai te parau no te haapoheraa tamarii. Ua fānauhia Ietu i te hoê tau te haavīhia ra te nūnaa e te arii ra o Herota. Ua tac roa o ia i te ìmiraa e taparahi ia Ietu. Ua haere mai te Atua i roto i to tātou oraraa i te hoê tau âchuehu, ci mori aratai, ei Hau no teie nei ao.

« Emanuera, te Atua i ō tātou nei »

E ôpuaraa to roto i teie pārahiraa mai no te Atua i roto i teie nei ao, ua faaō atoà Mātaio te parau no te mauui e te poheraa i nià i te tatauro. Te auraa, te oraraa o teie tamaiti, cere i te hoê oraraa hau. Ua haere mai te Atua i te ao nei nā roto i te mauui fānau. I riro mai te Atua ei taata no te pohe i nià i te tatauro. Ia tuuhia te fatene i roto i te ata o te tatauro. Ia ora ia Noera ma te haamanaò i te parau o Pāta.

Te auraa, no to te Atua fānauraa i te ao nei, cere i te hoê taimè òàòà noa, e taimè peàpeà atoà ra. Aita Mātaio i haapaè i te reira tuhaa, ia haamanaòhia te reira i te tau Noera.

Ia faahanahanahia Noera, ia rahi te òàòà, te aroha i roto i te mau ùtuafare. Eiaha atoà rā teie ôroà ia huna i te peàpeà e te mauui. Ia riro Noera ei Noera, e taimè e noho faahou mai ai te Atua i roto i te oraraa o te taata tātai tahi. Ia hiti mai te māramarama i nià i te pōuri. Te Atua tei haere mai i ō tātou nei, tei âmui i roto roa i to tātou parau, òàòà ānci aore ia mauui.

Te faaite mai ra i te tiàtururaa, te tiàturiraa mau e te ūpootiàraa o te Hau o te Atua i roto i te âià, mai te hitiraa o te hoê mahana āpī.

Noera, to te Atua pārahiraa mai i roto i teie ao i rotopū i to tātou oraraa i te mahana tātai tahi.

Ia maitai òutou i roto i te aroha o te Atua i teie Noera.

Céline HOIORE

POROÌ NO TE PŌ MATAHITI
(Mahana Piti 31 no tītema 2002)
Tuhaa matamua

Taiòraa : Taramo 97

Irava faaitoitoraa : Taramo 97, ìrava 11 : «*Ua ueuehia te māramarama na te feiā parau tià ra, e te òaòà nei te feiā i tià i te âau ra*»

E taime tano maitaì teie no tātou no te faatupuā e no te hiò i te parau no to tātou oraraa i roto i te matahiti i haerehia mai e tātou e no te hiò atoà i te huru oraraa e tiaì mai ra ia tātou i ô mai, i te tau âpī e hohorahia ra no tātou i roto i teie māa taime iti e toe ra.

Te nā ô ra te reo o te pāpaì Taramo 97 i te ìrava 11 : « *Ua ueuehia te māramarama na te feiā parau tià ra, e te òaòà nei te feiā i tià i te âau ra...* » I mua i te mau mea atoà i orahia mai e tātou e tae mai i teie pō hopeà, te roaa ra ānei ia tātou i te parau atoà i teie fāïraa a te pāpaì Taramo. Tei roto atoà ānei tātou i terā nā ânaïraa taata ta te pāpaì Taramo e pehepehe nei, te feiā parau tià e te feiā i tià i te âau ra... O te tahi teie mau uïraa e tano e tuu i mua ia tātou i teie pō, a tāmata ai i te feruri e te tuatāpapa i te poroì e te haapiïraa ta teie pāpaì Taramo e tuu mai ra i mua i to tātou aro.

I roto i te faataaraa a te feiā tuatāpapa, tei roto teie Taramo i te ânaïraa o te mau pehepehe e faateniteni ra i te tiàraa arii o te Atua ; teie Atua o tei faaïte na i to na iòà ia Mōte : « *o te Vai nei Au, i Vai na e o tē Vai ā e a muri noa atu* » ; no reira te pāpaì Taramo i parau ai i te ìrava matamua : « *O Iehova te arii, ia ouàuà te fenua ; e te mau fenua rii e rave rahi ra, ia òaòà ia.* » Te tahi ânaïraa i reira teie Taramo e tuu-atoà-hia ai, o te haapuèraa ia i parauhia, te mau Taramo no te Hau o te Atua, no te mea te hiòhia ra teie Atua mai te arii e faatere i te mau nūnaa e te mau fenua atoà e vai ra i raro aè i te mau raì e i roto i te ao tātōa, te pehepehe teie mau Taramo i te huru o te hau ta te Atua i haamau i roto i te ao i rahuhia e a na. I roto i te ìrava 9, te haapāpū ra te pāpaì Taramo e, « *tei nià ê aè (teie Atua) i te mau atua atoà* », no reira tātou e tano ai ia parau, e hau ê to te Atua, e arataïraa taaê, e

faanahoraa taaê mau ta teie Atua i faaau no to na mau taata.

Ia faaroohia e ia taiòhia teie huru faaìteraa a te pāpai Taramo i te parau o to na atua, aita i ātea ê i ta Itaia i ìte i roto i te hiero no lerutarema. Te na ô ra Itaia i te ômuaraa o te pene 6 : « ...hiò atu ra vau ia Iehova i te pārahiraa i nià i te terono teitei e te teniteni : e ua î hoì te hiero i te hiti òhu roroa no na ra. Te tià noa ra nā terafi i nià aè : taìono o rātou atoà ra pererau ; e piti ra, ei tāpoi ia i to na mata ; e piti ra, ei tāpoi ia i ta na âvae ; o e piti ra, ei mauèraa ia. Ua pii iho ra rātou te tahi i te tahi, nā ô aè ra, E moà, e moà, e moà, to Iehova Tapaota, ua î te fenua atoà nei i to na ra hanahana. »

Aita teie huru faaìteraa ta Itaia i taaê i ta te pāpai Taramo. A faaroo faahou na tātou i ta na faatiàraa (ir. 2-6) : « Te haaàtihia ra o ia i te mau ata e te pōuri : o te parau tià ra e te au, o te tumu ia o to na terono. Te haere ra te auahi na mua ia na, e te àma ra to na mau ènemi e àti noa aè. Te māmarama ra te fenua i to na uira : te hiò ra te fenua mā te rurutaina. Te tarapape ra te mau mouà mai te tāpau i te aro o Iehova ; i te aro o te Fatu o te fenua atoà ra. Te faaìte mai ra te mau raì i te parau tià na na, e te ìte ra te taata atoà i to na hanahana. »

Te tahi parau rahi e matara mai ra i roto i teie faaìteraa a te pāpai Taramo, o te parau ia

no te māmarama. E piti taime to na faahitiraa i teie taò :

- i te ìrava 4 : « te māmarama ra te fenua i to na ra uira : te hiò ra te fenua mā te rurutaina. »

- E i roto i ta tātou ìrava tumu, te ìr. 11 : « ua ueuehia te māmarama na te feiā parau tià ra, e te òaòà nei te feiā i tià i te âau ra. »

I roto i te faaìteraa a te pīpīria, i te mau taime e fārerei ai te taata i te Atua, e aore ra, ia fārerei te Atua i te taata, e ìtehia te parau no te māmarama. I roto i te Faaauraa Matamua, ia au te faatiàraa a te puta Etoto, i te mouà ra o Horepa, e māmarama taaê ta Mōte i ìte i roto i

te auahi o te àma pau òre o te pu àmère. I roto i te Pāāauraa Āpi, e māramarama atoà ta Pauro i ìte i te ànaànarāa mai i nià i te raì. I roto i teie nā hiòraa e te tahi atu ā hoì mau hiòraa ta te pīpīria e faaìte ra, te faaìte ra te reira ia tātou e, e faufaa rahi mau to te māramarama i roto i te faaìteraa i te parau o te Atua e i roto hoì ta te Atua faaìteraa mai ia na i te taata. I tae roa ai te taata i te tiàturi e, tei roto te Atua i te mahana i te vairaa, e e mana taaê mau to na i òre ai e tià i te taata ia hiò tūtonu i te hihì o te mahana. I roto i ta te tahi mau haapaòraa, e tūrama rātou i te tahi mau hinu i faataahia no te haamāramarama i te vāhi haamoriraa. A taa noa atu rā te reira huru tiàturiraa e te reira huru faanahoraa, no tātou i teie mahana, te haamanaò mai ra te pāpai Tarama ia tātou e, « *te ueue noa ra te Atua i to na māramarama i te feiā parau tià e te òaòà nei te feiā i tià i te àau ra.* »

Na tātou e hiò e, i roto i te tau e hope nei, ua ìte ānei tātou i taua māramarama ra i te ànaànarāa mai i roto i to tātou oraraa, ua hitihia ānei tātou e taua māramarama ra. Mai te peu e ua rahi aè te taime pōuri i orahia e tātou, e aita e rāveà tātou e hitihia ai e taua māramarama, e taime tano ia teie no tātou ia feruri e ia fāriu i te tumu o te ora e i te tumu o te māramarama. Te nā ô ra hoì te perofeta ra Itaia, « *a tià i nià, ia māramarama òe, ua tae mai to òe māramarama, e ua hiti mai te hanahna o te Atua i nià ia òe.* » (Itaia 60,1). O Ietu ihō hoì tei faaìte e, « *O vau te māramama o teie ao, o te pee mai ia ù ra, e òre ia e haere noa i te pōuri, e māramarama ora ia to na.* » (Ioane 8,12).

E taime tano teie no te ìriti ā i to tātou âau e to tātou manaò no te fārii i te māramarama ta te Atua e horoà tāmāu nei i to na mau taata. Mai te peu eita e roaa ia tātou ia hiò e ia ìte i te hihì o to na aroha i roto i te mahana, i roto i te rahu e haaàti noa ra ia tātou, e tāmata ia i te heheu i te parau a te Atua i pāpāhia no te mea te haapii mai ra te Taramo 119 i te ìrava 130 e, « *tei te heheuraa o ta òe ra parau e noaa ai te māramarama, e noaa ai hoì te ìte i te taata ìte òre ra.* »

No reira, e hoa here mā, a òaòà tātou i te mea ua tāpaòhia tātou i roto i te ànaàraa o te feiā parau tià, e te feiā i tià i te âau ra, no te mea te vai noa mai ra te māramarama o te Atua i nià ia tātou e na taua māramarama e aratai ā ia tātou i roto i te tau âpī e fatata mai nei. Ia riro tātou i te parau mai ia Timeona i roto i te hiero o te Atua, i te

Atua e a faaite ai te Vārua Maitai ia mā i te parau o te Metia, *E te Fatu, e tuu òe i to tāvini i teie nei mā te hau, ua au hoì i ta òe parau : ua ìte aè nei hoì ta ù mata i te ora na òe.* » Ia tiaì mai ā te Atua ora ia tātou i te roaaraa o ta tātou araraa i teie pō e ia hitihia tātou e to na māramarama parau tià. Amene.

Tuhaa piti

Taiòraa : Mātaio 10, ìrava 34-42

Ìrava faaitoitoraa : Mātaio 10, ìrava 39 : «*O te tāpeà i to na ora, e ère ia i to na ora ; âreà te tuu noa i to na ora no ù nei, e ora ia to na*»

E hoa here mā, i te ùtu o te tau âpī e hohorahia nei no tātou, te tuuhia mai nei teie parau ta letu i horoà i ta na mau pipi i muri aè i to na tonoraa ia rātou i roto i te mau ôire rii no to na fenua no te faaite haere i te parau o te hau o te Atua. Te hoê teie o te mau parau ta na i hinaaro e horoà ia rātou no te tauturu e no te haapii ā ia rātou i te huru mau no te tāviniraa ta na e tītau ra ia rātou :

«*O te tāpeà i to na ora, e ère ia i to na ora ; âreà te tuu noa i to na ora no ù nei, e ora ia to na.*»

E piti tuhaa pāpū e vai ra i roto i teie parau a letu, o ta tātou e tano e faaau i nā èà e piti, te èà no te pohe e te èà no te ora. I mua i teie nā parau, te tītauhia nei te mau pipi ia feruri e ia māiti i te èà e au ia rātou tātai tahi e ia hiòhia, tei ia rātou tātai tahi te parau no to rātou ora, te mea e tītauhia ia rātou, te hiòraa ia e aha ta rātou e rave, e nā hea rātou i te faaòhipa i taua ora. Tei ia rātou te faaotiraa : ia tāpeà ra, ua ère ia i te ora, ia tuu ra, e ora ia. E tano e parau e, e tītauraa rahi teie e vai ra i mua ia rātou, e te horoà ra te Fatu i te tiàmāraa ia rātou. Tei ia rātou tātai tahi te parau no to rātou ora, tei te huru no ta rātou feruriraa e ta rātou faaotiraa.

E tāmata tātou e hiò i teie nā parau e piti. Te nā ô ra te tuhaa matamua : «*O te tāpeà i to na ora, e ère ia i to na ora.*» E aha taua ora e parauhia ra. E haamanaò tātou e, ua tonohia na te mau pipi na te mau ôire no te poro haere i te parau o te hau o te Atua, ua haere rātou na te mau āroa, na te mau ùtuafare mā te hopoi i te tahi parau ora, te parau o te aroha o te Atua, te parau maitai no te pātireia o te Atua. E

faaahoraa pāpū atoà ta te Fatu i horoà ia rātou hou rātou a tere ai no te huru o ta rātou faaìteraa, e te huru hoì no te fāriiraa a te taata i taua parau ora. Ua tonohia rātou no te faaìte, no te hopoi i te parau maitaì. Ta rātou tuhaa rahi, o te horoàraa ia i taua parau ora. No reira, ia parau te Fatu i roto i ta tātou ìrava e, « *o te tāpeà i to na ora, e ère ia i to na ora* », taua ora ra, o te parau ia a te Atua, te parau i riro mai ei taata, te parau e faatupu i te ora. Eere rātou te fatu o taua ora, o te Atua rā, ta rātou o te horoàraa ia, te faaìteraa, te ôpereraa. No reira Ietu i parau ai i roto i te piti o te tuhaa no ta tātou ìrava : « *O te tuu i taua ora no ì nei, e ora ia to na.* » Nā roto i te tuuraa e roaa ai te ora, nā roto i te faaèreraa ia òe iho e ìte ai òe i te ora. Aita teie parau i taaê i te parau no te huero ta Ietu i faahiti i roto i te Ioane 12,24 : "*...ia tuuhia te hoê huero titona i raro i te repo ia òre rā ia pohe ra, ua vai iho hoê noa ia, ia pohe rā, rahi roa atu ra ia te hotu. O te nounou i to na ora, ua ère ia i te ora, e te òre i hinaaro i to na ora i teie nei ao, e ora mure òre ia to na i te ao a muri nei.* » No reira, te ìte ra ia tātou i te haapiiraa a Ietu no ta na mau pipi e te tītauraa ta teie parau e haamanaò mai ia tātou : e ère tātou i te ora ia tāpeà tātou i te ora, âreà ia tuu ra e ora ia tātou i teie ao e te ao a muri nei. Te faaèreraa i te ora, o te ôpereraa ia taua ora, te haereraa e faaìte, e faaòhipa ia fānaò atoà te tahi pae i taua ora. O te Fatu iho tei horoà i te faanahoraa e au no te taata, o ia tei pupu i to na tāatoàraa no to te ao ia roaa te ora mure òre i to te ao.

Nā roto i to na faaèreraa ia na iho i ora ai o ia e i ora ai to te ao ia na. O te tītauraa ia ta na e tuu atoà ra i mua ia tātou i teie pō. Ua rave tātou i te mau tuhaa i tītauhia ia tātou no te faaìte i te parau maitaì a te Atua e i te taima tātou e tomo ai i roto i te tau âpī, te haamanaò faahou nei ta tātou taiòraa i te èà e au ia tātou ia rave i roto i teie matahiti âpī. Ia tauturu mai te Fatu ia tātou i te roaraa o teie matahiti âpī... e ani tātou i te Atua ia horoà mai ā i to na Vārua maitaì no te arataì e no te tauturu ia tātou i roto i ta tātou faaìteraa, ta tātou ôpereraa, ta tātou faaòhiparaa i te parau ora...

Maeva e Manava e te Atua, i teie Matahiti âpī

Emma FAUA-TUFARIUA

Pureraa no te matahiti âpī 2003

Torota 3/12-17

15- « ia vai hua rā te parau a te Metia i roto ia òutou mā te ìte pāpū atoà ra,... »

È hoa ìno mā e, ia ora na roa i te aroha o te Atua i to tātou nei fārereira i teie nei matahiti âpī. Ia haamaitāhia te Atua tei aratai mai ia tātou i te roaraa no te matahiti i mahemo e tae roa mai i teie mahana. Tāpaò faaite te reira i to na here ôtiā òre i te taata nei.

Aita atoà rā e moèhia ra ia tātou e i te ômuaraa o teie matahiti, e rave rahi te parahi nei i roto i te àti e te ahoaho. No te mau tamaì ānci, te vero ānci, te poiā e te oè,...Ei ômuaraa i teie matahiti âpī, Ua maitihia mai teie nei faaitoitoraa ta te apotetoro Pauro i to te Ètārētia no Torota ei faaitoitoraa atoà e au ia tātou i te fenua nei. È mai te mau tere atoà, e mea tiā ia faaincine māite tātou i teie tere 2003. È ère i te tahi tere fatata ; no reira, ia hiòhiò māite ia tātou i te mea e tano ia tātou ia rave ia òre ia moèhia te àveciā ta te Fatu i hinaaro ia rave tātou.

I to te apotetoro pāpāraa i teie nei epitetore, ua tapeàhia o ia i roto i te fare tapeàraa. È i to na faarooraa i teie mau parau âpī, ua hinaaro o ia i te faaite i te mau mero no teie nei Ètārētia iti no Torota i to na manaò faaitoito ia rātou i mua i te mau haafifiraa o ta rātou e fārerei ra. Oia hoì, to te Ètārētia iho, tomoraa i roto i te tahi arataira faaroo tei òre i tūāti faahou i te tītauraa tumu a te Èvaneria i faaitehia ia rātou i roto i te tino o te Metia. Mai te mau Ètārētia i haamau âpī-hia, tei fārerei atoà i te fifi. Fifi ānci i roto i te mau tūātiraa, i roto ānci i te mau faatere, i te pae ānci no te hiroà faaroo,...I Torota, te mua rātou i te fifi no te tahi arataira tei haamauhia i niā i te paari o te fēruriraa o te taata. È ère atu ra rā i niā i te Metia, te Tumu mau o te Ètārētia. Te auraa, te hahi atu ra te Ètārētia i te arataira a te tahi mau òrometua haavare tei nā reira atoà atu i te poro i ta rātou mau tiaturiraa.

Ore noa atu ai Pauro i tae roa i roto i teie nei Ètārētia, e mea pāpū rā e, ua tui to na roo i teie mau pae fenua e i roto roa i teie nei Ètārētia. I tiā roa ai ia na ia horoà i teie mau manaò paari no te faahoì i to Torota i niā i te àveciā o te Èvaneria i noaa ia na i roto i te Metia e o ta na atoà hoì i faatae i roto i te tahi atu mau Ètārētia no te faaitoito atoà ia rātou.

I roto i teie tau ìrava i faataahia no teie poipoi, te ìte ra tātou i te manaò o te apotetoro i te haapāpūraa i niā i te aroha **taeaè** i roto i te Metia e tiā i to Torota ia rave ei niu no to rātou faaroo e no te oraraa āmui o te Ètārētia. No te mea, o te reira te hohoà ta te Fatu iho i faaite mai i to teie nei ao ia noaa ia tātou te ora e te maitai e ia hanahana te Atua.

Te riro nei te parau no te here e te aroha ei fā no te oraraa faaroo i roto i te manaò o Pauro. Te huru te reira e tiā i te mau marumetia ia rave i roto i to rātou oraraa. I roto ānci i te Ètārētia e aore ia i roto ānci i te oraraa no te mau mahana atoà. Aita e parau i niā atu i teie ia faaauhia i te mau tītauraa a te Fatu.

I te ômuaraa o teie matahiti 2003, te riro nei te faaitoitōraa a te apotetoro ei poroì o tē tano ia ravehia no te arataìraa i te Ètārētia e no te faatitōraa ia na i roto i ta na faaitēraa i te hinaaro o te Atua. Mai te Ètārētia i Torota, i topa i raro aè i te manaò e te hinaaro o te taata, oia atoà te Ètārētia a te Metia (oia hoì te feiā atoà i fārii i te Metia ei Fatu) te topa atoà nei i te tahi taime i roto i teie huru tāmatarāa. No reira, ia vai ara noa te Ètārētia i mua i teie huru tāmatarāa, ia òre ta na faaitēraa ia riro noa ei faaitēraa i te paari o te taata. Eì faaitēraa rā i te Èvaneria a te Metia, ia itea te here e te aroha o te Atua i te taata nei.

**« ia vai hua rā te parau a te Metia i roto ia òutou mā te ite pāpū atoà
ra,... »**

Te parau a te Metia ei māa no te faaroo e no te tiàrama no te oraraa o tei faaroo i te Metia :

No te tamata i te faaāfaro i teie fifi i roto i te Ètārētia no Torota, te hinaaro nei te apotetoro ia fāriu te tātoà i nià i te mau haapiirāa a te Metia nā mua roa. O te òrometua maitāi roa ia e tià ia faaroohia. Aita te apotetoro e tuu nei i to na mau manaò i mua ia rahi o ia, ia rahi rā te Fatu o ta e hinaaro nei i te tāvini. Aita atoà e hinaaro nei e ia rahi roa atu te fifi e te āmahamaha i roto i teie āmuirāa i muri aè i teie nei epitetore ta na e pāpai nei. Aita hoì e ìmi nei i te rāvēa ia piri mai te taata ia na, te ìmi nei i te rāvēa ia tupu mau te hoēraa o te tino o te Metia nā roto i teie Ètārētia i to Torota.

Ua tātou e te mau fifi i fāreirehia mai e te ora-noa-hia nei e te Ètārētia, no roto mai ia i te manaò taata, i te taime ihoā rā e moè ai ia na, e no vai o ia i tāvini ai, e o vai te Fatu o ta na e tāvini nei. Oia hoì, i te taime a manaò ai o ia e, o ia iho to na Fatu e o ia iho te Fatu o te òhipa o ta na e rave ra. No reira, te tāpēraa i te parua a te Metia i roto ia tātou o te rāvēa maitāi ia e òre ai te Ètārētia e atea i to na Fatu.


Te parau a te Metia, ei parau tei faahuruê i te oraraa o tei faaroo ia na :

E parau tumu atoà teie i roto i te mau manaò o te apotetoro, te faataaraa i te mau mea i orahia i mutaa ra e te oraraa āpī i horoà mai e te Atua nā roto i te Metia. No te here e te aroha fāito òre o te Atua i te taata nei, e ère rā e no te mea, e au te reira ia tātou e i to tātou faaroo. Te Atua iho te tumu o te mau maitāi o ta tātou e fānaò noa nei.


Aita to teie nā huru piti nei e tūātirāa. Tei faaroo i te Tamaiti, ua riro i teie nei ei taata āpī. Eiaha i ta te taata i faaāpī, i ta te Atua rā nā roto i te ta na Tamaiti. E tano atoà i te Ètārētia e i te mau marumetia ia tapeà i te huru āpī i horoàhia ia na. Te āpīraa, e ère ia no te taime noa o te tauirāa, e i muri aè a tahito atu ai. Te faaāpīraa ta te Èvaneria e faatupu, no te mau mahana atoà ia, no te mau poipoi atoà, no te mea e PARAU ORA te Èvaneria. E au o ia mai te pape pihaa ta te Fatu i parau atu i te vahine Tamāria. Ia riro atoà ia teie mau faaitoitōraa ta te apotetoro ei mau parau tei faaāpī ia tātou i te ômuaraa o teie matahiti e tac noa atu i to na hoīraa mai...

Ia haamaitāi mai te Atua i to na here e i to na aroha i te roaraa no teie tau āpī 2003.

Taarii òrometua



Ètārētia Èvaneria i Porinetia Farāni
VEÀ ÒROMETUA



Èpitetore pāpaihia ei Faaitoitoraa
 E ei tāāmuraa i te mau Tāvini o te Atua
 Tonohia e te Ètārētia

Papeete, i te 25 no mati 2003

RATA HAAATI

I te mau òrometua e vai i roto i na Tuhaa e
 8 o te Etaretia evaneria i Porinetia farani

Ia ora na i te aroha o te Atua i te farereiraa i teie matahiti 2003.

Terâ mai ta tatou mau hohoà poroi no ta tatou mau Oroà pureraa i muri nei (i faaineinehia mai e te tahi mau taëaè, o ta tatou e haamauruuru maitai nei) :

1) Hepetoma moà :


- Tapati no te mau Amaa (Oroà Euhari-Tapati 13 no èperēra 2003) (Teraì a IHORAI)
- Monire 14 no èperēra. (Teraì a IHORAI)
- Mahana piti 15 no èperēra (Teraì a IHORAI)
- Mahana toru 16 no èperēra (Teraì a IHORAI)
- Mahana maa 19 no èperēra (Teraì a IHORAI)
- Pâta (Oroà Euhari-Mahana maha 20 no èperēra) (Teraì a IHORAI)

2) Revaraa (Oroà Euhari-Mahana maha 29 no mē) (Taarii òrometua)

3) Penetetote (Oroà Euhari-Tapati 8 no tiunu) (Natupuaì òrometua)

Te haamanaðhia atu nei outou e, i pihai iho i te mau pureraa ahiahi atoà no te Hepetoma-moà, e pureraa Faraite poheraa e te haapaeraa ta tatou, o te haamata mai i te hora 8 i te poipoi e tae atu i te hora 2 i te avatea. No reira, ia faaineine-maite-hia taua Oroà pureraa ra no to tatou tiàturi i te faufaa o ta tatou aroraa no te tupuraa o te hau, e te parautià, e te aroha i ô tatou nei e i roto i teie nei ao.

Ia itoito e ia oaoa noa i roto i te parau no te taviniraa.



Jacques IHORAI òrometua

« To Ietu tomoraa i Ierutarema »

Tapati 13 no èperēra 2003

Māreto 11 : 1 – 11

« Te aroha ia rahi ! »

Te hiò noa ra te taata ia Ietu i te tomoraa atu i Ierutarema ma te parahi i nià i te hoê pinia atini i ore ā i parahihia e te taata, aita râ ratou e ite ra e, o vai mau râ terâ e parahi ra i nià i te fanauà atini.

I hea tatou i te iteraa i te ite-ore o te taata i te parau o Ietu e parahi ra i nià i te pinia atini. Tei roto ia i ta ratou faahanahanaraa ia Ietu. Teie ta ratou faahanahanaraa ia Ietu : « *Hotana i te Tamaiti a Tavita !* » Eere râ e : « *Hotana i te Tamaiti a te Atua* ». E inaha hoi, i nià i te fanauà atini, o te Tamaiti a te Atua terâ e parahi ra i nià iho, eere râ o Apataroma.

E mea ê ihoa râ te parau no te hiò e e mea ê atoà te parau no te ite.

Te hiò, e òhipa ia na te mata. Te ite, e òhipa ia na te aau. Eita e tià i te taata i pōuri te mata ia hiò, e tià râ i te taata i pōuri te mata e i ore i pōuri te mata ia ite no te mea e òhipa te ite na te aau, eere râ na te mata.

E tià ia parauhia e, i ô nei, i te mahana i tomo ai Ietu i Ierutarema na nià i te fanauà atini, ua pô te aau o te taata no te mea te hiò ra ratou Ietu i nià i te pinia atini, aita râ ratou e ite ra e, o vai râ terâ e parahi ra i nià i te fanauà atini.

Ahiri i to Ietu tomoraa i Ierutarema na nià i te pinia atini, i tià mai o ia i muri roa i te pupu e apee ra ia na mai Tarirea mai, mai te mau pipi, eita e ore te tano ta ratou oreraa i te ite ia Ietu ei Tamaiti na te Atua no te mea tei muri roa o ia i te pupu taata i te tiàraa, aita râ i mua i te pupu.

Eita e ore e, o te tumu ia Ietu i tià ai i mua roa i te pupu, eiaha râ i muri, ia ite maitai te taata e, o te Tamaiti a te Atua teie e tomo atu nei i roto i te oire no Ierutarema oia hoi te Parau a te Atua o tei riro mai ei taata, te Faraoa no te rai mai o tei pou mai i nià i te fenua nei no te horoà i te ora i te taata.

Eaha râ te tumu, noa atu ai to Ietu tomoraa i Ierutarema na nià i te fanauà atini ma te tià i mua roa i te pupu, eiaha râ i muri i te pupu, i ore ai te taata i ite ia Ietu ei Tamaiti na te Atua, ei Parau na te Atua o tei riro mai ei taata, e ei Faraoa no te rai mai o tei pou mai i nià i te fenua no te horoà i te ora i te taata.

No te aha.

Teie te tumu : ua tapô e aore ia ua opani ratou i to ratou aau ia Ietu no te ite ia na ei Tamaiti na te Atua.

Areâ râ te mau tapaò (temeio) atoà, mai te parau anei o to Rataro faahoiraaia mai mai te pohe mai i roto i te ora, e ite ai te taata ia na ei Tamaiti na te Atua, ua oti ia i te ravehia e Ietu. Te toe, o to te taata ia iteraa. O to te taata ia faarooraa.

O to te taata ia iteraa. O to te taata ia faarooraa. Oia ia.

E ere râ e, na Ietu te iteraa no tatou ia na ei Tamaiti na te Atua E ere atoà e, na na te faarooraa no tatou ia na ei Tamaiti na te Atua, na oe râ, na ù e na tatou iho. No Ietu iho to na vaha. No na iho to na tarià. No na iho to na aau. No tatou iho râ to tatou aau. No tatou iho to tatou tarià. No tatou iho to tatou vaha.

Ahiri Ietu e, eere i te Tamaiti a te Atua, eita e ore te pinia atini e parahihia ra e ana i te huri ia Ietu i raro i te repo no te mea na te Tamaiti anaè na te Atua, ia haere mai o ia i te ao nei, e parahi i nià iho ia na na mua roa. Ahiri terâ taata e parahi ra i nià iho ia na i te taata mai ia tatou nei, eita o ia e ore i te tià noa i nià i te purumu no te ore e haere faahou i mua e no te tomo i roto i te oire no Ierutarema, mai te atini a Paraama. Ua ite râ o ia e, o vai ta na e amo ra i nià i to na tua, i haere ai o ia i mua.

Aita te atini, mai te mau animara atoà o te ao nei, i hamanihia ia au i te huru e i te hohoà o te Atua. O te taata râ e o te taata anaè tei hamanihia ia au i te hohoà e ia au atoà i te huru o te Atua. Teie te auraa no teie parau, o te taata o te ite e, o vai râ Ietru, eiaha râ te pinia atini. Area râ i to Ietu tomoraa i roto ia Ierutarema, mai te mea ra e, o te pinia atini tei ite e, o vai râ terâ e parahi ra i nià i to na tua, aita râ te taata.

E tià anei ia parauhia, i ô nei e, e mea vitiviti aè te pinia atini i te ite e i te faaroo i te taata.

I te mahana i tomo ai Ietu i Ierutarema na nià i te fanauà atini mai te Tamaiti a te Atua, e tamaiti na Tavita ta te taata i ite atu e, inaha hoi, i taua mahana ra, ua hau atu i te tamaiti a Tavita o te parahi ra i nià i te pinia atini oia hoi te Tamaiti a te Atua.

Eita e ore e, o te tumu ia Ietu i faaea mamû noa ai i nià i te pinia atini, i te taima te pii noa ra te taata ia na, eiaha ei Tamaiti na te Atua, ei tamaiti noa râ na Tavita.

E ia ore anaè te taata e ite ia Ietu ei veà tonohia mai e te Atua no te faaite i to na aroha e i to na here i te taata, noa atu e, eere i te ati-Iuta, ia ore anaè te taata, mai to na iho nunaa, ia ite na roto i te mau tapaò i ravehia e ana i rotopû i te ati-Iuta e i rotopû i te etene, no te etene e no te ati-Iuta, ia ore anaè te ati-Iuta ia ite ia na ei Tamaiti na te Atua maori râ ei tamaiti noa na Tavita, no te aha e ore ai e tià ia Ietu ia faaea mamû noa i te taima te pii noa ra te taata : « Ia ora na, e te Tamaiti a Tavita ! » E te reira, ei patoiraa i te hiòraa i te Atua, na roto ia na, ei Atua no te ati-Iuta e no te ati-Iuta anaè, eiaha râ no te etene, no te Roma, no te Hereni, no te Maòhi, no te Tinito, no te Farani...

No te mea te piiraa e : « Ia ora na, e te tamaiti a Tavita ! » O terâ to na auraa ! « No te ora anaè o te ati-Iuta te Atua i Atua ai, eere râ no te ora o te mau nunaa atoà eere i te ati-Iuta . E, inaha, i nià i te pinia atini, o te Tamaiti a te Atua terâ e parahi ra oia hoi te Tamaiti e na reira ai te Atua i te faaite i to na aroha e i to na here i te mau nunaa atoà o te ao nei, noa atu e, e riro te pohe ei tapaò atoà e itehia ai taua aroha e taua here no na ra i te taata.

Te hinaaro o te Atua ia ora tatou, ua faaitehia ia e Ietu na roto i te mau tapaò (temeio) i ravehia e ana e e na roto i te pohe tatauro o ta na farii i teie hepetoma. Na na anaè râ te hinaaro, na tatou te fariiraa.

Aita e ora e e oaoa i rapae mai i te parau no te fariiraa ia Ietu i roto i to tatou oraraa. Aita e aita. Ua farii anei tatou ia na i roto i to tatou aau e i to tatou oraraa, mai te pinia atini i farii ia Ietu i nià i tona tua. Tei ia tatou ra te pahonora a i taua uiraa ra i te Atua no tatou.

E tae mai râ te mahana e haere faahou mai ai Ietu, eiaha na nià i te pinia atini, na nià râ i te ata, no te haavâ ia tatou, ia au i ta tatou iteraa e aore ia i ta tatou hiòraa ia Ietu.

Eere râ Ietu i te tamaiti na Tavita. E Tamaiti na te Atua.

Te aroha ia rahi !

Jacques, Terai a IHORAI òrometua

Hepetoma – moà 2003

Pô monire 14 no èperēra 2003

O Ietu, o Petero e te moa

Mātaio 26 : 69-75

I te hunaraa Petero ia Ietu, i to na hoa e i ta na orometua, i te taata i ore i matauhia e ana, ua aaoa te moa.

Terâ aaoaraa na te moa, eere ia i te aaoaraa noa, e faaara-atoà-raa râ na te moa i te taata e haaati ra ia Petero e, ua ite o Petero e, o vai râ Ietu.

Teie te auraa, te ohipa i ore i maraa i te taata ra ia Petero i te rave, na te moa i amo. Teie te auraa, te faahanahanaraa ia Ietu i te taima e au ai ia faahanahanahia Ietu, tei ore i maraa ia Petero i te rave, na te moa i rave.

E taata itehia o Petero no te vitiviti i te feruri i te parau, no te rave i te faaotiraa, no te pahono i te mau titauraa a te Fatu. I ô nei, te vitiviti noa ra â Petero, eiaha râ no te faî i to na faaroo ia Ietu, no te huna râ ia Ietu, no te turai ia Ietu i roto i te apoo, no te pûpû ia Ietu i roto i te vaha no te pohe.

Aita râ tatou e faahapa ra ia Petero i mua i to na paruparu. No te aha. No te mea te tiâturi nei tatou e, aita tatou i taaê atu ia na, i te mea e, te huna noa atoà nei tatou ia Ietu i roto i to tatou oraraa, na roto anei i to tatou mamû-noa-raa i mua i te tupuraa o te hoê mau ohipa piò o te ore e tià ia tatou ia vaiiho noa.

Mai te peu râ e, e mea maitai aè ihoa tatou ia Petero, ia aaoa anaè te moa, a rave a taora i te ofai.

Teie râ, eere anei ihoa e hoê â tatou e o Petero. No reira, ia ara tatou i te taoraraa i te moa i te ofai oi hoi mai taua ofai ra i nià i te taata taora !

Te aroha ia rahi !

Jacques, Teraì a IHORAI orometua

Hepetoma – moà 2003

Pô mahana piti 15 no èperēra 2003

No te aau i opanihia, ei reo no te vâvâ no na

Mātaio 27 : 1-14

E mea varavara tatou i te ite ia Ietu i te mamûraa i te taime e aa ai te taata ia na.

No te aha ia, i ô nei, i mua i te aro o Pirato, te Tomite teitei no te Hau Roma i Iutea, Ietu i mamû ai. No te aha.

Mai te peu e, ua mamû Ietu, i ô nei, i mua i te aro o Pirato, e ere ia e, no to Ietu mataù ia Pirato e aore ia i te mau faatere no te haapaòraa ati-Iuta. Eere. No te mea râ ua faaoti aè na ratou i te pūpū ia na i roto i te rima no te pohe aita â ia Ietu i hamama atura i to na vaha no te paruru ia na.

Aita Ietu i mataro, oia ia, ì te tapiri i to na vaha i mua i te mau faahaparaa tià-òre a te taata ia na, teie râ ia opani anaè te taata i to na aau i mua i te parautià e i te here no te Atua i te taata, eaha te mea tià aè ia rave, eere anei e, o te faaea-mamû-noa-raa.

I faaite aè nei Ietu na roto i te mau tapaò i ravehia e ana e e na roto atoà i te parau e, o vai râ o ia oia hoi e Tamaiti na te Atua, aita râ te taata i faaroo.

Penei aè ia, mai ta tatou e ite ra, i ô nei, ia mamû Ietu, i reira ia te taata e faaroo ai. Penei aè.

No Ietu te vaha, no tatou râ te tarià. Na Ietu te parau, na tatou râ te faarooaa.

Te aroha ia rahi !

Jacques, Teraì a IHORAI orometua

Hepetoma – moà 2003

Pô mahana toru 16 no èperēra 2003

E tià anei ia tatou ia taparahi i te reo

Mātaio 27 : 15-30

Eere i te ohipa ite-pinepine-hia te parau no to te hoê taata i faaèrehia i to na tiàmâraa (te ati-Iuta) tapiriraa atu i te taata i faaère ia na i to na tiàmâraa (te Roma) no te faatupu i te hoê ohipa ino.

I ô nei, i roto i ta tatou taiòraa no teie pô, ua tahoê te ati-Iuta e te Roma no te taparahi i te ati-Iuta ra ia Ietu. No reira, te vahi apî e te vahi maere, eere e, ia opua te feia i faaère i te tiàmâraa (colonisateur) o te hoê nunaa i te parau no te faatereraa ia na iho i te taparahi i te taata i faaèrehia e ana te tiàmâraa no te faatere ia na iho (colonisé) , ia opua râ te taata i faaèrehia i to na tiàmâraa (colonisé) i te taparahi i te hoê taata i faaèrehia i to na tiàmâraa (colonisé).

O te reira te vahi apî e te vahi maere oia hoi ia hinaaro te ati-Iuta i te taparahi i te ati-Iuta.

No te aha Ietu i hinaarohia ai e taparahi e te ati-Iuta e te Roma.

Te pahonora, no te mea ia, aita Ietu i tapiri i to na vaha i mua i te mau peu tià-ore e ravehia ra e te nunaa, e te poritita e e te haapaòraa i roto i te fenua, mai te parau anei no te haamoriraa i te moni, te petaraa, te eiâraa...

Te hoê taata, mai terâ te huru oia hoi o te ore e tapiri i to na vaha, to na mata e to na tarià i mua i te tupuraa no te hoê mau ohipa piò, eita o ia e auhia. E no te mea, eita o ia e auhia, terâ ia te ohipa e rave, noa atu e, eere i te ohipa tià oia hoi te taparahi-pohe-roa-raa ia na.

I ô nei, te vai ra te parau no te pohe e no te taata pohe.

Teie râ, ia manaò anaè tatou, e pohe anei te reo ia tatou i te taparahi oia hoi te reo o te hoê taata tei here ia tatou.

Te aroha ia rahi !

Jacques, Teraì a IHORAI orometua

Hepetoma – moà 2003

Pô mahana maa 19 no èperēra 2003

No Ietu te vaha, no tatou te tarià.

Mataio 27 : 57-66

I te parauraa Ietu, hou aè to na poheraa, i nià i te tatauro e : « *Ua oti.* » Na ôraa ïa te mau vahine i toe atoà atu i te pae avae no te tatauro o Ietu : « *Te mea i orahia mai e tatou e o Ietu, a toru matahiti i teie nei, ua oti, ua topa i muri, eiaha e parau faahou. Ua pau tatou. E mea puai aè ihoa te pohe i te ora.* »

Aita ratou i ite e, i muri mai i taua parau ra, te haapapû ra Ietu i to na Metua e, te here faito-ore no na i te taata, ua oti ïa i te faaitehia e ana, ua afaihia e ana i nià i to na vairaa.

No reira, to ratou tere i nià i te menema i te ahiahi no te mahana i pohe ai Ietu, eere ïa i te mea turuhia e terâ tiàturiraa e, e mea puai aè te ora i te pohe, i terâ râ tiàturiraa e, e mea puai aè te pohe i te ora. Teie to na auraa : te fanauhia nei tatou, te ora nei tatou e te pohe nei, i te hoê mahana.

Mai roto mai i te opu o to tatou metua vahine, te hoi nei tatou i raro i te repo, i te vahi no reira mai tatou i te raveraahia mai.

No reira, e parau āoāoā, no ratou, te parau no te haereraa mai i rapae i te menema i muri aè i te poheraa.

Ua pohe anaè te taata, ua pohe ïa. Aita to na e parau faahou.

Eere râ e, o ta Ietu ïa i haapii ia ratou e i ta na mau pipi. E pohe o na, oia ïa, e tià faahou mai râ o ïa i nià i te toru o te mahana, i muri aè i to na poheraa.

Te parau faahou nei tatou i teie pô e : « *Na Ietu anaè te parauraa mai ia tatou e, e tià faahou mai o ïa i nià, i muri aè i to na poheraa, na tatou râ te faaroora* ».

Te aroha ia rahi !

Jacques, Terà a IHORAI orometua

Te tiàfaahouraa o Ietu

Tapati 20 no èperēra 2003

Mataio 28 : 1-10

« ...Ua farerei maira Ietu ia raua, na ô maira, *Ia ora na.* » (Mataio 28, 9).

O te parau matamua roa ia i mahiti mai mai roto mai i te vaha o Ietu i te mahana i tià faahou mai ai o ia mai te pohe mai oia hoi i te toru o te mahana i muri aè i to na poheraa.

« *Ia ora na.* »

Ei haamanaòraa teie nei parau ia Maria mâ i haere atu i taua aahiata râ i te mahana matamua o te hepetoma (le dimanche) e ia tatou e, aita e hinaaro ê atu i roto i te aau o te Atua, ia na i hamani i te taata maori râ ia ora te taata, eiaha râ ia pohe.

Areà râ, eere a tahi roa ra taimē i faaite ai te Atua i to na hinaaro ia ora te taata i hamanihia e ana. Ua faaite aè na te Atua i te reira i te taata na roto i te tapaò no te raì e no te fenua i rahuhia e ana i te matamua ra, aita râ te reira i riro ei tumu e iriti ai te taata i te uputa o to na aau ma te faaea-ore. E no te mea aita te reira i ravai no te taata, ua maiti te Atua i te hoê nunaa oia hoi i te nunaa Iteraèra, eiaha no to na maitai, no to na iho râ hinaaro tiàmâ, ei tapaò e na reira ai o ia i te faaite i te mau nunaa atoà o te ao nei i to na here i te taata i hamanihia e ana e i to na hinaaro ia ora te taata, aita râ te reira i riro atoà ei raveà e iriti mau ai te taata i te uputa o to na aau i taua hinaaro ra no te Atua ia na. E no te mea aita atoà te reira raveà i manuia, ua faatupu te Atua i teie tapaò no te tiàfaahouraa o ta na Tamaiti otahi mai te pohe mai ei raveà hopeà roa no te faaiteraa e no te haamanaòraa i te taata o ta na i hamani i to na hinaaro ia ora te taata e a muri noa atu.

Eere teie hinaaro i to te Atua ia ora te taata i te hinaaro no teie mahana, no nanahi ra râ. Areà râ, i mua i te huru tupuraa no te manaò o te taata e no te hinaaro o te taata, te ètaèta o to na aau i te farii i te Atua, tei rahu i te raì e i te fenua e tei hamani i te taata, ei Atua no te here e no te ora, eiaha râ no te ino e no te pohe, e hapehia e, ia faatupu anaè te Atua i te hoê tapaò, i teie mahana e aore ia ananahi, no te haamanaòraa i te taata i to na hinaaro tumu ia ora te taata, e hapehia e, e ohipa apî, e inaha hoi, e ohipa no nanahi râ.

I ô nei râ, i roto i teie tapaò (signe) no te tiàfaahouraa o Ietu mai te pohe mai to te Atua faahope-roa-raa i te tapaò no te here, no te aroha e no te hinaaro no na ia ora te taata i hamanihia e ana.

I teie mahana i tiàfaahou mai ai Ietu mai te pohe mai to te Atua haamanaòraa i te taata e, te hinaaro no na i te taata i nanahi ra ia ora te taata, aita o na i tau i teie mahana, te vai noa ra râ o ia i nià i to na vairaa.

Te toe, o to te taata ia iritiraa i te uputa o to na aau no te farii i te Atua, i haerehia mai e te Tamaiti e heheu mai te hoê Metua ra te huru, mai te hoê Atua tei pohe roa i te here e i te hinaaro i te ora o te taata.

Na te Atua te patoto, na tatou râ te iriti i te uputa o to tatou piha-aau ia na.

Ia ore anaè tatou ia iriti, « *Te fifi, eere ia no te taata parau, no te taata râ e parauhia ra.* »

Te parau matamua roa i faahitihia e Ietu i te mahana i tià faahou mai ai o ia mai te pohe mai, o terâ ia parau e : « *Ia ora na.* » E te na ô atoà ra te papai evaneria ra o Mataio e, i muri aè i to Ietu parauraa atu ia Maria i Matatara mâ e : « *Ia ora na.* » Ua haafatata atu raua ia Ietu, ua tapeà i to na avae e ua tahopu ia na. Teie te auraa : ua ite raua e ua faaroo atoà e, ua hoi mai Ietu mai te pohe mai i roto i te ora, ia au ihoa mai ta na i poroi mai ia ratou oia hoi ia raua e i ta na mau pipi. Teie atoà te auraa : ahiri e, aita Ietu i farerei mai ia raua, eita te parau no te tiàfaahouraa o Ietu e riro ei parau mau no raua maori râ no Ietu anaè.

No reira, teie huru aroha o ta tatou e parau noa nei ia farerei tatou i te taata e : « *Ia ora na.* » Eere ia i te parau na tatou, na Ietu râ, na na o tei hinaaro i te taata ia ora. E o tei hinaaro i te ora o te taata, noa atu e, o vai, no te mea ua tiàturi o ia i te Atua mai te hoê Metua tei hinaaro i te ora o te taata, teie hoi to na tapaò oia hoi te tiàfaahouraa o ta na Tamaiti otahi mai te pohe mai, na na atoà teie parau. E ia parau o ia e : « *Ia ora na.* » Teie to na auraa, te parau ra o ia ia na iho e : « *Ia ora te taata o ta ù e aroha ra. Ia riro o ia na ù ei manaònaòraa tumu. Ia riro vau no na ei tiai. Ia ora o ia i te here no ù ia na, eiaha rā ia pohe.* »

No reira ia faaroo anaè tatou i te hoê taata ia parau e : « *Ia ora na.* » E ohie noa tatou i te ite e, e taata terâ, e vahine e aore ia e tane, no te tiàfaahouraa e e no te tiàfaahouraa ra, no te ora ia o te taata.

Te auraa, te taata i ore i tiàturi i te parau no te tiàfaahouraa o Ietu mai te pohe mai, eita e tià ia na ia parau e : « *Ia ora na.* » No te mea aita o ia i tiàturi i te parau mau no te tiàfaahouraa o Ietu mai te pohe mai. Ia tiàturi anaè râ o ia, e tià ia ia na ia parau i muri mai ia Ietu e : « *Ia ora na.* »

No te ora e no te ora anaè ra te Atua i hamani ai ia tatou, eere râ no te pohe. To na tapaò e te tapaò no te mau tapaò maori râ o to na ia faahoiraa mai i ta na Tamaiti otahi mai te pohe mai i roto i te ora.

Ua faaroo tatou ra, a faaroo â ia. E aitâ tatou i faaroo ra, e faaroo ia.

Te aroha ia rahi !

Jacques, Teraì a IHORAI òrometua

Pureraa no te revaraa
29 no mē 2003

Taiòraa :

Ohipa 1/1-11

Èfētia 4/1-13

Mareto 16/15-20

E hoa ìno mā e, ia ora na roa i te aroha o te Atua i teie nei mahana Revaraa no to tātou Fatu i pihai iho i to na Metua. Mai te mea, te reva nei o ia, e ère ia no te vaiiho ôtare mai ia tātou i te mea e, e tono mai o ia i te Vārua faaaò i rotopū ia tātou no te aratai e no te tauturu ia tātou i te faaìteraa i te Èvaneria i to teie nei ao.

Eiaha rā ia moèhia ia tātou e, i to te Fatu haereà mai i roto i teie nei ao, ua haere mai o ia ia au i te huru o te taata e no te ora i rotopū i te mau taata. E i to na pārahi fatataraa i te taata, ua faaite mai o ia i te òhipa e au i te taata ia rave no te faatupu i te hinaaro o to na Metua. Aita hoê mea i hunahia ia òre tātou te taata nei ia ìte. Te toe noa ia tātou te raveraa i te mau mea o ta na i parau mai.

Mai te hoê òrometua i muri aè i to na faaineineraa i ta na mau pipi, ua tae atoà ia i te taima no te vaiihoraa mai ia rātou i mua i te òhipa e tiaì mai ra ia rātou ia ìte to te ao e ia fāi i te aroha e te here o te Atua.

No reira, te revaraa o te Fatu, ua riro ia mai te hoê faaìteraa nā te Fatu i to na tiàturi i te feiā atoà i fārii ia na e i ta na ra mau haapiiraa. E parau faufaa atoà teie ia ìte tātou e, te tiàturi nei te Atua i te taata no te faatupu i ta na ôpuaraa i roto i teie nei ao. Te uiraa e tano e ui i ô nei, i teie poipoi, e mea na hea ta tātou hiòraa i te reira tiàturiraa i to te Atua ia tātou ? Te mea pāpū rā ia au i te mau faaìteraa a te mau pāpai Èvaneria e ta te puta Òhipa, ua itoito te mau pipi i te haereraa i Ierutarema no te haamata i te rave i te faaueraa i horoàhia ia rātou. Oia hoì, ia porohia te Èvaneria i te taata atoà.

Te mau pipi, tei moè na i te mau taima a haruhia ai to rātou Fatu, te riro nei ia i teie nei taima, ei mau àito no te rave i te hoê tapura òhipa rahi tei òre roa rātou iho i tiàturihia e tano ia rātou. Te riro nei rātou mai teie atu nei ei mau àito no te ôpuaraa ora a te Atua no teie nei ao, mai Ierutarema atu e tae noa atu i te hopeà o teie nei ao.

Eita e òre ua tiàturi noa te mau pipi i te vaveraa mai no te pātireia o te Atua e tei pihaì iho noa Ietu ia rātou e aore ia, eita rātou e ìte i te pohe e tupu ai te reira. Te auraa no te reira huru manaò, te tiàturi noa nei te mau pipi e ta rātou tuhaa i roto i te ôpuaraa a te Atua, o te tiaì noa ia tae mai te tupuraa no taua pātireia ra o te Atua. Aita rā e òhipa e tano ia rātou ia rave.

E ère ānei, no te reira atoà tumu i tiàtonu noa ai to rātou mata i nià i te raì no te hiò i to rātou Fatu i te maùeraa atu. E te reira huru i to rātou, te haapāpū noa mai ra ia e, ua moèhia ia rātou te faaueraa ta te Fatu i horoà mai ia rātou mai teie atu nei. Inaha te riro nei rātou mai teie atu nei ei mau rave òhipa na te Metua i rotopū i te mau taata atoà ; mai te mau âti Iuta e tae noa atu i te mau ètene ; eiaha hoì i Ierutarema noa, i Tamaria atoà rā e tae noa atu i te hopeà o te fenua.

No reira, eiaha e haamāuà i te taime i te hiò noa i nià i te raì e haapeepe rā i te pou i raro, e pou i rotopū i te nūnaa. E pou i te vāhi i haerehia e te Fatu. I te mea e, tei reira to te Atua faaìteraa mai ia na i roto i te àti e te māuiui o te nūnaa.

Eiaha ia moèhia ia tātou e, to te Fatu tere i roto i teie nei ao, no te faatiāmā ia te taata i te mau mea atoà e haafifi nei i te tupu-matai-raa o to na oraraa. Te ìmiraa i te mau rāveà atoà ia iho-faahou-mai te huru taata mau i hinaarohia e te Atua i roto i ta na ôpuaraa faaora. Te auraa no ta tātou òhiparaa, ia òre tātou ia neva noa e ia tūtonu noa i nià i te raì, o te haamaitāraa ia i te parau o te ora o te taata i nià i te fenua nei. E ère rā te paraparau noa i te mau òhipa o te raì tei òre roa i ìtehia e tātou.

Eita e òre e i roto i to tātou hīroà faaroo i teie mahana, aita te mahana o te revaraa e riro roa nei ei mahana faufaa roa mai te tahi atu mau ôroà i roto i te Ètārētia ; mai te Fānau e aore ia te ôroà Pāta ta tātou i haamanaò aè nei. I te mea e, ua haamanaò mai te reira i te òhipa rahi i ravehia e te Atua no te taata.

Ia haamanaò atoà rā tātou e, i teie mahana to te Atua haapāpūraa i ta na tītauraa ia tātou no te rave i te òhipa o ta na e hinaaro nei ia tātou. I teie atoà mahana to na haapāpūraa i to na tiàturiraa ia tātou no te tomo i roto i ta na ôpuaraa faaora. I teie mahana, to na haapāpūraa e tei pihaì iho mau o ia ia tātou tātai tahi e te òhipa nei e tātou atoà. No reira, eiaha ia moèhia ia tātou e, te òhipa o ta tātou e rave nei, e ère ia

nā tātou nā mua roa. Te òhipa nei rā tātou ia au i te hinaaro o te Atua no te mea O ia iho te Fatu o te òhipa ta tātou e rave nei.

Nā roto i to te Fatu Revaraa i to na Metua ra, o tātou atoà terā ta te Fatu e tuu atu ra i roto i te here o te Metua. No reira, eita e tià ia tātou ia haaparuparu i mua i ta na mau tītauraa. Te pāpāi ra Pauro i ta na Tamaiti i te faaroo ia Timoteo : « *e òre roa te haere i te tamai e haafifi ia na iho i te peu rii o teie nei ao, ia haamauruuru o ia i tei māiti ia na ei àito* » (II Timoteo 2/4).

Ia haamaitai e ia faaherehere mai te Fatu ia tātou i roto i to na ra hau.

Maraea Taarii òrometua

Pureraa Penetetote 2003

Tapati 8 no tiunu 2003

Taiòraa Pipiria : Òhipa 2 : 1-13

Poroìraa : « Eaha rā teie » (ir. 12 vh)

E homa e, ia ora na i te aroha o te Atua i teie mahana òroà no te Penetetote. Ia hiò tūtonu anaè tātou i te oraraa o Ietu i te fenua nei e te mau òhipa/haapiiraa i ravehia no te aratai i te taata i te eà no te ora o ta te Atua Metua i hinaaro no ta na mau tamarii. Aita rā te taata i fārii.

Ua faatupu te taata i to na riri hae i nià i te Fatu, ua haamuiui, ua haava, ua faatataurohia e ua pohe, ua hoì i pihai iho i ta na Metua. Ia hiò anaè tātou, e ò mai te manaò e, ua oti te òhipa a Ietu.

Inaha, teie mai nei te Penetetote, te auraa, te âmui faahou mai nei Ietu na roto i to na varua i roto i te taata o ta na iho i maìti, oia hoì ta na mau pipi/apotetoro. Te parau e tià ia faahiti i teie nei, o te òhipa ia a te Varua Maitai e ta na faafānau. E hohoà te mau âpotetoro mai te feia i uruhia i te varua o te Atua, e na te mau òhipa maere i tupu i terā mahana i fā mai ai teie uiraa e : « Eaha rā teie ».

Teie uiraa, aita anei e vai ra terā manaò e, ua reva Ietu i ta na Metua ra, te auraa ua oti hope roa ta na òhipa i te fenua nei. E inaha, teie faahou mai nei te Varua Maitai, i tano roa ai terā maa parau iti ra e : « E òre roa te Atua e noaa i te taata, te auraa te manaò ra tātou te taata e ua oti te òhipa a te Atua, teie mai nei rā te Varua o te Atua i roto i te taata. E tupu ihoa te maere, te uuiiraa i mua i terā temeio e ravehia ra e te mau pipi.

Ua manaò terā mau taata i terā tau e, te Penetetote, o te òroà ia no te mau hotu. Aita rātou i hape, te fifi noa, terā ia mea àpi, te auraa to te Varua o te Atua òhiparaa i rotopū i te mau pipi. Aita te mau pipi i parai noa i roto i te mātaù, te peàpeà, te riàrià. Ua faarahia rātou na roto i te òhipa a te Varua. Ua tupu te pororaa évanēria, ua faaroo te mau taata na roto i to rātou iho reo. Terā te mau hotu mātamua e haamata ra.

Oia mau, te òhipa maere tei tupu i te mahana Penetetote, e tapaò ia no te Aroha o te Atua. E temeio teie ta te Atua e faatupu nei i roto i ta na étārētia. No reira te mau òhipa atoà i tupu, ua hau atu ia i te fēfuriraa o te taata.

Ua riro atoà te Penetetote ei haapāpūraa i te patau fāfau a Ietu i ta na mau pipi : « Na ù iho e tono mai i te Varua Maitai ... » ua tupu i teie mahana. Na terā mau òhipa maere i tupu i faaite ia tātou i teie mahana e, eita roa te Atua e noaa i te manaò o te taata.

Ietu tei pohe i nià i te Tatauro, e o tei tià-faahou, te parahi nei i roto i te àau o te taata, mai teie atu nei, te auraa aita to na e òtià faahou. Na te Penetetote e haapāpū atoà mai e te riro nei te Ètārētia ei tino no te Metia.

E hoa ino ma e, eaha ta tātou e tano e tapeà mai :

- 1) Tei ia tātou ra te Varua o te Atua, e tià ia tātou ia òhipa ma te taiā òre. E òhipa tātou e te Fatu iho, no te mea na te Varua e horoà mai i te puai ia tātou.
- 2) To te varua ia maìtiraa i teie mahana i te tane e te vahine ei rave òhipa i roto i ta na Ètārētia. Ua ìte atoà tātou e te vai mau ra te feia i paruparu te faaroo i roto i te Ètārētia e te tahi pae aita e òaòra ra e te fārihia ra i roto i te Ètārētia.

Oia mau, ua maramarama te mau pipi i terā tau, ua faaruê i to rātou vāhi e ua haere i terā mau taata o tei paruparu te faaroo e aita e òaòra ra. Terā te òhipa e tià mau ia tātou ia rave, i te mea hoì e tei roto te Varua Maitai ia tātou, e ia riro terā òhipa ei faafaaiteraa na tātou i te aroha e te hanahana o te Atua.

Mai te peu e ua rave pāpū tātou i terā òhipa, eita e òre ta tātou mau fare pure i te î atoà, e riro terā òhipa ora ei faaite i te tupuraa te tahi òhipa maere o ta te taata e uiui atoà e : « Eaha rā teie ». Ia ora na.

Natupuài orometua.



Ētārētia Ēvāngelika i Porinetia Farāni VEÀ ÒROMETUA

617
N°2/2003

Ēpitetore pāpaihia ei Faaitoitoraa
E ei tāāmuraa i te mau Tāvini o te Atua
Tonohia e te Ētārētia

RECU LE
19 NOV. 2003

Papeete, i te 10 no novema 2003

ÉGLISE ÉVANGÉLIQUE EN
POLYNÉSIE FRANÇAISE
ÉCOLE
PASTORALE
HERMON
BP: 667 PAPEETE 98713
TEL : (689) 50 25 30
FAX : (689) 50 25 31
Email : hermon@mail.pf

I te mau taeae e tuahine òrometua i roto i te Ētārētia nei

E hoa ino mā e, ia ora na roa i te aroha o te Atua.

Terā mai ta tātou Veà òrometua no teie hopeà matahiti 2003, e no te ômuaraa o teie matahiti âpī 2004. Ua faaineinehia mai te reira e to tātou tuahine Taoàhere vahine e te mau taeae òrometua ei tautururaa ia tātou e i te feiā e rave noa atu i te faaitoitoraa. Ia haamauuruuhia rātou tei fārii mai e rave i teie tapura òhipa i teie ā matahiti.

Ei haamanaòraa, e iriti ihoā ta tātou pureraa tau i te tāpati 18 no tenuare nā roto i te ôroà a te Fatu, e mai te reira atoà i te ôpaniraa i te tāpati 25 no tenuare 2004. Ta tātou tumu-parau teie ia : “o to ù nei Hau ta ù e hō atu no òutou“ *Ioane 14, 27*. Ua oti atoà ta tātou mau puta i te faanahohia e to te fenua Raiatea. E tiā roa atoà ia tātou ia haamauuruu i teie mau taeae i haa mai ia oti teie puta.

Ia horoà mai ā te Fatu o te Ētārētia i te itoito e te òaòa ia tātou no te tāviniraa i ta òhipa. Mai ia òutou e to òutou mau ùtuafare, te mau âporaa tiàtono e te mau pāroita, a fārii mai te tapaò no te aroha e ia haamaitai mai te Atua ia òutou i teie ôroà Noera e te Matahiti âpī 2004.

ÉGLISE ÉVANGÉLIQUE EN
POLYNÉSIE FRANÇAISE
ÉCOLE
PASTORALE
HERMON
BP: 667 PAPEETE 98713
TEL : (689) 50 25 30
FAX : (689) 50 25 31
Email : hermon@mail.pf

Te perētiteni o te Ētārētia ,
PRESIDENT
Taarii MARA EA òrometua

Faaitoitoraa no te Tāpati 30 no novema 2003
Hoê o te Tiaïraa.

Taiðraa : Ev. Ruta 21/25-38

Faaitoitoraa : Ev. Ruta 21/34

E ara rā ia òutou, o te teimaha òutou i te rahi o te māa e te taèro, e te peàpeà o teie nei ao, a roohia mai ai òutou e taua mahana ra àore i manadhia.

E hōmā e, te aroha ia rahi

Teie tātou e tomo faahou nei i roto i te tau no te Tiaïraa, òia te tau e faaineine ai to te hui faaroo ia na no te farii i te taeraa mai te Tamaiti a te Atua i rotopū i te taata. A riro ai taua taeraa mai no taua Tamaiti ra ei tapàð haapāpū na te Atua e aita to te taata e parau i rapae atu i to te Atua.

No te rahi te mānaðnað o te Atua i te taata, te òre roa hoì e tià faahou i te Atua ia hiò mata noa e ia faaea tarià turi noa i mua i te teimaha o te àti ta te taata e faaruru nei i faanaho ai te Atua i ta na ôpuaraa faaora na roto i ta na Tamaiti. Òia mau, na roto i ta na Tamaiti, ua hōhoàhia te parau a te Atua, e ua taata-roa-hia mai. Te huru mau hoì te reira o te Atua, òia hoì te parauraa e te oraraa i ta na parau.

Te fatata mai ra te ôroà Noera ; tei roto ānei te taata i te rā tiàturiraa e ôroà faufaa teie nō na e tei tapàð-roa-hia i roto i to na ààì. Te mānaðnað rā ānei te taata i te rahi no te òhipa i ravehia e te Atua nō na. Aita ānei teie ôroà i riro noa ei peu i roto i te oraraa o te taata. Aita ānei i tãòtiàhia i nià noa i te haapaðraa i ta te ôpū e te reàreàraa o te tino. A faarirohia atu ai taua ôroà ra ei ôroà tei faarahi atu i te òhipa tapihoora e te àimāmau.

Te tau no te Tiaïraa, èère ia i te tau e faaea òhipa òre noa ai te hui faaroo, àmu noa ai, e e inu noa ai. E tau rā e faaineine ai ò ia i to na ààu no te fariiraa i te tomoraa mai o te Fatu i roto ia na, a nehenehe atu ai i te Atua ia faatupu i ta na ôpuaraa faaora mai ta na i haere mai i mua ra no te hoo i te taata, no te tātara i rapae i te fifi, no te faaora i te mau mai, e no te tāmahanahana i te mau ààu òto atoà.

Ua tano maità teie parau ta tātou ; “E ara rā ia òutou, o te teimaha òutou i te rahi o te māa e te taèro, e te peàpeà o teie nei ao, a roohia mai ai òutou e taua mahana ra àore i manadhia” (Ev. Ruta 21/34).

E teie i te parau haamataùraa i te taata, ia riro rä ei parau faaitoito, e ei parau tauturu i te hiò-faahou-raa i te huru no to tätou oraraa e te parau o te Atua i roto i to tätou oraraa. Te parau no te tau hopeà e te mau tupuraa òhipa i taua taime ra, ua tià roa i te Fatu i te hēheu mai i te reira i teie taime. E tano rä e ui e, na hea te taata faaroo i mua i taua parau ra no te hopeà o teie nei ao. E riro ānei te reira mahana ei mahana riàrià mau, àore rä ei mahana òàà. Ia hiòhia te mau parau a te Fatu, eere ihoā i te tahi mau parau òhie ; e àti te mau fenua atoà.

Teie nei rä, te feiā atoà tei haapaò i te hinaaro o te Atua, e riro rätou i te òàà no te mea e ua fātata mai to rätou ora. E aha te auraa no tätou teie parau i teie mahana?

E haamata i teie-nei-raa ra i te faatupu i te hinaaro o te Atua, e ia au to tätou haereà i to te feiā faaroo mā te ara hoì eiaha ia topa i roto i te mārei no te ìno o teie nei ao. E riro mau taua mahana ra ei mahana òàà mai te peu e ua haafaufaa tätou i te taime i hōroàhia no tätou no te täviniraa i to tätou Fatu. Eiaha e mataù i te hōpeà o teie nei ao, e òàà rä no te mea e te hoì mai ra to tätou Fatu mā te mana rahi e te hanahana.

Eere ānei tei reira to tätou haamauraa i to tätou tiai-turu-raa, òia hoì i nià i taua taeraa mai o te Tamaiti a te Atua te ora o to te ao. Aita roa e taata i ìte i te taime e tupu ai te reira parau. Te parau pāpū rä, e tae mai ihoā o ia. No reira, e mea titauchia tätou ia iriti i te ùputa o to tätou mau àau, ia nehenehe ia tätou ia farii i ta na mau haamaitàraa, e ia tauturu noa mai ò ia ia tätou i roto i te täviniraa tätou ia na.

E horo tià hoì tätou i hea ? E horo ānei tätou i te taata ra no te ani i te tauturu. Ua moèhia ānei ia tätou e, to tätou ora tei roto anaè ia i te Atua e roaa ai. Mai te peu hoì e, te haafatata mai ra te Atua ia tätou na fea ia tätou i te pāhonora a i te reira ?

Ia vai ara noa tätou mai te haamaità i ta tätou mau faaineineraa ia tätou no te mahana e tae mai ai to tätou Fatu.

Amene.

Tauhere òrometua

Faaitoitōraa no te Tāpati Piti o te Tiaàraa.

Taiòraa : Ruta 3, 1 – 6

Te mau taeàè e te mau tuahine i roto i te Metia, teie mahana o te tāpati piti ia no te tiaàraa, e te faaineine nei tātou i te faahanahana ia Noera.

Te taiòraa tei horoàhia no tātou i teie mahana, te haamanaò mai ra i te faufaa mau no te oraraa i teie tau no te Faaineineraa, te tau no te Tiaàraa i roto i te faaroo, te faàteraa no te Parau Maità a te Metia, e te òàðaraa no Noera.

Ioane-Pāpetito teie e tià nei i te òmuaraa no te Evaneria, mai te hoê taata tiaì, te tià ra i mua i te tahi ùputa, tei î i te òàðà no te Hau nā roto i teie tiaàraa e fātata roa mai nei.

Na roto ia Ioane te haamanaòhia mai ra i te tāatoàraa no te Faaauraa Matamua, oia hoì, te tau no te Faaauraa e te tau no te Tiaàraa, mai teie e faahitihia nei e te perofeta ra Itaia:

"4 E reo no te hoê i te poro haere i te metepara ra, A haamaitai i te èà o te Fatu, e faatitiàifaro i to na haereà. 5 Ia hope te peho i te faaàhia, ia hope te mouà e te mau àivi i te haapāpūhia, ia faatitiàifaro te èà piò, e ia haamaninahia te èà puupu; 6 Ia ìte te taata atoà i te ora a te Atua."

I te taimè e faaineine ai tātou i te ora i roto i te òàðà no Noera, te haamanaò mai nei teie faàteraa na Ioane-Pāpetito, i te hiò faahouraa i te huru mau e tano ia tātou ia rave i roto i teie faaineineraa e i roto i teie tiaàraa, e nā roto i te haapāpū faahouraa ia tātou i te faufaa tumu.

E rave rahi mau mea e faaapiapi nei i to tātou oraraa, e rave rahi mau faaheporaa, mau faaueraa, mau ôpuaraa, tei òpanipani ia tātou.

Te ora pinepine nei tātou mai te mea ua haapotohia to tātou oraraa i teie taimè, teie oraraa no teie mahana, e te mauruuru nei hoì tātou i te reira.



Te pārahi nei tātou i roto i te oraraa no te mau mahana atoà, i roto i te mau peu i mātauhia e tātou, to tātou oraraa ùtuafare, oraraa totaiete, e aita hoì te reira e tūraì ra ia tātou i te pārahiraa i roto i te tahi tau no te hiò faahouraa, te tahi tau no te faarooraa, te tahi tau no te haafferuri faahouraa.

Ua riro teie faaìteraa a Ioane-Pāpetito ei faahaùtihaùti faahouraa i to tātou oraraa, te na ô ra hoì tona reo :

"A haamaitai i te èà o te Fatu, e faatitiàifaro i to na haereà."

Te poroìraa a Ioane i roto i te faaineineraa no teie àiū no Noera, e faaitoitoraa ia ia tātou i roto i te tahi tauraa ta te haereraa mai o te Atua i roto i teie ao.

Te faaìteraa a te Evaneria e te Here o te Atua, e tītauraa atoà ta na no te parau tià, na reira atoà teie haamaitàraa no te taeraa mai te Ora io tātou nei. No te mea, te haamaitàraa a te Atua faaìtehia i te tau no Noera, eere ia i te tahi haamaitàraa tirā rā atu ai.

Teie haamaitàraa a te Atua, eere mai terā mau faatianianiraa e ravehia ra e te mau fare toa, e roaa ā ia i te hoo mai. Teie horoà a te Atua, e òre roa ia e tià ia tātou ia hoo, maoti rā i te Atua anaè, na roto i ta na Tamaiti, tei pohe e tei tià faahou no tātou.

Te tomoraa i roto i te òàà no Noera, e tītauraa i te taata na roto i te tatarahapa, e te tauraa i to tātou mau feruriraa, e ta tātou fāiraa.

O teie mau, te tītauraa a te parau a te perofeta Itaia:

"A haamaitai i te èà o te Fatu, e faatitiàifaro i to na haereà."

Te na ô atoà ra i roto i te Rōma 12, 2 :

"E eiaha e faaau atu i teie nei ao; ei huru ê rā to òutou i te faahouraa i to òutou āau, ia ìte òutou i taua hinaaro tià o te Atua ra, e te au, e te maitai hoì."

Te faaineineraa i te èà o te Fatu, o te faaineineraa i te ora i te tau o Noera, te haereà mai o te Atua i roto i te oraraa hepohepo o te taata, eita e òre o te faaineine-atoà-raa ia òe iho i te fārereiraa i te Fatu, nā roto i te haapaeraa ia tātou iho, e tià ai ia tātou ia tāmū i te Fatu ra.

O te fāriiraa i te haere na nià i te èà ta te Fatu i tarai. O te fāriiraa i te tuu ia òe i roto i te rima o te Atua e tana haamaitàraa, mā te òre e haapò faahou ia òe, e to òe pūai.

Te faaineineraa i te èà o te Fatu, o te faaineine-noa-raa i to òe āau, i te fāriiraa i te haamaitàraa no nià roa mai, e tei faaite ia tātou i te tahi taata āpī.

O te fāriiraa i te Atua mā te òvere, no te fāriiraa i te haamaitàraa o te tatarahapa, e te tomoraa i roto to na òaò.

Noera, o te horoà ia a te Atua i te mau taata atoà, o te horoà nehenehe roa aè, o te reira te haamaitàraa.

Nāfea ia e tià ai ia tātou i te faaineine i te fāriiraa i teie horoà nehenehe mau, maoti rā, nā roto i to tātou fāriiraa i to tātou veve, to tātou ère, e to tātou hiaai i teie haamaitàraa, nā roto atoà i te titauraa a te Perofeta ra o Itaia, ia tatarahapa, ia tauī.

"5. Ia hope te peho i te faaīhia, ia hope te mouà e te mau āivii te haapāpūhia, ia faatitiāifaro te èà piò, e ia haamaninahia te èà puupuu;

6. Ia ite te taata atoà i te ora a te Atua."

I ò nei, te titau mai ra o Ioane-Pāpetito ia tātou, ia fārii tātou i te faahaèhaa ia tātou mai ta na e parau ra no te rahu, inaha, e faaauraa teie na na, E parau atoà rā no te taata, e no tātou i teie mahana. Terā mau mea e vai ra i roto i to tātou òpū, te reira te faaī, te reira te haapāpū, tē reira te faatitiāifaro, te reira hoī te haamanina.

Tei ò atoà o Noera, tei roto i terā mau tauraa, eere ānei te nā reira atoà ra o Māria i te faaite na roto i ta na himene, Ruta 1,

"51 E faaite o ia i te pūai i tana rima, e haapūrara o ia i te manaò teitei o te teòtedò. 52 E huri o ia i te feiā mana i raro i to rātou terono; e faateitei i te feiā haèhaa. 53 E faaī o ia i te feiā i ère i te maitā; e te feiā taoà rahi ra, e faahoī ia o ia ma te òre."

No reira, te faàteraa a Ioane-Pāpetito, te tītau mai ra ia tātou ia ìriti i te tahi ùputa āpī. Na te reira ùputa e ìriti i te tahi èà, eere rā paha i te tahi èà âano. O te tahi rā èà pirihaò, tei tītau i ta tātou feruriraa, to tātou tiàmāraa. O te èà rā e roaa ai Ora, te Ora Mau, te Ora no ô mai i te Atua ra, e tei faaora i te mau taata, i to te ao nei. Te Ora tei tītau-rahi-hia i te horoà, mā te òre e tiai i te faahoīraa. O te èà hoī no te tatauro, tei nā mua i te tià faahouraa, te hanahana no nià roa mai.

Ia riro teie tau no te Tialraa, no òutou, no tātou, ei tau no te feruri faahouraa, no te haamaitai faahouraa, e no te faaineineraa i te fārereiraa i te Atua, tei haere roa mai e hoo faahou ia tātou, e faahoī i roto i te Ora.

Ei ia na te hanahana e ia hanahana noa te Atua ia tātou.

Tehuiarii PIFAO òrometua

Tapati 14 no Titema 2003 - Tiaàraa Toru

Taiòraa : Ruta èv.3/7-18.

Faaitoitoraa : ir. 18 (vh) : "...i te faaiteraa atu i te taata i te parau maitai "
(Èvānēria)

E hoa here ma ē,

Ia ora na i te aroha o te Atua i teie tapati toru no te tiaàraa.

Ia au i ta tātou taioraa i roto i te Èvānēria a Ruta 3/ 7-18 te tumu parau : te ohipa a Ioane Papetito.

I roto i teie pene 3, te ite nei tātou i te faaiteraa no te parau maitai no te haereraa mai o te Atua na roto i ta na Tamaiti ia Ietu i te ao nei. E parau fafau teie no te tupuraa no te opuaraa faaora a te Atua.

I te irava 3 e tae atu i te 14, te parau ia no te ohipa a Ioane Papetito e to na faaiteraa i te haerea mai o te Fatu. Tauga faaiteraa ra e haamata na roto i te tiàororaa i roto i te metepara : "E reo e hoē i te tiàororaa i te metepara, a haamaitai i te e'a o te Fatu, e faatitiaifaro i to na haerea. Te auraa, o te Atua iho tera e haere maira ia ite te taata atoà i te ora a te Atua (ir.6).

Teie ra, ia ite atoà tātou i te huru o te taata e to na ino i mua i te Atua. Te mea ta te Atua e ani nei, o te tatarahapa ia. Ia tatarahapa te taata, te auraa ia tau i te taata i to na haerea, e ia ite i to na ino. Te raveà hoe roa ia e hotu ai o ia. Ia riro faahou o ia ei taata parautià, e ia ite atoà o ia e tuhaa ta na (responsabilité) i mua i te Atua. Tera Atua e haere maira e Atua parautià, ia ite faahou te taata e, e huaai o ia na Aperahama, ia ore ra, e riro mai ia te ofai ei huai, e taua mau mea ra e tupu hope roa ai na roto i to te Fatu taere mai i roto i teie nei ao.

E te parau ra Ioane, te vai nei te opahi e te mau raau hotu ore e tapuhia ia (ir.9), te auraa e itehia te faufaa no te hoe raau na roto i to na hotu. Teie ra, ei huero e aore ra ei maa e ia au i te hinaaro o te Atua, i reira e itehia ai e tumu raau maitai, e te reira te faaara nei Ioane i te feia atoà i putuputu mai i taua mahana ra.



Na te reira huru parau a Ioane, i haere mai te mau taata atoà ma te hiò ore i to ratou huru. Ua haere mai te mau ferona (12), (au-ore-hia e te ati-Iuta) te mau faaehau (14) (feia i raro aè i te ture a te nuu Roma). Taua mau taata ua hinaaro ratou i te ora, te ora no ò mai i te Atua ra. E noaa taua ora na roto anaè i te tatarahapa. Te titau-atoà-hia nei tātou ia tatarahapa te auraa ia faaapi i to tātou e'a, ta tātou hiðraa, ia ore, eita tātou e ora, e tapu-ê-hia tātou. E parau teimaha e te peàpeà. Ia tatarahapa te taata e tià ai, e noaa i te taata i te mau maitai i fafauhia mai e te Atua.

Oia mau te haerea mai o te Fatu, no te afaì mai i te parau maitai. Te reira te fa tumu no te haapiiraa a Ioane. Na roto i taua parau maitai (Èvānēria) i reira tātou e ite ai te auraa no te Here, aroha no te Atua parautià. Na taua parau maitai ra e iriti i te uputa o te ora, e ite atoà tātou i te hinaaro o te Atua ia tātou e te taata nei ia au i te irava 16 : "Te papetito nei au ia outou i te pape, te haere maira ra te tahi e mana rahi to na i to ù.. na na e papetito ia outou i te varua maitai e te auahi, te auraa e puai rahi to te Fatu no te faataaè i te mea ino i te mea maitai. Na te Varua Maitai e faaite mai i te hinaaro o te Atua i te taata, area te auahi no te faataae ia i te ino e no te tama i te hara.

Mai te mea, no Iteraera tera parau, no tātou ra i teie mahana. E ò mai te uiraa e : Nahea tātou i teie mahana eere paha i te farii noa-raa i te Fatu, na roto i ta tatou mau rururaa (Tiàtono, Ètārētia, Tuahine etv.). Te mea hau atu o te oraraa i taua parau maitai e te faaohiparaa i te mau mahana, te reira paha te mea ta te Fatu e tiai maira ia tātou, i reira e itehia mai ai te raau hotu, oia atoà tātou ia hotu e tià ai.

Ia maitai e ia òaòà i teie Noera e te Matahiti api 2004. Ia ora na.

Natupuai òrometua.

Tapati 21 no Titema - Tiaìraa Maha

Taiòraa : Mita 5/1-4vm ; Hepera 10/5-10 ; Taramo 80 ; Ruta èv.1/39-45.

Irava feruri : « Inaha hoi tei te òraa mai to reo i te aroharaa mai ia ù nei i roto i ta ù tarià, ua ouà iho nei te tamaiti i roto i tau ôpu i te oaoa » ir.44


I roto i teie tau arepurepu, tamaì e te mau haamauuiuraa, aita atu e tūtavaraa ta te mau Etārētia, ia rahi te mau raveà ia tupu noa te aroha e te oaoaraa i roto i te taata, i roto i te mau ùtuafare fetii, te mau hoa e te taata tei enemi i to na taata tupu. Te rahi noa atura te mau pū e farii nei te mau tamarii ôtare, te mau tamarii haapaehia i te here metua.

Te tumu i rahi ai to tātou oaoaraa, i te mea ia e, ua hoohia tātou i te toto o te tamaiti ôtahi a te Atua o Ietu Metia hoê roa taime, ta te puta Hepera i haapapu e, « *i tei taauahihia ra e te taraehara ra aita ae nei òe i mauruuru i te reira. Ua na ò ihora vau, teie au e taù Atua, te haere nei au e faatià i to òe hinaaro* » 10/6-7. Ua ìriti teie tutia ia tātou i te ùputa no te farereiraa i te Atua no te here e te aroha. E tià ia ui, te aha nei tātou i mua i te hinaaro o te Atua, ta Ruta e haamanaò mai nei ia tātou i teie poipoi i tana hidraa.

I teie ā mahana te tutonu nei Ruta i tana faatiàraa i nià i te parau o Maria e to na tomoraa i roto i te ùtuafare o Eritapeta e Tataria. Ua tō Eritapeta i te hoê tamaiti i roto i to na ruhiruhiaraa nei e Maria ua faaitēhia ia e te merahi i te huru no to na tōraa i ta na tamaiti i roto i to na pereteniaraa.

Te hinaaro nei Ruta e faaite e, te fanauraa o Ietu tei roto ia i te ôpuaraa e te hinaaro o te Atua anaè, èere te reira i ta te taata. Te ora nei teie na vahine i roto i tera parau ta te merahi e *aore roa hoi e mea e òre e tià i te Atua 1/37*. E au ia teie parau tā tātou i te āamu o Tara ta te merahi i parau atu e « *Te vai atura ānei te hoê mea e òre e tià ia Iehova ia rave* » Tenete 18,14.

I roto i te ôpuaraa faaora a te Atua, e te tereraa òhipa, ua tià roa ia Maria ia papū maitai te papa e te âveia aratal i to na tiaturiraa. I mua i teie parau na te merahi « *tei ia òe te Fatu, e tei maitai i te mau vahine atoà e* » ir.28 e tera parau e « *ua herehia mai òe e te Atua* » ir.30 te auraa, ua maitihia e te tamaiti a te Atua i roto i to na ôpu.



Tei ia Maria te metua vahine te horoàraahia te tareni e topa te ioà o te tamaiti ia *"Ietu, e rahi o ia, te tamaiti na te Teitei"*. Tei roto atoà ra i teie ioà te vairaa te òhipa e titauhia i teie âiū ia amo *"e riro o ia ei ora o teie ao"*. E tuàtiraa to te ioà e te ôpuaraa e tial maira ia na. Ua faaite hopehia ia Maria te tiàraa mana taata e mana faaora o teie tamaiti, ta Tataria i tial maoro te tupuraa o te raveà faaora a te Atua.

Teie parau *"ua tià aera Maria oioi atura"* ir.39, i roto i te faufaa âpī, e tuàtiraa to te faaroo e te òhipa. E haamataraa teie no te tonoraa e haere e faaite i te parau oaoa no to te Atua haereraa mai e farerei i te taata. Teie te poro Evāneria matamua no te hau o Ietu. Tei roto o ia i tera hana oaoa, tei faatià e tei faahaere ia na, ua tiàturi i te poro a te merahi, ua oaoa i te tomo i roto i teie ao âpī tei ìriti i te parau o te Metia. Ua vaiho Maria ia na ia arataihia e te Varua Maitai tei riro ei papa matamua no ta na òhipa pororaa Evaneria *"inaha ei tavini au no te Fatu, ia na reirahia mai au mai ta òe i parau na "*, ir.38

Ua haere Maria i Iuta e farerei ia Tataria e Eritapeta i roto i to raua ùtuafare. Na roto i te aratairaa a te Varua Maitai, i tià ai ia Eritapeta ia pahono *"ua ouà iho nei te tamaiti i roto i ta ù ôpu i te oaoa"* ir.44. Ua ìte maitai teie âiu i te tiàraa o Maria, ua oaoa i te farerei i te metua vahine o to na Fatu. Te faatupuraa i te oaoaraa i roto i te taata e òhipa te reira na te Varua Maitai e te faaroo.

I roto i te tere farerei ùtuafare o Maria, ua faea moèmoè noa Eritapeta e tataria, auàè maoti teie farereiraa i tupu maite ai te tauàparaaraa ma te tiàmā i te vahi maramarama i te rahi no te ôpuaraa faaora a te Atua ia raua. Aita i faaea mamū faahou, i teie taie te faarohia ra te parau, te ìtehia atura te oaoa, ua matara te parau.

Mai te peu te riro nei te faaroo ei oaoaraa na tātou, a faaite e a ora i te reira. I roto i to tātou tere farerei i to tātou taata tupu te tū a Eritapeta *"Inaha hoi tei te òraa mai to reo i te aroharaa mai ia ù nei i roto i tau tarià, ouà iho nei au i te oaoa"*. Te riro faahoura ānei te farereiraa ei taimè oaoaraa nā tātou. I teie taimè ôroà, ia hoì faahou mai tera oaoaraa i roto i te farereiraa.

To tātou faaroo e to tātou oaoa e tūàti ia i nià i te puai o to tātou tiàturiraa i te mau temeio ta te Atua i faatupu no tātou. Te rahi mau nei to tatou taima i te mauà i nià i te mau fifi tuàtiraa, moè hia atura te mea faufaa *“te tamaiti e fanauhia e Maria o te tamaiti ia a te Atua.”* E rave rahi te papa tei haapaari i te faaroo e te tiàturiraa *“te tiàfaahouraa o te Ietu, te manaòraa ia na i roto i te Eufari, te faaòreraa i te mau hapa a te feiā tei hapahia atu, te manaraa o te ora i nià i te mau iui e te pohe tatauro.”* Teie ra, e ôhie roa atu te oraraa i te faaroo i te taima e tiàturi ai te taata e ua âpee te Atua i to na mau haereà i te mau taima atoà.

Hoa here ma, i teie mahana, ia riro to tātou mau reo aroha ei oaoaraa na te feiā e ìte maira, e faaroo maira. Aita ānei to tātou mau reo aroha e faahahi è nei te taata, i te mea e, aita faahou e âpeeia nei e te Varua faaora, Varua faaroo. I roto i te mau ôroà tialraa 4 na tātou, ia vave mai te reo haamanà o Mita i te pene 5/5 *“E riro taua taata ra i te tumu ia no te hau.”*

Céline HOIORE

HOHOÀ POROI NO TE MAHANA FANAURAA « 25 NO TITEMA » 2003.

Evaneria a Ruta pene 1 e mai te irava 46 e tae atu i te irava 55.

Ia ora na e te aroha ia rahi!

Ahiri te nota no teie himene i ta Maria i papai-roa-hia mai e Ruta, eita e ore tatou i te himene roa i teie nei taioraa pipiria i faataahia mai na tatou no teie Mahana fanauraa.

E himene hoi teie na Maria, e te parau noa nei tatou i teie himene.

Teie râ, ahiri e, aita o Ruta i papai roa mai i te nota no teie himene a Maria, no te mea ia, eita e ore e, tei roto te nota o ta na himene i te mau parau e faahitihia ra e ana i roto i ta tatou taiòraa.

No roto mai teie himene a Maria i te farereiraa na na ia Eritapeta, o tei hapû atoà i te hoê aiû, na roto i te hoê raveà taaê, o te topahia to na ioà ia Ioane (Papetito), i te matararaa mai.

Te auraa mau no teie parau o teie ia : te himene noa nei o Maria i te hoê himene o tei ore i fatuhia e ana, o tei fatuhia râ na na, oia hoi o tei papaihia e te Atua. O Maria te vahine himene, o te Atua râ te taata papai himene.

Eaha ta te taata i papai i teie himene e hinaaro ra i te haamanaò ia tatou, i teie mahana, na roto i te vahine himene ra ia Maria o te fanau atoà i te hoê tama, na roto i te hoê ravea taaê, o te topahia to na ioa ia Ietu.

O teie paha, i roto i te tahi tiàtonuraa e e maramaramaraa no teie himene :

« E faatupu iho â te Atua i te ohipa o ta na i poroi mai ia tatou. »

Oia ia. Te haereā mai no te hoê Faaora i te ao nei, e tupuraa ia no te hoê poroi a te Atua i te mau tupuna no te mau tamarii a Aperahama, a Itaata e a Iatopa.

Areā rā, ua aa-roa-hia i roto i to tatou aau terā tiàturiraa e, ia ore anaè te hoè ohipa i tiaihia e tatou e tupu i te taime i hinaarohia e tatou, aita te Atua i faaroo mai i ta tatou pure. E no terā huru tiàturiraa, moèhia atura ia tatou e, te pahono vave nei te Atua i ta tatou pure, eiaha rā mai tei parauhia e tatou, mai tei hinaarohia rā e te Atua.

No reira, i mua i te parau no te « *Oia* » i hinaarohia e tatou, e tià atoà i te Atua ia pahono mai ia tatou na roto i te « *Aita* », e i mua i te parau no te « *Oia* » i tiaihia e tatou, e tià noa atoà i te Atua i te pahono mai ia tatou na roto i te « *Aita* ».

No te aha. No te mea ia, o to te Atua ia hinaaro tumu oia hoi ia ora ta na mau tamarii i muri mai i ta na « *Aita* » e aore ia i ta na « *Oia* ». No ta na mau tamarii oia hoi no terā e pure ra e no terā atoà e ora ra i pihai iho i te taata e pure ra.

Na roto rā i te vahine ra ia Maria, e au ra e, te hinaaro ra te Atua i te haamanaò mai ia tatou e, o ta na i opua i te faatupu no tatou e no te hoè oraraa maitai no tatou i nià i te fenua nei, e faatupu iho â o ia i te reira i te taime e au ai ia faatupuhia.

Ahiri te Atua, o tei rahu i te rai e i te fenua, i te matamua ra, e o tei hamani i te taata, i te Atua manaò ore, ua faaea aè na ia te mahana i te hiti i te poipoi, te marama e te mau fetià i te anaana i te pô, e te fenua i te ohuraa i nià ia na iho ia ore tatou ia topa i raro.

E upoo atoà to te Atua mai to tatou o ta na i hamani, e upoo rā tei î roa i roto ia na, e i te ao e i te pô, e i te mau mahana maitatai e i te mau mahana iino, i te haamanaòraa e, e taata o ta na i hamani i nià i te fenua nei, e taata o ta na i hamani i te here mure – ore no na, e ore ai e tià ia na ia ore ia manaònaò ia na, eiaha no to na huru, noa atu rā to na huru.

E moè â te taata i te taata, eiaha noa i tei ore i herehia, i tei here-atoà-hia rā, eita rā te taata e moèhia i te Atua no te mea e tamarii e e pue anaè hoi ratou atoà na na.

No reira, te uiraa, i teie Mahana fanauraa, eere ia e, te manaò noa rā anei te Atua ia tatou oia hoi te vai noa rā anei te here o te Atua i nià ia tatou. O teie rā, te vai noa rā anei to tatou manaò i te Atua. Mai te peu e, te vai ra, e ite anei te Atua i te reira i roto i to tatou oraraa e i rotopû ia tatou e te feia atoà e haaati ra ia tatou.

Eere teie himene i te mea fatuhia e Maria, e reo noa râ o ïa no te afai i te poroiraa e vai ra i roto i teie himene o tei fatuhia e te Atua i te taima i tupu ai te farereiraa i rotopû ia na e to na tuaana ia Eritapeta.

E i roto i teie himene, e riro ra e, te hinaaro atoà ra te Atua i te haamanaò mai ia tatou, i roto i te tiàtonuraa atu e i te maramarama no teie reo himene e, e Atua o ïa no te aroha, e parau mau, teie râ e Atua atoà o ïa no te parautià.

No reira, ia taiò anaè e ia faaroo anaè tatou i teie reo himene, te ite ra tatou i reira i te huru no te oraraa vaamataeinaa i taua anotau ra. To na huru, o teie ïa: te haapaò noa ra te taata moni ia na iho e te ati noa ra ihoa te taata rii i te ati poia. Aita te veve e te ati poia o te taata i riro ei peàpeàraa na te taata moni, ua riro râ ei oaoaraa.

Eere e, o te moni ta te Atua e riri ra i ô nei, o te taata râ o tei faariro i te moni ei atua no na e ore ai to na aau e mauui faahou i mua i te parau no te ati o te taata.

E o ïa i riro ei tîfî na te moni e na te faufaa i noaa mai ïa na, turî atura to na taria, pourihia atura to na mata e e faaea atoa atura tona aau i te otui i te otui aroha i te taata.

Te pohe nei te taata i nià i te fenua e i roto i te oire i te pohe tauà-ore o te tahi i te tahi, o te taata moni i te taata raveà-ore. E ore ai e tià ia parauhia e, te fifi nei e aore ïa te pohe nei te taata i te pohe poia e aore ïa i te ati toètoè, i te ati tauà-ore râ o te taata i te taata, o te hoê tamarii na te Atua i te tahi ê atu tamarii na te Atua.

E tià ia parauhia e, i te taima i himene ai o Maria i teie himene, tei roto te taata i te reira huru oraraa vaamataeinaa i te oraraa oia hoi i terâ huru oraraa e haapaò noa ai te reira taata ia na iho e te reira taata ia na iho. E oraraa vaamataeinaa i niuhia i nià i te poritita no te mea puai aè e horomiuhia ai te mea paruparu e te mea puai. E te vahi peàpeà maori râ o to te Etaretia ïa, i taua anotau ra, opaniraa i to na mata e e tapiriraa i to na tarià i mua i te tuô e i te auê a te feia ravai-ore.

No reira, i teie Mahana fanauraa, te tuuhia nei te feia atoà e tuhaa ohipa ta ratou i roto i te oraraa vaamataeinaa o to ratou fenua, e aore ïa o ta ratou Etaretia, ia haamanaò faahou i te parau o to ratou titauraa.

I teie Mahana fanauraa e haamanà ai tatou i te haereà-taata-roa-raa mai o te Atua na roto mai i te huru o te hoê aiû iti fanau apî, no te faatitiaifaro e no te faaapî i te manà aāu o te taata ia maitai faahou te hiòraa a te taata i te taata, ia au i te hinaaro o te Atua mai tahito mai, e tià roa ia tatou ia ui faahou i roto ia tatou e, ua riro mau anei e aore ia te riro noa râ anei hoi te tiàraa e tiahia ra e tatou ei tiàraa no te tavini e no te tupuraa o te parautià i nià i te fenua nei.

I haere mai ai râ hoi te Atua i te ao nei na roto i te parau no te Oroà Fanauraa o teie matahiti no te parautià e no te faatupu faahou i nià i te fenua nei i te manà here i roto i te aau taata i te taata.

No reira i teie mahana fanauraa, teiheia roa tatou i te tiàraa i mua i te parau no teie reo himene. Eita ihoa te taata e haamama i to na vaha no te aro i te parautià-ore i nià i te fenua nei e auhia e teie nei ao. E mea au roa râ na te Atua te reira huru taata no te mea o ta na ia tapura ohipa i roto i to tatou oraraa vaamataeinaa.

E vahine noa o Maria, e na reira mai ai Ietu i te haere mai i te ao nei, no te himene i te himene a te Atua. E himene, eere no te faataoto ia tatou, no te haamanà râ ia tatou e, aita te Atua i matau i te parau noa i te parau no te ore e faatupu i te mahana e au ai ia na i te faatupu. E himene atoà râ o tei haamanà ia tatou e, eere to na, i to te Atua i te tere ori haere noa i te ao nei i teie Mahana fanauraa, e tere râ no te faatitiaifaro i te oraraa o ta na mau tamarii i te ao nei oia hoi no te faatupu i te parautià.

No reira, e himene nehenehe roa teie, ore noa atu ai to na nota i te papai-roa-hia mai ai e Ruta. Ia ore anaè te taata faaroo i teie himene e au i teie himene, eita e ore e, te fifi, eere no te taata himene e aore ia no te taata papai-himene, no te taata faaroo himene râ.

Teie râ e turihia anei te mau taata i mua i te hoê himene mai teie te puai e i te nehenehe.

Jacques, Teraì a IHORAI òrometua.

Aoraa Po Matahiti 31 No Tlitema 2003

Taiòraa : Itaia 55 ; Irava 1 vñ : « E te feia atoà i hiaai ra e, e haere mai i te pape nei ! »

E te hui taata i haatiàturihia e tei haapiihia i te mau parau niuraa no te hiroà faaroo porotetani-èvaneria, ia ora na i te farereiraa i teie ruì hopeà no te matahiti 2003. Ua àmui tatou, eiaha no te haapaò noa i te tahi peu matauhia e no te haamaità i te Atua no ta na tuhaa i roto i to tatou oraraa i tera mahana e tera vahi.

Ua hinaaro atoà ra tatou e faaroo faahou i ta na parau mai roto mai i te parau a to na mau tavini, o ta tatou e tiàturi ra e aratai te reira ia tatou i te matahiti àpi 2004. I manaò-atoà-hia ai ei feruriraa parau na tatou i teie po, te poroi a te Perofeta Itaia i to Iteraèra i te na ôraa e, « E te feia atoà i hiaai ra e, e haere mai i te pape nei ! »

Te tupuraa o teie parau, tei te tau ia no to te nunaa Iteraèra ineineraa e hoì i te àià, i muri aè i te tahi tau i hopoi-titi-hia ai i rapae i te fenua i tutuuhia mai e te tupuna e te mau metua. Oia mau, na roto i te tahi hahiraa te aratairaa nunaa, inaha te faahopeàraa, e aratohia i te fenua ê, i Papuronia, e haatumu ai i to ratou oraraa.

Te mea ra, ua tae i te tahi faito e, maoti aè atoà te hiòraa faatiàma a te tahi atu mau aratai nunaa, i faaitoito-faahou-hia ai o Iteraèra e faahinaaro i to na fenua. E i roto i te hiòraa a te Perofeta, mai te mea ra, ua fanau papu te tahi manaò e, e haere e ìmi e e farii faahou i te ora no roto mai i te mau maità o te fenua e te taata àià.

O vai ia taata eita e hiaai i te reira aratairaa ; Oia, te vai ra ia taata, te vai ra ia ùtuafare, te vai ra ia ôpu fetii, e te vai ra ia àti no te tumu ra o te nunaa Iteraèra. Inaha ua tiai-maoro-hia taua mahana ra o tei haere mai e faaiti i te tahi ère rahi, o te tano ia faaauhia i te tahi pape haamaha i te poiha rahi o te taata e faainuhia ra.

Hau atu hoì, inaha te feia tei ineine i te tuuhia, te fatata roa ra ratou i te tapapa faahou i te mau puna ora o te fenua i reira e tahe pape noa ai, te uaina, te u e te meri. Aita e òpaniraa faahou e aita hoì e taiaraa faahou i te faatupuraa i te hinaaro i te mau mea i òre i noaa e i fanaòhia no te rahi o te faafifiraa a to Papuronia.

I tano roa atoà ai ia huru parauraa na Itaia e : « E te feia atoà i hiaai ra e, e haere mai i te pape nei ! » No reira, eiaha ihoa ia e neva noa atu a i muri e e mauruuru noa atu a i tei matauhia i te ora i Papuronia. Areà ra, mai te mea te vai mau ra te manaò e te pohe mau ra i te poiha i te pape metua o te àià, e hoì ru ia e inu i te puna metua ra.

Hau roa atu ra hoì i te reira, aita teie parauraa na Itaia i faaea i nià i te hiaairaa o te taata i te pape e te mau mea atoà e au no to na ora, tei nià mau atoà ra i to na tiàturiraa, to na turuùraa, to na taatiraa, to na fariuraa, to na faarooraa, to na fariiraa, to na hereraa i te Atua o ia te Tumu mau e rahu ra e e horoà ra i te ora o te faaoraraa.

Te puna vai ora mau e te vai ora mau, eere mau atu ra ia te pape inu, te puna vai e te fenua àià na mua roa. O te Atua ra, te Rahu ora e te Metua faaora o tei àpee tamau i te haereà o te taata, o tei parahi fatata i to na faaearaa e tei pahono òhie i to na hiaairaa i te haamataraa e te hopeàraa o te hoê mahana e te hoê matahiti.

I parau atoà ai o Itaia e i te mau ìrava : 3vm « E faafariu mai i to òutou tarià, a haere mai ai ia ù nei, e faaroo mai, e ora ia to òutou varua » ; 6vm « E ìmi òutou ia Iehova, òi itea aè o ia, e tiàoro òutou ia na, òi fatata mai o ia » ; 7vh « Na na o ia e aroha mai, e hoì to tatou Atua ra, te rahi ra hoì ia na te faadre i te hara.

« E te feia atoà i hiaai ra e, e haere mai i te pape nei ! » Ia haamanaò e ia tauturu atoà teie parau ia tatou i teie po hopeà no te matahiti 2003 e i teie po matamua no te matahiti 2004. Eita e òre e, i muri aè i to tatou hiðraa i te mau mea i orahia mai e te orahia atu e tatou, te vai ra te òre e hiaai faahou e te vai ra tei hiaai noa atu a i te ora.

Eita e òre tei roto tatou i te tahi òtoheraa rahi ta te mau fifi o te oararaa i faafanau, aore ra eita e òre tei roto tatou i te tahi tautooraa rahi ta te mau maitaì o te oraraa i faafanau. Teie ra, eita e hið mai te reira. E hið ra tatou e, i te Atua tatou i te fifi e i te maitaì o te matahiti 2003 e to te matahiti 2004, no te mea o Ia to tatou Metua.

No reira, eita tatou e òtohe, eita e òtiàtià, eita òihu, eita hòì e topa. No te mea te haamanaò mai ra te parau a Itaiia te tavini o te Atua i te ìrava 12vm : « E reva òutou ma te òaòà, e arataìhia òutou ma te hau ». I ora na i te Atua i teie matahiti âpi ta tatou e tomo atu nei i Ia na a tatou i te parau o to na aroha mau ra aita atu. Tira ra.

Taoàhere òrometua

Mahana 1 no Tenuare 2004

Taratia 3/23-29

Ìrava faaitoitoraa 28: Aita e âti Iuta, aita e Hereni, aita e tāvini, aita e tiamā, aita e tāne, aita e vahine : hoê ā hoì òutou i roto i te Metia ra ia Ietu.

Ia ora nā i te Here e te Aroha o te Atua i to fārereiraa i teie Matahiti âpī 2004.

Ia haamaitāhia te Atua tei faaite i to na Here ia tātou na roto i te mau maitā atoà ta na i horoà na roto mai i te fenua, te tai e te reva.

Ia haamaitāhia te Atua no te mau taata atoà e àro ra no te tupuraa o te parautiā i niā i to tātou fenua e i roto i teie nei ao.

Ia haamaitāhia te Atua no te mau imiraa rāveà e haahia rā e te mau taata, te mau pupu e te mau Etārētia no te tautururaa i te feiā mai, te feiā tei tāpehia e te feiā e hāmani-ino-hia..

Ia haamaitāhia te Atua no ta na parau tei faaite mai i to na hinaaro e tei porohia i roto i to tātou fenua.

Ia haamaitāhia te Atua no ta na mau horoà ia tātou te nūnaa māōhi: to tātou huru, to tātou reo, to tātou hiroà, to tātou fenua, ta tātou mau peu...

Ia haamaitāhia te Atua no te tau âpī ta na i faatomo mai ia tātou.

I roto i ta tātou parau no teie mahana, te tatarā ra Pauro i te parau o te ture e te faaroo. Ua riro na te ture ei aratai i te taata i te Atua. I te haereraa mai te Fatu, no te faaroo ia te parau na mua atu no te ture te parau no te mea na na e aratai te taata i te Atua ra. Te faaroo ta Pauro e parau ra, te faaroo ia i te Metia òia hoì te fāriiraa e ia tae ta na parau i roto i te tariā, te vaiihoraa e ia òhipa ta na parau i roto i te taata e te àfairaa i te roo o ta na parau. Te parau e te òhipa ta te Fatu i rave te mea faufaa, i tītāu ai Pauro i te Etārētia no Taratia e faaroo i te Metia. Na te reira faaroo i te Metua e tāhoê ia rātou.

Te nā ô ra ta tātou parau: “Aita e âti Iuta, aita e Hereni, aita e tāvini, aita e tiamā, aita e tāne, aita e vahine : hoê ā hoì òutou i roto i te Metia ra ia Ietu”. I mua i teie huru parau ta Pauro, e aha mau te mea ta na e hinaaro ra i te parau. No te mea no te Atua i âti Iuta ai te âti Iuta, no te Atua i hereni ai te hereni, no te Atua i māōhi ai te māōhi. E te nā ô ra teie parau ta Pauro: “aita e âti Iuta, aita hereni, aita e tāvini, aita e tiamā, aita e tāne, aita e vahine, aita e aita...”. Te auaa te tau ra te parau. Na mua te vai ra te taaêraa i roto i terā e terā ia au i te hinaaro o te Atua. E teie nei, èere te mea faufaa faahou te taaêraa? E aha mau te mea ta Pauro e hinaaro e parau.

Aita e âti Iuta, aita e Hereni, aita e tāvini, aita e tiamā, aita e tāne, aita e vahine, te vāhi pāpū aita e faaōrehia ra te faufaa o te mau taaêraa no te mea e hinaaro te reira no te Atua. Te vāhi ta Pauro e hinaarora i te tītāu, te hoêraa o taua mau taaêraa. Te reira te mea ta Pauro e hinaaro ra i te parau i te Etārētia no Taratia, e na te faaroo i te Metia e tāhoê ia rātou. Mai teie ta tātou e parau nei i teie mahana, te hoêraa i roto i te rauraa. Te auaa, i roto i te faaroo i te Metia e roaa i te taata tātāitahi i te faatura i te tahi i roto i to na taaêraa. Ia haamaitāhia te Atua. Teie rā te tahi parau fifi toa i to tātou i teie mahana òia hoì te fāriiraa te tahi i roto i to na taaêraa.

ÉGLISE ÉVANGÉLIQUE EN
POLYNÉSIE FRANÇAISE
ÉCOLE
PASTORALE
HERMON 7
BP: 667 PAPEETE 98713
TEL : (689) 50 25 30
FAX : (689) 50 25 31
Email : hermon@mail.pf

I mua i te mau taaêraa ta Pauro e faaite ra o ta na e tiàturi ra e roaa i te faaroo i te Metia e tãhoê; ia roaa ia i te nūnaa tãtãitahi e te taata tãtãitahia i te fãrii i to na taaêraa e tupuraa no te hinaaro o te Atua. Te auraa no tãtou te mãdhi, ia roaa ia tãtou te haehaa o te âau i te fãriiraa to tãtou mãdhiraa e huru te reira ta te Atua i horoà mai no tãtou. E te tĩtauraa ia tãtou e fãrii i terã huru ta te Atua i horoà mai e nã roto i terã huru ta te Atua i horoà mai e faaite ai tãtou i to na hinaaro. Te òreraa e fãrii i terã huru ta te Atua i horoà mai, e riro te reira mai te tabi haafaufaaòreraa i ta te Atua horoà.

Te fãriiraa tãtou i te huru ta te Atua i horoà mai, te reira te haamataraa o te parau e maramarama ai tãtou i te manaò o Pauro. Ia fãrii òe ia òe na mua roa i roto i to òe taaêraa, i reira e roaa ai ia òe i te fãrii i te taaêraa o te tahi.

Eere hoê ã auraa ta te Fatu e parau ra i roto i Mãtaio 22/39 : **E aroha i to tauaro mai to aroha ia òe iho na.** Te auraa, e here ia òe na mua i reira e roaa atoà ai ia òe i te here i te tahi.

Te here ta te Fatu e hinaaro no te mea e tupuraa te reira no te hinaaro o te Atua. E haamata ihoa na nià ia òe e haere atu ai.

Ia haamaitaìhia te Atua no ta na Parau. Ia itoito tãtou i te faatupu o to na hinaaro. Ia ora nã.

Tehaapapa òrometua



“E Aroha te Atua”

Ètārētia èvaneria i Porinetia farāni

Église évangélique en Polynésie française

Papeete, i te 16 no feppure 2004



I te mau taeaè e tuahine òrometua i roto i te Ètārētia nei

E hoa ino mā e, ia ora na roa i te aroha o te Atua.

Terā mai ta tātou Veà òrometua no te ômuaraa o teie matahiti âpī 2004. Ua faaineinehia mai te reira e te mau taeaè òrometua ei tautururaa ia tātou e i te feiā e rave noa atu i te faaitoitoraa e o ta tatou e haamauruuru maitai nei.

Ia horoà mai ā te Fatu o te Ètārētia i te itoito e te òaà ia tātou no te tāviniraa i ta na òhipa. Mai ia òutou e to òutou mau ùtuafare, te mau âporaa tiàtono e te mau pāroita, a fārii mai te tapaò no te aroha e ia haamaitaì mai te Atua ia òutou i teie hepetoma moà.

1) Hepetoma moà :


- Tapati no te mau Amaa (Oroà Euhari-Tapati 04 no èperēra 2004) (Taarii òrometua)
- Monire 05 no èperēra. (Tehaapapa òrometua)
- Mahana piti 06 no èperēra (Natupuaì òrometua)
- Mahana toru 07 no èperēra (Iotua òrometua)
- Mahana maa 10 no èperēra (Jacques, Teraì a IHORAI òrometua)
- Pâta (Oroà Euhari-Tapati 11 no èperēra) (Tauhere òrometua)

2) Revaraa (Oroà Euhari-Mahana maha 20 no mê) (Martin òrometua)

3) Penetetote (Oroà Euhari-Tapati 30 no mê) (Taoàhere òrometua)

Te haamanadhia atu nei outou e, i pihai iho i te mau pureraa ahiahi atoà no te Hepetoma-moà, e pureraa Faraita poheraa e te haapaeraa ta tatou, o te haamata mai i te hora 8 i te poipoi e tae atu i te hora 2 i te avatea. No reira, ia faaineine-maite-hia taua Oroà pureraa ra no to tatou tiàturi i te faufaa o ta tatou aroraa no te tupuraa o te hau, e te parautià, e te aroha i ô tatou nei e i roto i teie nei ao.

Ia itoito e ia oaoa noa i roto i te parau no te taviniraa.

Te perōtiteni o te Fārētia ,

Taarii MARAEA òrometua